

## ॥ प्रथमः प्रश्नः ॥

## ॥ तैत्तिरीयसंहितायां पञ्चमकाण्डे प्रथमः प्रश्नः ॥

सावित्राणि जुहोति प्रसूत्यै चतुर्गृहीतेन जुहोति चतुष्पादः  
 पशवः पशून्वाव रुन्धे चतस्रो दिशो दिक्ष्वेव प्रति तिष्ठति  
 छन्दांसि देवेभ्योऽपाक्रामन्न वोऽभागानि हव्यं वक्ष्याम इति  
 तेभ्य एतच्चतुर्गृहीतमधारयन् पुरोनुवाक्यायै याज्यायै देवतायै  
 वषट्काराय यच्चतुर्गृहीतं जुहोति छन्दांस्येव तत्प्रीणाति तान्यस्य  
 प्रीतानि देवेभ्यो हव्यं वहन्ति यं कामयेत् (१)

पापीयान्स्थ्यादित्येकैकं तस्य जुहुयादाहुतीभिरेवैनमप  
 गृह्णाति पापीयान्भवति यं कामयेत् वसीयान्स्थ्यादिति सर्वाणि  
 तस्यानुद्भूत्य जुहुयादाहुत्यैवैनमभि क्रमयति वसीयान्भवत्यथो  
 यज्ञस्यैवैषाभिक्रान्तिरेति वा एष यज्ञमुखादृद्ध्या योऽग्नेर्देवताया  
 एत्यष्टावेतानि सावित्राणि भवन्त्यष्टाक्षरा गायत्री गायत्रौ- (२)

अग्निस्तेनैव यज्ञमुखादृद्ध्या अग्नेर्देवतायै नैत्यष्टौ सावित्राणि  
 भवन्त्याहुतिर्नवमी त्रिवृतमेव यज्ञमुखे वि यातयति यदि कामयेत्  
 छन्दांसि यज्ञयशसेनार्पयेयमित्यृचमन्तमां कुर्याच्छन्दांस्येव  
 यज्ञयशसेनार्पयति यदि कामयेत् यजमानं यज्ञयशसेनार्पयेयमिति  
 यजुरन्तमं कुर्याद्यजमानमेव यज्ञयशसेनार्पयत्यृचा स्तोमं  
 समर्धयेत्या- (३)

ह॒ समृ॑द्धौ च॒तुर्भि॑र॒भि॒मा द॑त्ते च॒त्वारि॑ छ॒न्दा॑सि॒ छन्दो॑भिरे॒व  
 दे॒वस्य॑ त्वा स॒वितुः॑ प्र॒स॒व इत्या॑ह॒ प्रसू॑त्या अ॒ग्निर्दे॒वेभ्यो॑ नि॒लाय॑त॒  
 स वेणुं॑ प्रावि॑श॒त्स ए॒तामू॑तिमनु॒ सम॑चर॒द्यद्वे॒णोः सु॒षिर॑ ५ सु॒षिरा॑-  
 ऽभि॑र्भवति स॒योनि॑त्वाय॒ स यत्र॑य॒त्राव॑स॒त्तत्कृ॑ष्णम॒भवत्कल्मा॑षी  
 भ॑वति रू॒पस॑मृ॒द्ध्या उ॒भय॑तः॒क्ष्णू॑र्भवती॒तश्चा॒मुत॑श्चा॒र्कस्या॑व॒रुद्धौ॑  
 व्या॒ममा॒त्री भ॑वत्ये॒ताव॑द्वै पु॒रुषे॑ वी॒र्यं॑ वी॒र्यस॑म्मि॒ताऽप॑रि॒मिता॑  
 भ॒वत्य॑प॒रिमि॑त॒स्याव॑रुद्धौ॒ यो वन॑स्प॒तीनां॑ फल॒ग्रहिः॑ स ए॒षां  
 वी॒र्या॑वा॒न्फल॒ग्रहि॑र्वेणु॒र्वेण॒वी भ॑वति वी॒र्य॑स्याव॒रुद्धौ॑ ॥ (४)

कामयैत गायत्रौऽर्धयेति च ससविंशतिश्च ॥ ४ ॥ [१]

व्यृ॒द्धं वा ए॒तद्य॑ज्ञस्य॒ यद॑य॒जुष्के॑ण क्रि॒यत॑ इ॒माम॑गृ॒ष्णत्र॑श॒नामू॑तसं  
 द॑त्ते॒ यजु॑ष्कृत्यै॒ यज्ञ॑स्य॒ समृ॑द्धौ प्रतू॒र्त वा॒जि॒न्ना द्र॑वेत्य॒श्वम॑भि  
 द॑धाति रू॒पमे॒वास्यै॑तन्महि॒मानं॑ व्याच॑ष्टे यु॒ञ्जाथा॑ ५ रा॒संभं॑ यु॒वमि॑ति  
 गर्द॑भमस॒त्येव॑ गर्द॒भं प्र॑तिष्ठापयति॒ तस्मा॑द॒श्वाद्गर्द॑भोऽस॒त्तरो॑  
 यो॒गेयो॒गे त॒वस्तर॑मित्या॒ह (५)

यो॒गेयो॒ग ए॒वैनं॑ यु॒क्ते वा॒जेवा॒जे ह॒वाम॑ह॒ इत्या॑हान्नं॒ वै  
 वा॒जोऽन्न॑मे॒वाव॑ रुन्धे॒ सखा॑य॒ इन्द्र॑मू॒तय॑ इत्या॒हेन्द्रि॒यमे॒वाव॑  
 रुन्धे॒ऽग्निर्दे॒वेभ्यो॑ नि॒लाय॑त॒ तं प्र॒जाप॑तिर॒न्ववि॑न्दत्प्रा॒जाप॑त्योऽश्वो-  
 ऽश्वे॒न स॑म्भ॒रत्य॑नु॒वित्यै॑ पा॒पव॑स्य॒सं वा ए॒तत्क्रि॑यते॒ यच्छे॒यंसा च॑  
 पा॒पी॒यसा॑ च स॒मानं॑ कर्म॒ कुर्व॑न्ति॒ पापी॑यान् (६)

ह्यश्वार्द्रदभोऽश्वं पूर्वं नयन्ति पापवस्यसस्य व्यावृत्त्यै  
 तस्माच्छ्रेयांसं पापीयान्पश्चादन्वेति बहुर्वै भवतो भ्रातृव्यो  
 भवतीव खलु वा एष योऽग्निं चिनुते वज्रश्वः प्रतूर्वन्नेह्यव-  
 क्रामन्नशस्तीरित्याह वज्रेणैव पाप्मानं भ्रातृव्यमव क्रामति रुद्रस्य  
 गाणपत्यादित्याह रौद्रा वै पशवो रुद्रादेव (७)

पशून्निर्याच्याऽऽत्मने कर्म कुरुते पूष्णा सयुजा सहेत्याह पूषा  
 वा अध्वनाः सन्नेता समष्ट्यै पुरीषायतनो वा एष यदग्निरङ्गिरसो  
 वा एतमग्रे देवतानां समभरन्मृथिव्याः सधस्थादग्निं पुरीष्यमङ्गिर-  
 स्वदच्छेहीत्याह सायतनमेवैनं देवताभिः सम्भरत्यग्निं पुरीष्यमङ्गिर-  
 स्वदच्छेम इत्याह येन (८)

सङ्गच्छते वाजमेवास्य वृद्धे प्रजापतये प्रतिप्रोच्याग्निः  
 सम्भृत्य इत्याहुरियं वै प्रजापतिस्तस्या एतच्छ्रोत्रं यद्वल्मीकोऽग्निं  
 पुरीष्यमङ्गिरस्वद्वरिष्याम इति वल्मीकवपामुप तिष्ठते साक्षादेव  
 प्रजापतये प्रतिप्रोच्याग्निः सम्भरत्यग्निं पुरीष्यमङ्गिरस्वद्वराम  
 इत्याह येन सङ्गच्छते वाजमेवास्य वृद्धेऽन्वग्निरुषसामग्रं (९)

मख्यदित्याहानुख्यात्या आगत्य वाज्यध्वन आक्रम्य  
 वाजिन्यृथिवीमित्याहेच्छत्येवैनं पूर्वया विन्दत्युत्तरया द्वाभ्यामा  
 क्रमयति प्रतिष्ठित्या अनुरूपाभ्यां तस्मादनुरूपाः पशवः प्र जायन्ते  
 द्यौस्ते पृष्ठं पृथिवी सधस्थमित्याहेभ्यो वा एतं लोकेभ्यः प्रजापतिः

समैरयद्रूपमेवास्यैतन्महिमानं व्याचष्टे वज्री वा एष यदश्वो  
दद्विरन्यतोदज्जो भूयाल्लौमभिरुभयादज्जो यं द्विष्यात्तमधस्पदं  
ध्यायेद्वज्रैणैवैनं स्तृणुते॥ (१०)

आह पापीयान्ब्राह्मेय येनाग्रं वज्री वै सप्तदश च॥६॥ [२]

उत्क्रामोदक्रमीदिति द्वाभ्यामुत्क्रमयति प्रतिष्ठित्या  
अनुरूपाभ्यां तस्मादनुरूपाः पशवः प्र जायन्तेऽप उप सृजति यत्र  
वा आपं उपगच्छन्ति तदोषधयः प्रति तिष्ठन्त्योषधीः प्रतितिष्ठन्तीः  
पशवोऽनु प्रति तिष्ठन्ति पशून् यज्ञो यज्ञं यजमानो यजमानं  
प्रजास्तस्मादप उप सृजति प्रतिष्ठित्यै यदध्वर्युरनग्नावाहुतिं  
जुहुयादन्धोऽध्वर्युः (११)

स्याद्रक्षांसि यज्ञं हन्युरहिरण्यमुपास्य जुहोत्यग्निवत्येव  
जुहोति नान्धोऽध्वर्युर्भवति न यज्ञं रक्षांसि घ्नन्ति जिघर्म्यग्निं  
मनसा घृतेनेत्याह मनसा हि पुरुषो यज्ञमभिगच्छति प्रतिक्ष्यन्तं  
भुवनानि विश्वेत्याह सर्वं ह्येष प्रत्यङ्केति पृथुं तिरश्चा वयंसा  
बृहन्तमित्याहाल्पो ह्येष जातो महान् (१२)

भवति व्यचिष्टमन्नं रभसं विदानमित्याहान्नमेवास्मै  
स्वदयति सर्वमस्मै स्वदते य एवं वेदाऽऽ त्वा जिघर्मि  
वचंसा घृतेनेत्याह तस्माद्यत्पुरुषो मनसाऽभिगच्छति  
तद्वाचा वदत्यरक्षसेत्याह रक्षसामपहत्यै मर्यश्रीः स्पृहयद्वर्णो

अ॒ग्निरित्या॒हाप॑चितिमे॒वास्मि॑न्दधा॒त्यप॑चितिमान्भवति॒ य एवं (१३)

वेद॒ मन॑सा॒ त्वै तामा॑प्तुम॒रह॑ति॒ याम॑ध्व॒र्युर॑न॒ग्रावा॑हुतिं जु॒होति॑  
मन॑स्वतीभ्यां जु॒होत्या॑हु॒त्योरा॑स्यै द्वाभ्यां॒ प्रति॑ष्ठित्यै यज्ञ॒मुखे॑य॒ज्ञमुखे॑  
वै क्रि॒यमा॑णे य॒ज्ञः रक्षा॑सि जिघा॑सन्त्ये॒तर॑हि॒ खलु॑ वा  
ए॒तद्य॑ज्ञ॒मुखं य॑र॒ह्येन॑दाहु॒तिरश्नु॑ते परि॑ लिखति॒ रक्ष॑साम॒पह॑त्यै  
ति॒सृभिः॑ परि॑ लिखति त्रि॒वृद्वा अ॒ग्निर्या॑वा॒नेवा॑ग्निस्तस्मा॒द्रक्षा॑स्य॒प  
हन्ति॑ (१४)

गाय॒त्रिया॑ परि॑ लिखति॒ तेजो॑ वै गा॒यत्री॑ तेज॑सै॒वैनं॑ परि॑  
गृ॒ह्णाति॑ त्रि॒ष्टुभा॑ परि॑ लिखतीन्द्रि॒यं वै त्रि॒ष्टुगिन्द्रि॒येणै॒वैनं॑ परि॑  
गृ॒ह्णात्यनु॑ष्टुभा॒ परि॑ लिखत्यनु॒ष्टुप्सर्वा॑णि छन्दा॑सि परि॒भूः  
पर्या॑स्यै मध्य॒तोऽनु॑ष्टुभा॒ वाग्वा अ॑नु॒ष्टुप्स॑स्मा॒न्मध्य॒तो वा॒चा व॑दामो  
गाय॒त्रिया॑ प्रथ॒मया॑ परि॑ लिख॒त्यथानु॑ष्टुभा॒ऽथ त्रि॑ष्टुभा॒ तेजो॑ वै  
गा॒यत्री॑ य॒ज्ञोऽनु॑ष्टुगिन्द्रि॒यं त्रि॑ष्टुप्तेज॑सा चै॒वेन्द्रि॒येण॑ चोभ॒यतो॑ य॒ज्ञं  
परि॑ गृ॒ह्णाति॑॥ (१५)

अ॒न्योऽध्व॑र्युर्म॒हान्भव॑ति त्रि॒ष्टुभा॑ तेजो॑ वै गा॒यत्री॑ त्रयो॑दश च॥५॥ [३]

दे॒वस्य॑ त्वा स॒वितुः॑ प्र॒सव॑ इति॒ खन॑ति॒ प्रसू॑त्या॒ अथो॑  
धूम॑मे॒वैतेन॑ जनयति॒ ज्योति॑ष्मन्तं त्वा॒ग्ने सु॒प्रती॑क॒मित्या॑ह  
ज्योति॑रे॒वैतेन॑ जनयति॒ सोऽग्नि॑र्जा॒तः प्र॒जाः शु॒चाऽर्प॑य॒त्तं  
दे॒वा अ॑र्ध॒र्चेना॑शमयञ्छि॒वं प्र॒जाभ्यो॑ऽहि॑सन्त॒मित्या॑ह प्र॒जाभ्य॑

ए॒वैन॑श्च॒ शम॑यति॒ द्वाभ्या॑ खनति॒ प्रति॑ष्ठित्या अ॒पां पृ॒ष्ठम॒सीति॑  
पुष्कर॑पूर्ण॒मा- (१६)

ह॑रत्य॒पां वा ए॒तत्पृ॑ष्ठं यत्पुष्कर॑पूर्ण॒श्च रू॒पेणै॒वैन॑दा ह॑रति  
पुष्कर॑पूर्ण॒ेन॒ सम्भ॑रति॒ योनि॑र्वा अ॒ग्नेः पु॑ष्करपूर्ण॒श्च संयो॑निमेवाग्नि॒श्च  
सम्भ॑रति कृष्णाजि॒नेन॒ सम्भ॑रति य॒ज्ञो वै कृ॑ष्णाजि॒नं य॒ज्ञेनै॒व य॒ज्ञश्च॑  
सम्भ॑रति॒ यद्वा॒म्याणां॑ प॒शूनां॑ च॒र्मणा॑ सम्भ॑रेद्वा॒म्यान्प॒शूञ्छु॒चा-  
ऽर्प॑येत्कृष्णाजि॒नेन॒ सम्भ॑रत्यार॒ण्याने॒व प॒शूञ्च- (१७)

छु॒चाऽर्प॑यति॒ तस्मा॑त्स॒माव॑त्प॒शूनां॑ प्र॒जाय॑मानानामार॒ण्याः  
प॒शवः॑ कर्नी॒याश्च॑ शु॒चा ह्य॑ता लो॒म॒तः सम्भ॑रत्यतो ह्य॒स्य मे॒ध्यं  
कृष्णाजि॒नं च॑ पुष्कर॑पूर्णं च॒ सश्च॑ स्तृ॒णातीयं॑ वै कृष्णाजि॒नम॒सौ  
पुष्कर॑पूर्ण॒माभ्या॑मे॒वैन॑मु॒भय॑तः परि॑ गृ॒ह्णात्य॒ग्निर्दे॒वेभ्यो॑ नि॒लाय॑त  
तमथ॒र्वान्व॑पश्य॒दथ॑र्वा त्वा प्रथ॒मो निर॑मन्थद॒ग्र इत्या॑- (१८)

ह॒ य ए॒वैन॑म॒न्वप॑श्य॒त्तेनै॒वैन॑श्च॒ सम्भ॑रति॒ त्वाम॑ग्ने  
पुष्करा॑दधीत्या॒ह पु॑ष्करपूर्णं ह्ये॒नमु॑प॒श्रित॑मवि॒न्दत्त॑मु॒ त्वा  
द॒ध्यङ्घ्रि॑रित्या॒ह द॒ध्यङ्घ्रा॑ आ॒थर्व॑णस्ते॒जस्व्या॑सी॒त्तेज॑ ए॒वास्मि॑न्दधाति  
तमु॒ त्वा पा॒थ्यो वृ॑षेत्या॒ह पूर्॒वमे॒वोदि॑तमुत्त॑रेणा॒भि गृ॑णाति (१९)

च॒त॒सृभिः॑ सम्भ॑रति च॒त्वारि॑ छन्दा॑श्चि॒ छन्दा॑भिरे॒व  
गा॒य॒त्रीभि॑र्ब्रा॒ह्मण॑स्य॒ गाय॑त्रो हि ब्रा॒ह्मण॑स्त्रि॒ष्टु॒ग्भीं रा॒ज॒न्य॑स्य॒ त्रैष्टु॑भो  
हि रा॒ज॒न्यो यं का॒मये॑त् व॒सीया॑न्थ॒स्यादि॑त्यु॒भयी॑भिस्तस्य॒

सम्भरेत्तेजश्चैवास्मां इन्द्रियं च समीचीं दधात्यष्टाभिः  
 सम्भरत्यष्टाक्षरा गायत्री गायत्रौऽग्निर्यावानेवाग्निस्त॥ सम्भरति  
 सीदं होतरित्याह देवता एवास्मै स॥ सादयति नि होतेति  
 मनुष्यान्त्स॥ सीदस्वेति वयांसि जनिष्व हि जेन्यो अग्रे  
 अहामित्याह देवमनुष्यानेवास्मै स॥ सन्नान्त्र जंनयति॥ (२०)

ऐव पशूनिर्ति गृणाति होतरिति सप्तविंशतिश्च॥ ५॥ [४]

क्रूरमिव वा अस्या एतत्करोति यत्खनत्यप उपं सृजत्यापो  
 वै शान्ताः शान्ताभिरेवास्यै शुचं शमयति सं ते वायुर्मातरिश्वा  
 दधात्वित्याह प्राणो वै वायुः प्राणेनैवास्यै प्राणं सं दधाति सं  
 ते वायुरित्याह तस्माद्वायुप्रच्युता दिवो वृष्टिरीर्ते तस्मै च देवि  
 वषडस्तु (२१)

तुभ्यमित्याह षड्वा ऋतवं ऋतुष्वेव वृष्टिं दधाति  
 तस्मात्सर्वानृतून् वर्षति यद्वषट्कुर्याद्यातयामाऽस्य वषट्कारः  
 स्याद्यन्न वषट्कुर्याद्रक्षांसि यज्ञं हन्युर्वडित्याह परोक्षमेव  
 वषट्करोति नास्य यातयामा वषट्कारो भवति न यज्ञं रक्षांसि  
 घ्नन्ति सुजातो ज्योतिषा सहेत्यनुष्टुभोपं नह्यत्यनुष्टुप्- (२२)

सर्वाणि छन्दांसि छन्दांसि खलु वा अग्नेः प्रिया तनूः  
 प्रिययैवैनं तनुवा परि दधाति वेदुको वासो भवति य एवं वेदं  
 वारुणो वा अग्निरुपनद्ध उदु तिष्ठ स्वध्वरोर्ध्व ऊ षु णं ऊतय इति

सावित्रीभ्यामुत्तिष्ठति सवितृप्रसूत एवास्योर्ध्वा वरुणमेनिमुत्सृजति  
द्वाभ्यां प्रतिष्ठित्यै स जातो गर्भो असि (२३)

रोदस्योरित्याहेमे वै रोदसी तयोरेष गर्भो यदग्निस्तस्मादेवमाहा  
चारुर्विभृत ओषधीष्वित्याह यदा ह्येतं विभरन्त्यथ चारुतरो भवति  
प्र मातृभ्यो अधि कर्निक्रदद्वा इत्याहौषधयो वा अस्य  
मातरस्ताभ्य एवैनं प्र च्यावयति स्थिरो भव वीङ्मङ्ग इति गर्दभ  
आ सादयति (२४)

सं नह्यत्येवैनमेतया स्थेप्ने गर्दभेन सम्भरति तस्माद्गर्दभः  
पशूनां भारभारितमो गर्दभेन सम्भरति तस्माद्गर्दभोऽप्यनालेशे-  
ऽत्यन्यान्पशून्मेघत्यन्नः ह्येनेनार्कः सम्भरन्ति गर्दभेन सम्भरति  
तस्माद्गर्दभो द्विरेताः सन्कनिष्ठं पशूनां प्र जायतेऽग्निर्ह्यस्य योनिं  
निर्दहति प्रजासु वा एष एतर्ह्यारूढः (२५)

स ईश्वरः प्रजाः शुचा प्रदहः शिवो भव प्रजाभ्य इत्याह  
प्रजाभ्य एवैनं शमयति मानुषीभ्यस्त्वमङ्गिर इत्याह मानव्यो  
हि प्रजा मा द्यावापृथिवी अग्निं शूशुचो माऽन्तरिक्षं मा  
वनस्पतीनित्याहेभ्य एवैनं लोकेभ्यः शमयति प्रेतुं वाजी  
कर्निक्रददित्याह वाजी ह्येष नानन्दद्रासभः पत्वेत्या- (२६)

ह रासभ इति ह्येतमृषयोऽवदन्भरन्नग्निं पुरीष्यमित्याहाग्निः  
ह्येष भरति मा पाद्यायुषः पुरेत्याहाऽऽयुरेवास्मिन्दधाति तस्माद्गर्दभः



सर्वमायुरेति तस्माद्भर्दभे पुराऽऽयुषः प्रमीते बिभ्यति वृषाऽग्निं वृषणं  
भरन्नित्याह वृषा ह्येष वृषाऽग्निरपां गर्भं (२७)

समुद्रियमित्याहापाः ह्येष गर्भो यदग्निरग्र आ याहि  
वीतय इति वा इमौ लोकौ व्यैतामग्र आ याहि वीतय इति  
यदाहानयोर्लोकयोर्वीत्यै प्रच्युतो वा एष आयतनादगतः प्रतिष्ठाः  
स एतर्ह्यध्वर्युं च यजमानं च ध्यायत्यृतः सत्यमित्याहेयं वा  
ऋतमसौ (२८)

सत्यमनयोरेवेनं प्रतिष्ठापयति नार्तिमार्च्छत्यध्वर्युर्न यजमानो  
वरुणो वा एष यजमानमभ्येति यदग्निरुपनद्ध ओषधयः प्रति  
गृहीताग्निमेतमित्याह शान्त्यै व्यस्यन्विश्वा अमतीररातीरित्याह  
रक्षसामपंहत्यै निषीदन्नो अपं दुर्मतिः हनदित्याह प्रतिष्ठित्या  
ओषधयः प्रति मोदध्व- (२९)

मेनमित्याहौषधयो वा अग्नेर्भागधेयं ताभिरेवेनः समर्धयति  
पुष्पावतीः सुपिप्पला इत्याह तस्मादोषधयः फलं गृह्णन्त्ययं वो  
गर्भं ऋत्वियः प्रत्नः सधस्थमासददित्याह याभ्यं एवेनं प्रच्यावयति  
तास्वेवेनं प्रतिष्ठापयति द्वाभ्यामुपावहरति प्रतिष्ठित्यै॥ (३०)

अस्त्वनुष्टुबंसि सादयत्यारूढः पत्वेति गर्भमसौ मोदध्वं द्विचत्वारिंशच्च॥१०॥ ——— [५]

वारुणो वा अग्निरुपनद्धो वि पाजसेति वि स्रंसयति  
सवितृप्रसूत एवास्य विषूचीं वरुणमेनि वि सृजत्यप उपं

सृज॒त्यापो॒ वै शा॒न्ताः शा॒न्ताभि॑रे॒वास्य॒ शुच॑ꣳ शमयति तिसृ॒भिरु॑प॒  
सृजति॑ त्रिवृ॒द्धा अ॒ग्निर्यावा॑ने॒वाग्नि॑स्तस्य॒ शुच॑ꣳ शमयति मि॒त्रः  
सꣳसृज्यं॑ पृथि॒वीमित्या॑ह मि॒त्रो वै शि॒वो दे॒वानां॑ तेनै॒व- (३१)

नꣳ सꣳ सृजति॑ शा॒न्त्यै यद्वा॒म्याणां॑ पात्रा॑णां क॒पालैः  
सꣳसृजे॒द्वा॒म्याणि॑ पात्रा॑णि शु॒चाऽर्प॑ये॒दर्म॑क॒पालैः सꣳ सृज॑त्येतानि  
वा अ॒नुप॑जीवनी॒यानि॑ तान्ये॒व शु॒चाऽर्प॑यति शर्क॑राभिः सꣳ सृजति॑  
धृ॒त्या अथो॑ श॒न्त्वाया॑जलो॒मैः सꣳ सृज॑त्येषा वा अ॒ग्नेः प्रि॒या  
तनू॑र्य॒दजा॑ प्रि॒ययै॑वैनं त॒नुवा॒ सꣳ सृज॑त्यथो तेज॑सा कृष्णाजि॒नस्य॑  
लोम॑भिः सꣳ (३२)

सृजति॑ य॒ज्ञो वै कृ॑ष्णाजि॒नं य॒ज्ञेनै॒व य॒ज्ञꣳ सꣳ सृजति॑ रु॒द्राः  
स॒म्भृत्य॑ पृथि॒वीमित्या॑हे॒ता वा ए॒तं दे॒वता॒ अग्ने॑ स॒मभ॑र॒न्ताभि॑रे॒वैनꣳ  
स॒म्भ॑रति म॒खस्य॑ शिरोऽसी॒त्याह॑ य॒ज्ञो वै म॒खस्त॑स्यैतच्छि॒रो  
यदु॒खा तस्मा॑दे॒वमा॑ह य॒ज्ञस्य॑ प॒दे स्थ॒ इत्या॑ह य॒ज्ञस्य॑ ह्ये॒ते (३३)

प॒दे अथो॑ प्र॒तिष्ठि॑त्यै प्रा॒न्याभि॑र्यच्छ्रु॒त्यन्व॒न्यैर्म॑त्रयते  
मिथु॑न॒त्वाय॒ त्र्यु॒द्धिं करो॑ति त्रयं इ॒मे लो॒का ए॒षां लो॒काना॑मा॒स्यै  
छन्दा॑भिः करोति वी॒र्यं॑ वै छन्दाꣳसि वी॒र्येणै॑वैनं करोति  
यजु॑षा बि॒लं करो॑ति व्यावृ॑त्त्या इय॑तीं करोति प्र॒जाप॑तिना  
य॒ज्ञमु॒खेन॑ स॒मि॒तां द्वि॑स्त॒नां करो॑ति द्यावा॑पृथि॒व्योर्दो॑हाय चतुः  
स्त॒नां करो॑ति पशू॑नां दो॒हाया॑ष्टास्त॒नां करो॑ति छन्द॑सां दो॒हाय॑

नवा॑श्चि॒मभि॒चर॑तः कुर्यात् त्रि॒वृ॒तमे॒व वज्र॑ः सम्भृत्य भ्रातृ॒व्याय॑ प्र  
ह॑रति स्तृत्यै॑ कृ॒त्वाय॑ सा म॒हीमु॒खामि॒ति नि द॑धाति दे॒वता॑स्वे॒वैनां॑  
प्रति॑ष्ठापयति॥ (३४)

तेनैव लोमभिः समेते अभिचरन्त एकविंशतिश्च॥४॥ [६]

स॒प्तभि॑र्धूपयति स॒प्त वै शी॑र्ष॒ण्याः प्रा॒णाः शि॑रं  
ए॒तद्य॒ज्ञस्य॑ यदु॒खा शी॑र्ष॒न्नेव॑ य॒ज्ञस्य॑ प्रा॒णान्द॑धाति तस्मा॑त्स॒प्त  
शी॑र्ष॒न्प्रा॒णा अ॑श्वश॒केन॑ धूपयति प्राजाप॒त्यो वा अश्वः॑  
सयो॒नि॒त्वायादि॑ति॒स्त्वेत्या॑हेयं वा अदि॑तिरदि॒त्यैवादि॑त्यां  
खन॑त्यस्या अ॒क्रूर॑ङ्का॒राय॑ न हि स्वः स्वः॑ हि॒नस्ति॑ दे॒वानां॑ त्वा  
पत्नी॑रि॒त्याह॑ दे॒वानां॑ (३५)

वा ए॒तां प॒त्नयोऽग्ने॑ऽकुर्वन्ताभि॑रे॒वैनां॑ दधाति धि॒षणा॑स्त्वेत्या॑ह  
वि॒द्या वै धि॒षणा॑ वि॒द्याभि॑रे॒वैनां॑म॒भीन्दे॑ ग्रास्त्वेत्या॑ह छ॒न्दाः॑सि॒ वै  
ग्राश्छ॒न्दोभि॑रे॒वैनां॑ श्रपयति वरू॒त्रय॑स्त्वेत्या॑ह हो॒त्रा वै वरू॒त्रयो  
हो॒त्राभि॑रे॒वैनां॑ पचति जन॑य॒स्त्वेत्या॑ह दे॒वानां॑ वै पत्नी॑र्- (३६)

जन॑य॒स्ताभि॑रे॒वैनां॑ पचति ष॒ड्भिः प॑चति ष॒ड्वा ऋ॒तव॑  
ऋ॒तुभि॑रे॒वैनां॑ पचति द्विः पच॑न्त्वित्या॑ह तस्मा॒द्विः सं॑व॒त्सर॑स्य  
स॒स्यं प॑च्यते वारु॒ण्यु॒खाभी॑द्धा मै॒त्रियो॑पैति शान्त्यै॑ दे॒वस्त्वा  
सवि॑तोद्व॒प॒त्वित्या॑ह सवि॑तृप्र॒सूत ए॒वैनां॑ ब्रह्म॑णा दे॒वता॑भि॒रुद्व॑प॒त्यप॑द्यमा  
पृथि॒व्याशा॑ दि॒श आ पृ॒णे- (३७)

त्याह तस्मादग्निः सर्वा दिशोऽनु वि भात्युत्तिष्ठ बृहती भवोर्ध्वा  
 तिष्ठ ध्रुवा त्वमित्याह प्रतिष्ठित्या असुर्य पात्रमनाच्छृणुमा च्छृणत्ति  
 देवत्राकरजक्षीरेणाऽऽ च्छृणत्ति परमं वा एतत्पयो यदजक्षीरं  
 परमेणैवैनां पयसाऽऽ च्छृणत्ति यजुषा व्यावृत्यै छन्दोभिरा  
 च्छृणत्ति छन्दोभिर्वा एषा क्रियते छन्दोभिरेव छन्दाऽस्या  
 च्छृणत्ति॥ (३८)

आहु देवानां वै पत्नीः पृणैषा षट्॥४॥ ————— [७]

एकविंशत्या माषैः पुरुषशीर्षमच्छैत्यमेध्या वै माषा  
 अमेध्यं पुरुषशीर्षममेध्यैरेवास्यामेध्यं निरवदाय मेध्यं कृत्वा  
 हरत्येकविंशतिर्भवन्त्येकविंशो वै पुरुषः पुरुषस्याऽऽस्यै व्यृद्धं  
 वा एतत्प्राणैरमेध्यं यत्पुरुषशीर्षं सप्तधा वितृण्णां वल्मीकवपां  
 प्रति नि दधाति सप्त वै शीर्षण्याः प्राणाः प्राणैरेवैनथ्समर्धयति  
 मेध्यत्वाय यावन्तो (३९)

वै मृत्युबन्धवस्तेषां यम आधिपत्यं परीयाय यमगाथाभिः  
 परि गायति यमादेवैनद्वृङ्के तिसृभिः परि गायति त्रयं इमे  
 लोका एभ्य एवैनल्लोकेभ्यो वृङ्के तस्माद्गायते न देयं गाथा हि  
 तद्वृङ्केऽग्निभ्यः पशूना लभते कामा वा अग्नयः कामानेवाव रुन्धे  
 यत्पशून्नालभेतानवरुद्धा अस्य (४०)

पशवः स्युर्यत्पर्यग्निकृतानुत्सृजेद्यज्ञवेशसं कुर्याद्यत्संस्थापयेद्य

शीर्षाणि स्युर्यत्पशूनालभते तेनैव पशूनव रुन्धे यत्पर्यग्निकृतानुत्सृज  
 शीर्ष्णामयातयामत्वाय प्राजापत्येन सः स्थापयति यज्ञो वै  
 प्रजापतिर्यज्ञ एव यज्ञं प्रतिष्ठापयति प्रजापतिः प्रजा असृजत् स  
 रिरिचानोऽमन्यत् स एता अप्रीरपश्यत्ताभिर्वै स मुखत (४१)

आत्मानमाप्रीणीत् यदेता अप्रियो भवन्ति यज्ञो वै  
 प्रजापतिर्यज्ञमेवैताभिर्मुखत आ प्रीणात्यपरिमितच्छन्दसो  
 भवन्त्यपरिमितः प्रजापतिः प्रजापतेरात्या ऊनातिरिक्ता मिथुनाः  
 प्रजात्यै लोमशं वै नामैतच्छन्दः प्रजापतेः पशवो लोमशाः  
 पशूनेवाव रुन्धे सर्वाणि वा एता रूपाणि सर्वाणि रूपाण्यग्नौ  
 चित्यै क्रियन्ते तस्मादेता अग्रेश्चित्यस्य (४२)

भवन्त्येकविंशतिः सामिधेनीरन्वाह रुग्वा एकविंशो  
 रुचमेव गच्छत्यथो प्रतिष्ठामेव प्रतिष्ठा ह्येकविंशश्चतुर्विंशतिमन्वाह  
 चतुर्विंशतिरर्धमासाः संवत्सरः संवत्सरोऽग्निर्वैश्वानरः साक्षादेव  
 वैश्वानरमव रुन्धे पराचीरन्वाह पराडिव हि सुवर्गो लोकः  
 समास्त्वाऽग्न ऋतवो वर्धयन्त्वित्याह समाभिरेवाग्निं वर्धय- (४३)

त्यृतुभिः संवत्सरं विश्वा आ भाहि प्रदिशः पृथिव्या  
 इत्याह तस्मादग्निः सर्वा दिशोऽनु वि भाति प्रत्यौहतामश्विना  
 मृत्युमस्मादित्याह मृत्युमेवास्मादप नुदत्युद्वयं तमसस्परीत्याह  
 पाप्मा वै तमः पाप्मानमेवास्मादप हन्त्यगन्म ज्योतिरुत्तममित्याहासौ  
 वा आदित्यो ज्योतिरुत्तममादित्यस्यैव सायुज्यं गच्छति

न संवत्सरस्तिष्ठति नास्य श्रीस्तिष्ठति यस्यैताः क्रियन्ते  
ज्योतिष्मतीमुत्तमामन्वाह ज्योतिरेवास्मा उपरिष्ठादधाति सुवर्गस्य  
लोकस्यानुख्यात्यै॥ (४४)

यावन्तोऽस्य मुखतश्चित्यस्य वर्धयत्यादित्यौऽष्टाविंशतिश्च॥६॥ [८]

षड्भिर्दीक्षयति षड्वा ऋतवं ऋतुभिरेवेन दीक्षयति  
सप्तभिर्दीक्षयति सप्त छन्दांसि छन्दोभिरेवेन दीक्षयति विश्वे  
देवस्य नेतुरित्यनुष्टुभोत्तमया जुहोति वाग्वा अनुष्टुप्तस्मात्प्राणानां  
वागुत्तमैकस्मादक्षरादनांसं प्रथमं पदं तस्माद्यद्वाचोऽनांसं तन्मनुष्या  
उप जीवन्ति पूर्णया जुहोति पूर्ण इव हि प्रजापतिः (४५)

प्रजापतेरात्यै न्यूनया जुहोति न्यूनाद्धि प्रजापतिः प्रजा  
असृजत प्रजानां सृष्ट्यै यदर्चिषि प्रवृश्याद्भूतमव रुन्धीत  
यदङ्गारेषु भविष्यदङ्गारेषु प्र वृणक्ति भविष्यदेवाव रुन्धे भविष्यद्धि  
भूयो भूताद्वाभ्यां प्र वृणक्ति द्विपाद्यजमानः प्रतिष्ठित्यै ब्रह्मणा वा  
एषा यजुषा सम्भृता यदुखा सा यद्धिद्येतार्तिमार्च्छेद् (४६)

यजमानो हन्येतास्य यज्ञो मित्रैतामुखां तपेत्याह ब्रह्म वै मित्रो  
ब्रह्मन्नेवेनां प्रतिष्ठापयति नार्तिमार्च्छति यजमानो नास्य यज्ञो हन्यते  
यदि भिद्येत तैरेव कपालैः सः सृजेत्सैव ततः प्रायश्चित्तिर्यो गतश्रीः  
स्यान्मथित्वा तस्याव दध्याद्भूतो वा एष स स्वां (४७)

देवतामुपैति यो भूतिकामः स्याद्य उखायै सम्भवेत्स

ए॒व तस्य॑ स्या॒दतो॒ ह्येष॑ स॒म्भवंत्येष॑ वै स्व॒यम्भू॑र्नाम॒ भवंत्ये॒व  
यं का॒मये॑त् भ्रातृ॒व्यमस्मै॑ जनये॒यमित्य॑न्यतस्तस्याऽऽह॒त्याव॑  
दध्या॒त्साक्षा॑दे॒वास्मै॑ भ्रातृ॒व्यं जन॑यत्य॒म्बरी॑षा॒दन्न॑का॒मस्या॑व॒  
दध्या॑द॒म्बरी॑षे वा अन्नं॑ भ्रियते॒ सयौ॑न्ये॒वान्न॑- (४८)

मव॑ रुन्धे मु॒ञ्जान॑व॒ दधा॒त्यूर्ग्वै मु॒ञ्जा ऊ॒र्जमे॒वास्मा॑ अपि॑  
दधा॒त्यग्नि॑र्दे॒वेभ्यो॑ नि॒लाय॑त् स क्रु॒मुकं॑ प्रावि॒शत् क्रु॒मुक॑मव॒ दधा॑ति  
यदे॒वास्य॑ तत्र॒ न्यक्तं॑ तदे॒वाव॑ रुन्ध॒ आज्ये॑न॒ सं यौ॑त्ये॒तद्वा अ॒ग्नेः  
प्रि॒यं धाम॑ यदा॒ज्यं प्रि॒येणै॒वैनं॑ धा॒म्रा स॑म॒र्धय॑त्यथो॒ तेज॑सा॒ (४९)

वैक॑ङ्क॒तीमा॑ द॒धाति॑ भा ए॒वाव॑ रुन्धे शमी॒मयी॑मा द॒धाति॑ शान्त्यै॒  
सीद॒ त्वं मा॒तुर॒स्या उ॒पस्थ॑ इति॑ ति॒सृभि॑र्जा॒तमु॑प॒ तिष्ठ॑ते त्रयं॑ इ॒मे  
लो॒का ए॒ष्वेव॑ लो॒केष्वा॒विदं॑ गच्छ॒त्यथो॑ प्रा॒णाने॒वाऽऽत्म॑न्धत्ते॥ (५०)

प्रजापतिर॒गच्छे॒त्स्वामे॒वान्नं॑ तेज॑सा॒ चतु॑स्त्रि॒ंशच्च॑॥६॥ [९]

न ह॑ स्म॒ वै पु॒राग्नि॑र॒प॑रशुवृ॒क्णं द॑हति॒ तद॑स्मै  
प्रयो॒ग ए॒वर्षि॑र॒स्वद॑य॒द्यद॑ग्ने॒ यानि॑ कानि॒ चेति॑ स॒मिध॑मा  
द॒धा॒त्यप॑रशुवृ॒क्णमे॒वास्मै॑ स्व॒दय॑ति॒ सर्व॑मस्मै स्व॒दते॒ य ए॒वं  
वेदो॑दु॒म्बरी॑मा द॒धा॒त्यूर्वा उ॑दु॒म्बर॒ ऊ॒र्जमे॒वास्मा॑ अपि॑ दधाति  
प्र॒जाप॑तिर॒ग्निम॑सृजत् त॒ं सृष्ट॑ रक्षा॒ंस्य॑- (५१)

जिघा॑ंस॒न्त्स ए॒तद्वा॑क्षो॒घ्नम॑पश्य॒त्तेन॑ वै स रक्षा॒ंस्यपा॑हत॒  
यद्वा॑क्षो॒घ्नं भ॑वंत्य॒ग्नेरे॒व तेन॑ जा॒ताद्रक्षा॒ंस्यप॑ ह॒न्त्याश्व॑त्थी॒मा

दधात्यश्वत्थो वै वनस्पतीनां सपत्नसाहो विजित्यै वैकङ्कतीमा  
दधाति भा एवाव रुन्धे शमीमयीमा दधाति शान्त्यै सशितं मे  
ब्रह्मोर्देषां बाहू अतिरमित्युत्तमे औदुम्बरी (५२)

वाचयति ब्रह्मणैव क्षत्रं सः श्यति क्षत्रेण ब्रह्म तस्माद्ब्राह्मणो  
राजान्यवानत्यन्यं ब्राह्मणं तस्माद्राजान्यो ब्राह्मणवानत्यन्यं राजान्यं  
मृत्युर्वा एष यदग्निरमृतं हिरण्यं रुक्ममन्तरं प्रति मुञ्चतेऽमृतमेव  
मृत्योरन्तर्धत्त एकविंशतिनिर्बाधो भवत्येकविंशतिर्वै देवलोका  
द्वादश मासाः पञ्चर्तवस्त्रय इमे लोका असावादित्य - (५३)

एकविंश एतावन्तो वै देवलोकास्तेभ्य एव भ्रातृव्यमन्तरैति  
निर्बाधैर्वै देवा असुरान्निर्बाधेऽकुर्वन्त तन्निर्बाधानां निर्बाधत्वं  
निर्बाधी भवति भ्रातृव्यानेव निर्बाधे कुरुते सावित्रिया प्रति  
मुञ्चते प्रसूत्यै नक्तोषासेत्युत्तरयाऽहोरात्राभ्यामेवैनमुद्यच्छते  
देवा अग्निं धारयन्द्रविणोदा इत्याह प्राणा वै देवा द्रविणोदा  
अहोरात्राभ्यामेवैनमुद्यत्य (५४)

प्राणैर्दाधाराऽऽसीनः प्रति मुञ्चते तस्मादासीनाः प्रजाः प्र  
जायन्ते कृष्णाजिनमुत्तरं तेजो वै हिरण्यं ब्रह्म कृष्णाजिनं तेजसा  
चैवैनं ब्रह्मणा चोभयतः परि गृह्णाति षडुद्यामं शिष्यं भवति  
षड्वा ऋतवं ऋतुभिरेवैनमुद्यच्छते यद्वादशोद्यामं संवत्सरेणैव  
मौञ्जं भवत्यूगैर्वै मुञ्जा ऊर्जैर्वैनं समर्धयति सुपर्णोऽसि



गुरुत्मानित्यवैक्षते रूपमेवास्यैतन्महिमानं व्याचष्टे दिवं गच्छ  
सुवः पतेत्याह सुवर्गमेवैनं लोकं गमयति॥ (५५)

रक्षाङ्गस्योदुम्बरी आदित्य उद्यत्य सञ्चतुर्विंशतिश्च॥५॥ [१०]

समिद्धो अञ्जन्कृदरं मतीनां घृतमग्ने मधुमत्पिन्वमानः।  
वाजी वहन्वाजिनं जातवेदो देवानां वक्षि प्रियमा सधस्थम्।  
घृतेनाञ्जन्सम्पथो देवयानान्प्रजानन्वाज्यप्येतु देवान्। अनु त्वा  
सप्ते प्रदिशः सचन्ताः स्वधामस्मै यजमानाय धेहि। ईड्यश्वासि  
वन्द्यश्च वाजिन्नाशुश्वासि मेध्यश्च सप्ते। अग्निष्ठा (५६)

देवैर्वसुभिः सजोषाः प्रीतं वह्निं वहतु जातवेदाः। स्तीर्णं बरुहिः  
सुष्टरीमा जुषाणोरु पृथु प्रथमानं पृथिव्याम्। देवेभिर्युक्तमर्दितिः  
सजोषाः स्योनं कृण्वाना सुविते दधातु। एता उ वः सुभगा  
विश्वरूपा वि पक्षोभिः श्रयमाणा उदातैः। ऋष्याः सतीः कवषः  
शुम्भमाना द्वारो देवीः सुप्रायणा भवन्तु। अन्तरा मित्रावरुणा चरन्ती  
मुखं यज्ञानामभि संविदाने। उषासां वा९ (५७)

सुहिरण्ये सुशिल्पे ऋतस्य योनाविह सादयामि। प्रथमा वा९  
सरथिना सुवर्णा देवो पश्यन्तौ भुवनानि विश्वा। अपिप्रयं चोदना वा  
मिमाना होतारा ज्योतिः प्रदिशा दिशन्ता। आदित्यैर्नो भारती वष्ट  
यज्ञ९ सरस्वती सह रुद्रैर्न आवीत्। इडोपहृता वसुभिः सजोषा  
यज्ञं नो देवीरमृतेषु धत्ता। त्वष्टा वीरं देवकामं जजान त्वष्टुरवा

जायत आशुरश्वः। (५८)

त्वष्टेदं विश्वं भुवनं जजान बहोः कर्तारमिह यक्षि होतः। अश्वो  
घृतेन त्मन्या समेक्त उप देवाः ऋतुशः पार्थ एतु। वनस्पतिर्देवलोकं  
प्रजानन्नग्निना हव्या स्वदितानि वक्षत्। प्रजापतेस्तपसा वावृधानः  
सद्यो जातो दधिषे यज्ञमग्ने। स्वाहाकृतेन हविषा पुरोगा याहि  
साध्या हविरदन्तु देवाः॥ (५९)

अग्निष्ठां वामश्वो द्विचत्वारिंशच्च॥४॥ [११]

सावित्राणि व्यृद्धमुक्त्राम देवस्य खनति क्रूरं वारुणः सप्तभिरेकविंशत्या षड्विर्न हं स्म समिद्धो  
अञ्जनेकादश॥११॥

सावित्राण्युक्त्राम क्रूरं वारुणः पशवं स्युर्न हं स्म नवपञ्चाशत्॥५९॥

सावित्राणि हविरदन्तु देवाः॥

हरिः ॐ॥

॥कृष्ण-यजुर्वेदीय-तैत्तिरीय-संहितायां पञ्चमकाण्डे प्रथमः प्रश्नः  
समाप्तः॥५-१॥

## ॥द्वितीयः प्रश्नः॥

## ॥तैत्तिरीयसंहितायां पञ्चमकाण्डे द्वितीयः प्रश्नः॥

विष्णुमुखा वै देवाश्छन्दोभिरिमाँल्लोकाननपज्य्यमभ्यजयन्  
 यद्विष्णुक्रमान्क्रमते विष्णुरेव भूत्वा यजमानश्छन्दोभिरिमाँल्लोकाननप  
 जयति विष्णोः क्रमोऽस्यभिमातिहेत्याह गायत्री वै पृथिवी  
 त्रैष्टुभमन्तरिक्षं जागती द्यौरानुष्टुभीर्दिशश्छन्दोभिरेवेमाँल्लोकान्  
 यथापूर्वमभि जयति प्रजापतिरग्निमसृजत सोऽस्मात्सृष्टः (१)

पराङ्मेतयाऽन्वेदक्रन्ददिति तथा वै सोऽग्नेः प्रियं  
 धामावारुन्ध यदेतामन्वाहाग्नेरेवैतया प्रियं धामाव रुन्ध ईश्वरो वा  
 एष पराङ्मुदघो यो विष्णुक्रमान्क्रमते चतसृभिरा वर्तते चत्वारि  
 छन्दांसि छन्दांसि खलु वा अग्नेः प्रिया तनूः प्रियामेवास्य  
 तनुवमभि (२)

पर्यावर्तते दक्षिणा पर्यावर्तते स्वमेव वीर्यमनु पर्यावर्तते  
 तस्माद्दक्षिणोऽर्ध आत्मानो वीर्यावत्तरोऽथो आदित्यस्यैवा-  
 ऽऽवृतमनु पर्यावर्तते शुनःशेपमाजीगर्ति वरुणोऽगृह्णात्स एतां  
 वारुणीमपश्यत्तया वै स आत्मानं वरुणपाशादमुश्चद्वरुणो वा एतं  
 गृह्णाति य उखां प्रतिमुञ्चत उदुत्तमं वरुणं पाशमस्मदित्याहाऽऽ-  
 त्मानमेवैतया (३)

वरुणपाशान्मुञ्चत्या त्वाहार्षमित्याहाऽऽ ह्येन९ हरति

ध्रुवस्तिष्ठाविचाचलिरित्याह प्रतिष्ठित्यै विशस्त्वा सर्वा  
वाञ्छन्वित्याह विशैवैनं समर्धयत्यस्मिन्नाष्ट्रमधि श्रयेत्याह  
राष्ट्रमेवास्मिन्ध्रुवमकर्यं कामयेत राष्ट्रं स्यादिति तं मनसा  
ध्यायेद्राष्ट्रमेव भव- (४)

त्यग्रे बृहन्नुपसामूर्ध्वो अस्थादित्याहाग्रमेवैनं समानानां  
करोति निर्जग्मिवान्तमस इत्याह तम एवास्मादप हन्ति  
ज्योतिषागादित्याह ज्योतिरेवास्मिन्दधाति चतसृभिः सादयति  
चत्वारि छन्दांसि छन्दाभिरेवातिछन्दसोत्तमया वर्षं वा एषा  
छन्दसां यदतिच्छन्दा वर्षमेवैनं समानानां करोति सद्धती (५)

भवति सत्त्वमेवैनं गमयति वात्सप्रेणोप तिष्ठत एतेन वै  
वत्सप्रीर्भालन्दनोऽग्रेः प्रियं धामावारुन्धाग्रेरेवैतेन प्रियं धामाव रुन्ध  
एकादशं भवत्येकधैव यजमाने वीर्यं दधाति स्तोमेन वै देवा  
अस्मिँल्लोक आर्ध्रुवञ्छन्दोभिरमुष्मिन्स्तोमस्येव खलु वा एतद्रूपं  
यद्वात्सप्रम्यद्वात्सप्रेणोपतिष्ठत - (६)

इममेव तेन लोकमभि जयति यद्विष्णुक्रमान्क्रमतेऽमुमेव  
तैर्लोकमभि जयति पूर्वेद्युः प्र क्रामत्युत्तरेद्युरप तिष्ठते तस्माद्योगे-  
ऽन्यासां प्रजानां मनः क्षेमेऽन्यासां तस्माद्यायावरः क्षेम्यस्येशे  
तस्माद्यायावरः क्षेम्यमध्यवस्यति मुष्टी करोति वाचं यच्छति  
यज्ञस्य धृत्यै॥ (७)

सृष्टोऽभ्येतयां भवति सद्यत्युपतिष्ठते द्विचत्वारिंशच्च॥७॥ [१]

अन्नपतेऽन्नस्य नो देहीत्याहाग्निर्वा अन्नपतिः स एवास्मा  
अन्नं प्र यच्छत्यनमीवस्य शुष्मिण इत्याहायक्ष्मस्येति वावैतदाह  
प्र प्रदातारं तारिष ऊर्जं नो धेहि द्विपदे चतुष्पद इत्याहाऽऽ-  
शिषमेवैतामा शास्त उदु त्वा विश्वे देवा इत्याह प्राणा वै विश्वे  
देवाः (८)

प्राणैरेवैनमुद्यच्छतेऽग्ने भरन्तु चित्तिभिरित्याह यस्मा एवैनं  
चित्तायोद्यच्छते तेनैवैनं समर्धयति चतसृभिरा सादयति चत्वारि  
छन्दांसि छन्दोभिरेवातिच्छन्दसोत्तमया वर्षं वा एषा छन्दसां  
यदतिच्छन्दा वर्षेवैनं समानानां करोति सद्यती भवति सत्त्वमेवैनं  
गमयति प्रेदग्ने ज्योतिष्मान् (९)

याहीत्याह ज्योतिरेवास्मिन्दधाति तनुवा वा एष हिंनस्ति यं  
हिंनस्ति मा हिंसीस्तनुवा प्रजा इत्याह प्रजाभ्य एवैनं शमयति  
रक्षांसि वा एतद्यज्ञं संचन्ते यदनं उथ्सर्जत्यक्रन्ददित्यन्वाह  
रक्षसामपहत्या अनंसा वहन्त्यपंचितिमेवास्मिन्दधाति  
तस्मादनस्वी च रथी चातिथीनामपंचिततमा- (१०)

वपंचितिमान्भवति य एवं वेदं समिधाऽग्निं दुवस्यतेति  
घृतानुषित्तामवसिते समिधमा दधाति यथातिथय आगताय  
सर्पिष्वदातिथ्यं क्रियते तादृगेव तद्गायत्रिया ब्राह्मणस्य गायत्रो  
हि ब्राह्मणस्त्रिष्टुभा राजन्यस्य त्रैष्टुभो हि राजन्योऽप्सु भस्म प्र

वैशयत्यप्सु योनिर्वा अग्निः स्वामेवैनं योनिं गमयति तिसृभिः प्र  
वैशयति त्रिवृद्धा - (११)

अग्निर्यावानेवाग्निस्तं प्रतिष्ठां गमयति परा वा एषोऽग्निं  
वपति योऽप्सु भस्मं प्रवेशयति ज्योतिष्मतीभ्यामव दधाति  
ज्योतिरेवास्मिन्दधाति द्वाभ्यां प्रतिष्ठित्यै परा वा एष प्रजां पशून्  
वपति योऽप्सु भस्मं प्रवेशयति पुनरूर्जा सह रय्येति पुनरुदैति  
प्रजामेव पशूनात्मन्धत्ते पुनस्त्वाऽऽदित्या - (१२)

रुद्रा वसंवः समिन्धतामित्याहेता वा एतं देवता अग्रे  
समैन्धत ताभिरेवैनं५ समिन्द्रे बोधा स बोधीत्युपं तिष्ठते  
बोधयत्येवैनं तस्मात्सुप्त्वा प्रजाः प्र बुध्यन्ते यथास्थानमुपं तिष्ठते  
तस्माद्यथास्थानं पशवः पुनरेत्योपं तिष्ठन्ते॥ (१३)

वै विश्वे देवा ज्योतिष्मानपंचिततमौ त्रिवृद्धा आदित्या द्विचत्वारिंशच्च॥६॥ ————— [२]

यावन्ती वै पृथिवी तस्यै यम आधिपत्यं परीयाय यो वै  
यमं देवयजनमस्या अनिर्याच्याग्निं चिनुते यमायैनं५ स चिनुते-  
ऽपेतेत्यध्यवसाययति यममेव देवयजनमस्यै निर्याच्याऽऽत्मनेऽग्निं  
चिनुत इष्वग्रेण वा अस्या अनामृतमिच्छन्तो नाविन्दन्ते देवा  
एतद्यजुरपश्यन्नपेतेति यदेतेनाध्यवसाययत्य- (१४)

नामृत एवाग्निं चिनुत उद्धन्ति यदेवास्या अमेध्यं तदपं  
हन्त्यपोऽवोक्षति शान्त्यै सिकता नि वपत्येतद्वा अग्रेवैश्वानरस्य  
रूपं५ रूपेणैव वैश्वानरमव रुन्ध ऊषान्नि वपति पुष्टिर्वा एषा

प्रजननं यदूषाः पुष्ट्यामेव प्रजननेऽग्निं चिनुतेऽथो संज्ञानं एव  
संज्ञानं ह्येतत् (१५)

पशूनां यदूषा द्यावापृथिवी सहास्तां ते वियती अब्रूतामस्त्वेव  
नौ सह यज्ञियमिति यदमुष्या यज्ञियमासीत्तदस्यामदधात्  
ऊषा अभवन् यदस्या यज्ञियमासीत्तदमुष्यामदधात्तददश्चन्द्रमसि  
कृष्णमूषान्निवपन्नदो ध्यायेद्द्यावापृथिव्योरेव यज्ञियेऽग्निं चिनुतेऽयं  
सो अग्निरिति विश्वामित्रस्य (१६)

सूक्तं भवत्येतेन वै विश्वामित्रोऽग्नेः प्रियं धामावारुन्ध्याग्नेरेवैतेन  
प्रियं धामाव रुन्धे छन्दोभिर्वै देवाः सुवर्गं लोकमायश्चतस्रः  
प्राचीरुपं दधाति चत्वारि छन्दांसि छन्दोभिरेव तद्यजमानः  
सुवर्गं लोकमेति तेषां सुवर्गं लोकं यतां दिशः समंवीयन्त ते  
द्वे पुरस्तात्समीची उपादधत् द्वे (१७)

पश्चात्समीची ताभिर्वै ते दिशोऽदृहन् यद्वे पुरस्तात्समीची  
उपदधाति द्वे पश्चात्समीची दिशां विधृत्या अथो पशवो वै  
छन्दांसि पशूनेवास्मै समीची दधात्यष्टावुपं दधात्यष्टाक्षरा  
गायत्री गायत्रीऽग्निर्यावानेवाग्निस्तं चिनुतेऽष्टावुपं दधात्यष्टाक्षरा  
गायत्री गायत्री सुवर्गं लोकमञ्जसा वेद सुवर्गस्य लोकस्य (१८)

प्रज्ञात्यै त्रयोदश लोकम्पृणा उपं दधात्येकविंशतिः सं पद्यन्ते  
प्रतिष्ठा वा एकविंशः प्रतिष्ठा गार्हपत्य एकविंशस्यैव प्रतिष्ठा  
गार्हपत्यमनु प्रति तिष्ठति प्रत्यग्निं चिक्यान्तिष्ठति य एवं वेद

पञ्चचितीकं चिन्वीत प्रथमं चिन्वानः पाङ्क्तो यज्ञः पाङ्क्तः पशवो  
यज्ञमेव पशूनव रुन्धे त्रिचितीकं चिन्वीत द्वितीयं चिन्वानस्त्रय इमे  
लोका एष्वेव लोकेषु (१९)

प्रति तिष्ठत्येकचितीकं चिन्वीत तृतीयं चिन्वान एकधा  
वै सुवर्गो लोक एकवृत्तैव सुवर्गं लोकमेति पुरीषेणाभ्यूहति  
तस्मान्मासेनास्थि छुन्नं न दुश्चर्मा भवति य एवं वेद पञ्च  
चितयो भवन्ति पञ्चभिः पुरीषैरभ्यूहति दश सं पद्यन्ते दशाक्षरा  
विराडन्न विराड्विराज्येवान्नाद्ये प्रति तिष्ठति॥ (२०)

अद्ध्यवसाययति ह्येतद्विश्वमित्रस्यादधत् द्वे लोकस्य लोकेषु सप्तचत्वारिंशच्च॥७॥ — [३]

वि वा एतौ द्विषाते यश्च पुराग्निर्यश्चोखायासे समितमिति  
चतसृभिः सं नि वपति चत्वारि छन्दासि छन्दासि खलु वा  
अग्नेः प्रिया तनूः प्रिययैवैनौ तनुवा स शास्ति समितमित्याह  
तस्माद्ब्रह्मणा क्षत्रं समेति यत्सन्त्युष्यं विहरति तस्माद्ब्रह्मणा क्षत्रं  
व्येत्यृतुभिर्- (२१)

वा एतं दीक्षयन्ति स ऋतुभिरेव विमुच्यो मातेव पुत्रं पृथिवी  
पुरीष्यमित्याहर्तुभिरेवैनं दीक्षयित्वर्तुभिर्वि मुञ्चति वैश्वानर्या  
शिक्षमा दत्ते स्वदयत्येवैनन्नैर्ऋतीः कृष्णास्तिस्त्रस्तुषपक्वा भवन्ति  
निर्ऋत्यै वा एतद्भागधेयं यत्तुषा निर्ऋत्यै रूपं कृष्णं रूपेणैव  
निर्ऋतिं निरवदयत इमां दिशं यन्त्येषा (२२)



वै निर्ऋत्यै दिग्स्वायामेव दिशि निर्ऋतिं निरवदयते स्वकृतं  
 इरिणं उपं दधाति प्रदरे वैतद्वै निर्ऋत्या आयतनं३ स्व एवाऽऽ-  
 यतने निर्ऋतिं निरवदयते शिष्यमभ्युपं दधाति नैर्ऋतो वै पाशः  
 साक्षादेवैनं निर्ऋतिपाशान्मुञ्चति तिस्र उपं दधाति त्रेधाविहितो वै  
 पुरुषो यावानेव पुरुषस्तस्मान्निर्ऋतिमव यजते पराचीरुपं (२३)

दधाति पराचीमेवास्मान्निर्ऋतिं प्र णुदतेऽप्रतीक्षमा  
 यन्ति निर्ऋत्या अन्तर्हित्यै मार्जयित्वोपं तिष्ठन्ते मेध्यत्वाय  
 गार्हपत्यमुपं तिष्ठन्ते निर्ऋतिलोक एव चरित्वा पूता  
 देवलोकमुपावर्तन्त एकयोपं तिष्ठन्त एकधैव यजमाने वीर्यं दधति  
 निवेशनः सङ्गमनो वसूनामित्याह प्रजा वै पशवो वसु प्रजयैवेनं  
 पशुभिः समर्धयन्ति॥ (२४)

ऋतुभिरेषा पराचीरुपाष्टाचत्वारिंशच्च॥४॥ [४]

पुरुषमात्रेण वि मिमीते यज्ञेन वै पुरुषः सम्मितो यज्ञपुरुषैवेनं  
 वि मिमीते यावान्पुरुष ऊर्ध्वबाहुस्तावान्भवत्येतावद्वै पुरुषे वीर्यं  
 वीर्येणैवेनं वि मिमीते पक्षी भवति न ह्यपक्षः पतितुमर्हत्यरत्निना  
 पक्षौ द्राघीयांसौ भवतस्तस्मात्पक्षप्रवयांसि वयांसि  
 व्याममात्रौ पक्षौ च पुच्छं च भवत्येतावद्वै पुरुषे वीर्यं (२५)

वीर्यसम्मितो वेणुना वि मिमीत आग्नेयो वै वेणुः सयोनित्वाय  
 यजुषा युनक्ति यजुषा कृषति व्यावृत्यै षड्भवेन कृषति षड्वा

ऋतव॑ ऋतुभि॑रेवैन॑ कृषति॑ यद्वा॑दशग॒वेन॑ संव॒त्सरेणै॒वेयं॑ वा  
अ॒ग्नेर॑तिदा॒हाद॑बिभे॒त्सैतद्वि॑गुणम॑पश्यत्कृष्टं॑ चाकृष्टं॑ च॒ ततो॑ वा इ॒मां  
नात्य॑दह॒द्यत्कृष्टं॑ चाकृष्टं॑ च॒ (२६)

भव॑त्य॒स्या अन॑तिदाहाय॒ द्विगु॑णं त्वा अ॒ग्निमु॑द्यन्तुम॒र्हतीत्या॑हु॒र्यत्  
चाकृष्टं॑ च॒ भव॑त्य॒ग्नेरु॑द्यत्या ए॒ताव॑न्तो॒ वै प॒शवो॑ द्वि॒पाद॑श्च  
चतु॑ष्पादश्च॒ तान् यत्प्राच॑ उ॒त्सृजे॑द्बु॒द्रायापि॑ दध्या॒द्यदक्षि॑णा  
पि॒तृभ्यो॑ नि धु॒वेद्यत्प्र॑तीचो॒ रक्षा॑सि ह॒न्युरु॑दीच॒ उ॒त्सृज॑त्येषा॒ वै  
दे॒वमनु॑ष्याणा॑ शान्ता॒ दिक् (२७)

तामे॒वैनान॑नू॒त्सृज॑त्यथो॒ खल्वि॑मां दि॒शमु॑त्सृज॒त्यसौ॑ वा  
आ॒दित्यः॑ प्रा॒णः प्रा॒णमे॒वैनान॑नू॒त्सृज॑ति दक्षि॒णा प॒र्याव॑र्तन्ते॒ स्वमे॒व  
वीर्य॑मनु॒ प॒र्याव॑र्तन्ते॒ तस्मा॑द्वक्षि॒णोऽर्धं॑ आ॒त्मनो॑ वीर्या॑वत्तरोऽथो॒  
आ॒दित्यस्यै॒वावृ॑तमनु॒ प॒र्याव॑र्तन्ते॒ तस्मा॑त्परा॑श्चः प॒शवो॑ वि ति॑ष्ठन्ते  
प्र॒त्यं च॒ आ व॑र्तन्ते ति॒स्रस्ति॑स्रः सी॒ताः (२८)

कृषति॑ त्रि॒वृत॑मे॒व य॑ज्ञ॒मुखे॑ वि या॑तय॒त्योष॑धीर्वपति॒  
ब्रह्म॑णान्नमव॑ रुन्धे॒ऽर्केऽर्क॑श्ची॒यते॑ चतु॒र्दशभि॑र्वपति॒ सप्त  
ग्रा॒म्या ओष॑धयः सप्तार॒ण्या उ॒भयी॑षामव॑रुद्ध्या॒ अन्न॑स्यान्नस्य  
वप॒त्यन्न॑स्यान्नस्याव॑रुद्ध्यै कृष्टे व॑पति कृष्टे ह्योष॑धयः प्र॒ति॒तिष्ठ॑न्त्यनु॒सीत॑  
व॑पति॒ प्रजा॑त्यै द्वाद॒शसु॑ सी॒तासु॑ वपति॒ द्वाद॑श॒ मासाः॑ संव॒त्सरः॑  
संव॑त्सरेणै॒वास्मा॑ अन्नं॑ पचति॒ यद॑ग्नि॒चि- (२९)

दनवरुद्धस्याश्जीयादवरुद्धेन व्यृद्धेत ये वनस्पतीनां  
 फलग्रहयस्तानिध्मेऽपि प्रोक्षेदनवरुद्धस्यावरुद्धौ दिग्भ्यो  
 लोष्टान्त्समस्यति दिशामेव वीर्यमवरुध्य दिशां वीर्येऽग्निं चिनुते  
 यं द्विष्याद्यत्र स स्यात्तस्यै दिशो लोष्टमा हरेदिषमूर्जमहमित आ  
 दद इतीषमेवोर्जं तस्यै दिशोऽव रुन्धे क्षोधुको भवति यस्तस्यां  
 दिशि भवत्युत्तरवेदिमुप वपत्युत्तरवेद्याः ह्यग्निश्चीयतेऽथो पशवो  
 वा उत्तरवेदिः पशून्वाव रुन्धेऽथो यज्ञपुरुषोऽनन्तरित्यै॥ (३०)

च भवत्येतावद्वै पुरुषं वीर्यं यत्कृष्टञ्चाकृष्टं च दिग्भीतां अग्निचिदव पञ्चविंशतिश्च॥६॥—[५]

अग्ने तव श्रवो वय इति सिकता नि वपत्येतद्वा अग्नेर्वैश्वानरस्य  
 सूक्तं सूक्तेनैव वैश्वानरमव रुन्धे षड्भिर्नि वपति षड्वा ऋतवः  
 संवत्सरः संवत्सरोऽग्निर्वैश्वानरः साक्षादेव वैश्वानरमव रुन्धे समुद्रं  
 वै नामैतच्छन्दः समुद्रमनु प्रजाः प्र जायन्ते यदेतेन सिकता  
 निवपति प्रजानां प्रजननायेन्द्रो (३१)

वृत्राय वज्रं प्राहरत्स त्रेधा व्यभवत्स्फ्यस्तृतीयं रथस्तृतीयं  
 यूपस्तृतीयं येऽन्तःशरा अशीर्यन्त ताः शर्करा अभवन्तच्छर्कराणां  
 शर्करत्वं वज्रो वै शर्कराः पशुरग्निर्यच्छर्कराभिरग्निं परिमिनोति  
 वज्रेणैवास्मै पशून्परि गृह्णाति तस्माद्वज्रेण पशवः परिगृहीतास्तस्मात्स्थ  
 नोप हरते त्रिसप्ताभिः पशुकामस्य (३२)

परि मिनुयात्सप्त वै शीर्षण्याः प्राणाः प्राणाः पशवः

प्राणैरेवास्मै पशूनव रुन्धे त्रिणवाभिर्भ्रातृव्यवतस्त्रिवृतमेव वज्रं  
सम्भृत्य भ्रातृव्याय प्र हरति स्तृत्या अपरिमिताभिः परि  
मिन्यादपरिमितस्यावरुद्ध्ये यं कामयेतापशुः स्यादित्यपरिमित्य  
तस्य शर्कराः सिकता व्यूहेदपरिगृहीत एवास्य विषूचीनः रेतः  
परां सिञ्चत्यपशुरेव भवति (३३)

यं कामयेत पशुमान्त्स्यादिति परिमित्य तस्य शर्कराः सिकता  
व्यूहेत्परिगृहीत एवास्मै समीचीनः रेतः सिञ्चति पशुमानेव भवति  
सौम्या व्यूहति सोमो वै रेतोधा रेत एव तद्धधाति गायत्रिया  
ब्राह्मणस्य गायत्रो हि ब्राह्मणस्त्रिष्टुभा राजन्यस्य त्रैष्टुभो हि राजन्यः  
शयुं बार्हस्पत्यं मेधो नोपानमत्सोऽग्निं प्राविशत्- (३४)

सोऽग्नेः कृष्णो रूपं कृत्वोदायत् सोऽश्वं प्राविशत्सो-  
ऽश्वस्यावान्तरशफोऽभवद्यदश्वमाक्रमयति य एव मेधोऽश्वं  
प्राविशत्तमेवाव रुन्धे प्रजापतिनाग्निश्चैतव्य इत्याहुः प्राजापत्यो-  
ऽश्वो यदश्वमाक्रमयति प्रजापतिनैवाग्निं चिनुते पुष्करपर्णमुप  
दधाति योनिर्वा अग्नेः पुष्करपर्णः सयोनिमेवाग्निं चिनुतेऽपां  
पृष्ठमसीत्युप दधात्यपां वा एतत्पृष्ठं यत्पुष्करपर्णः रूपेणैवैनदुप  
दधाति॥ (३५)

इन्द्रः पशुकामस्य भवत्यविशत्सयोनिं विशतिश्च॥५॥

[६]

ब्रह्म जज्ञानमिति रुक्ममुप दधाति ब्रह्ममुखा वै प्रजापतिः  
प्रजा असृजत् ब्रह्ममुखा एव तत्प्रजा यजमानः सृजते ब्रह्म

जज्ञानमित्याह तस्माद्ब्राह्मणो मुख्यो मुख्यो भवति य एवं वेद  
ब्रह्मवादिनो वदन्ति न पृथिव्यां नान्तरिक्षे न दिव्यग्निश्चेतव्यं  
इति यत्पृथिव्यां चिन्वीत पृथिवीं शुचाऽर्पयेन्नौषधयो न  
वनस्पतयः (३६)

प्र जायेरन् यदन्तरिक्षे चिन्वीतान्तरिक्षं शुचाऽर्पयेन्न  
वयांसि प्र जायेरन् यद्विवि चिन्वीत दिवं शुचाऽर्पयेन्न  
पर्जन्यो वर्षेद्रुक्कमुप दधात्यमृतं वै हिरण्यममृतं एवाग्निं चिनुते  
प्रजात्यै हिरण्यं पुरुषमुप दधाति यजमानलोकस्य विधृत्यै  
यदिष्टकाया आतृण्णमनूपदध्यात्पशूनां च यजमानस्य च प्राणमपि  
दध्यादक्षिणतः (३७)

प्राञ्चमुप दधाति दाधारं यजमानलोकं न पशूनां च  
यजमानस्य च प्राणमपि दधात्यथो खल्विष्टकाया आतृण्णमनूपं  
दधाति प्राणानामुत्सृष्ट्यै द्रप्सश्चस्कन्देत्यभि मृशति होत्रास्वेवैनं  
प्रतिष्ठापयति सुचावुप दधात्याज्यस्य पूर्णां कार्ष्ण्यमयीं दध्नः  
पूर्णांमौदुम्बरीमियं वै कार्ष्ण्यमय्यसावौदुम्बरीमे एवोप धत्ते (३८)

तूष्णीमुप दधाति न हीमे यजुषाऽऽमुमर्हति दक्षिणां  
कार्ष्ण्यमयीमुत्तरामौदुम्बरीं तस्मादस्या असावुत्तराज्यस्य  
पूर्णां कार्ष्ण्यमयीं वज्रो वा आज्यं वज्रः कार्ष्ण्यो वज्रेणैव  
यज्ञस्य दक्षिणतो रक्षास्यप हन्ति दध्नः पूर्णांमौदुम्बरीं पशवो

वै दध्यूर्गुदुम्बरः पशुष्वेवोर्जं दधाति पूर्णे उपं दधाति पूर्णे  
एवैन- (३९)

ममुष्मिल्लोक उपं तिष्ठेते विराज्यग्निश्चेतव्यं इत्याहुः सुग्वै  
विराज्यथ्सुचावुपदधाति विराज्येवाग्निं चिनुते यज्ञमुखेयं यज्ञमुखे  
वै क्रियमाणे यज्ञं रक्षांसि जिघांसन्ति यज्ञमुखं  
रुक्मो यद्रुक्मं व्याघारयति यज्ञमुखादेव रक्षांस्यपं हन्ति  
पञ्चभिर्व्याघारयति पाङ्क्तो यज्ञो यावानेव यज्ञस्तस्माद्रक्षांस्यपं  
हन्त्यक्षण्या व्याघारयति तस्मादक्षण्या पशवोऽङ्गानि प्र हरन्ति  
प्रतिष्ठित्यै॥ (४०)

वनस्पतयो दक्षिणतो धत्त एनं तस्मादक्षण्या पञ्च च॥५॥ [७]

स्वयमातृणामुपं दधातीयं वै स्वयमातृणेमामेवोपं  
धत्तेऽश्वमुपं घ्रापयति प्राणमेवास्यां दधात्यथो प्राजापत्यो  
वा अश्वः प्रजापतिनैवाग्निं चिनुते प्रथमेष्टकोपधीयमाना  
पशूनां च यज्ञमानस्य च प्राणमपि दधाति स्वयमातृणा  
भवति प्राणानामुत्सृष्ट्या अथो सुवर्गस्य लोकस्यानुख्यात्या  
अग्नावग्निश्चेतव्यं इत्याहुरेष वा (४१)

अग्निर्वैश्वानरो यद्व्राह्मणस्तस्मै प्रथमामिष्टकां यजुष्कृतां प्र  
यच्छेत्तां ब्राह्मणश्चोपं दध्यातामग्नावेव तदग्निं चिनुत ईश्वरो वा  
एष आर्तिमार्तोऽर्योऽविद्वानिष्टकामुपदधाति त्रीन् वरान्दद्यात् त्रयो

वै प्राणाः प्राणानां स्पृत्यै द्वावेव देयौ द्वौ हि प्राणावेकं एव देय  
एको हि प्राणः पशुर्- (४२)

वा एष यदग्निर्न खलु वै पशव आरयवसे रमन्ते दूर्वेष्टकामुपं  
दधाति पशूनां धृत्यै द्वाभ्यां प्रतिष्ठित्यै काण्डात्काण्डात्प्ररोहन्तीत्याह  
काण्डेनकाण्डेन ह्येषा प्रतितिष्ठत्येवा नो दूर्वे प्र तनु सहस्रेण शतेन  
चेत्याह साहस्रः प्रजापतिः प्रजापतेराप्त्यै देवलक्ष्मं वै त्र्यालिखिता  
तामुत्तरलक्ष्माणं देवा उपादधताधरलक्ष्माणमसुरा यं (४३)

कामयेत वसीयान्स्थ्यादित्युत्तरलक्ष्माणं तस्योपं दध्याद्वसीयानेव  
भवति यं कामयेत पापीयान्स्थ्यादित्यधरलक्ष्माणं तस्योपं  
दध्यादसुरयोनिमेवैनमनु परा भावयति पापीयान्भवति  
त्र्यालिखिता भवतीमे वै लोकास्त्र्यालिखितैभ्य एव लोकेभ्यो  
भ्रातृव्यमन्तरेत्यङ्गिरसः सुवर्गं लोकं यतः पुरोडाशः कूर्मो भूत्वाऽनु  
प्रासर्पद् (४४)

यत्कूर्ममुपदधाति यथा क्षेत्रविदञ्जसा नयत्येवमेवैनं कूर्मः  
सुवर्गं लोकमञ्जसा नयति मेधो वा एष पशूनां यत्कूर्मो  
यत्कूर्ममुपदधाति स्वमेव मेधं पश्यन्तः पशव उप तिष्ठन्ते श्मशानं  
वा एतत्क्रियते यन्मृतानां पशूनां शीर्षाण्युपधीयन्ते यज्जीवन्तं  
कूर्ममुपदधाति तेनाश्मशानचिद्वास्तव्यो वा एष यत् (४५)

कूर्मो मधु वाता ऋतायत इति दध्ना मधुमिश्रेणाभ्यनक्ति

स्वदयत्येवैनं ग्राम्यं वा एतदन्नं यद्वध्यारण्यं मधु यद्वध्रा  
मधुमिश्रेणाभ्यनक्त्युभयस्यावरुद्धौ मही द्यौः पृथिवी च न  
इत्याहाऽऽभ्यामेवैनमुभयतः परि गृह्णाति प्राश्चमुपं दधाति सुवर्गस्य  
लोकस्य समष्ट्यै पुरस्तात्प्रत्यश्चमुपं दधाति तस्मात् (४६)

पुरस्तात्प्रत्यश्चः पशवो मेधमुपं तिष्ठन्ते यो वा अपंनाभिमुग्निं  
चिनुते यजमानस्य नाभिमनु प्र विंशति स एनमीश्वरो  
हिंसितोरूलूखलमुपं दधात्येषा वा अग्नेर्नाभिः सनाभिमेवाग्निं  
चिनुतेऽहिंसाया औदुम्बरं भवत्यूर्वा उदुम्बर ऊर्जमेवाव रुन्धे  
मध्यत उपं दधाति मध्यत एवास्मा ऊर्जं दधाति तस्मान्मध्यत  
ऊर्जा भुञ्जत इयं द्रवति प्रजापतिना यज्ञमुखेन सम्मितमव  
हन्त्यन्नमेवाकर्वैष्णव्यर्चोपं दधाति विष्णुर्वै यज्ञो वैष्णवा वनस्पतयो  
यज्ञ एव यज्ञं प्रतिष्ठापयति॥ (४७)

एष वै पशुर्यमसर्पदिष यत्तस्मात्तस्मात्स्मत्तविंशतिश्च॥७॥ [८]

एषां वा एतल्लोकानां ज्योतिः सम्भृतं यदुखा यदुखामुपदधात्येभ्य  
एव लोकेभ्यो ज्योतिरव रुन्धे मध्यत उपं दधाति मध्यत एवास्मै  
ज्योतिर्दधाति तस्मान्मध्यतो ज्योतिरुपास्महे सिकताभिः  
पूरयत्येतद्वा अग्नेर्वैश्वानरस्य रूपं रूपेणैव वैश्वानरमव रुन्धे यं  
कामयेत क्षोधुकः स्यादित्यूनां तस्योपं (४८)

दध्यात्क्षोधुक एव भवति यं कामयेतानुपदस्यदन्नमद्यादिति



पूर्णां तस्योपं दध्यादनुपदस्यदेवान्नमत्ति सहस्रं वै प्रति पुरुषः  
 पशूनां यच्छति सहस्रमन्ये पशवो मध्ये पुरुषशीर्षमुपं दधाति  
 सवीर्यत्वायोखायामपि दधाति प्रतिष्ठामेवैनद्रमयति व्यृद्धं वा  
 एतत्प्राणैरमेध्यं यत्पुरुषशीर्षममृतं खलु वै प्राणा - (४९)

अमृतं हिरण्यं प्राणेषु हिरण्यशल्कान्प्रत्यस्यति  
 प्रतिष्ठामेवैनद्रमयित्वा प्राणैः समर्धयति दध्ना मधुमिश्रेण  
 पूरयति मध्व्योऽसानीति श्रुतातङ्कोन मेध्यत्वाय ग्राम्यं वा  
 एतदन्नं यद्दध्यारण्यं मधु यद्दध्ना मधुमिश्रेण पूरयत्युभयस्यावरुद्धौ  
 पशुशीर्षाण्युपं दधाति पशवो वै पशुशीर्षाणि पशूनेवाव रुन्धे यं  
 कामयेतापशुः स्यादिति (५०)

विषूचीनानि तस्योपं दध्याद्विषूच एवास्मात्पशून्दधात्यपशुरेव  
 भवति यं कामयेत पशुमान्स्यादिति समीचीनानि तस्योपं  
 दध्यात्समीच एवास्मै पशून्दधाति पशुमानेव भवति  
 पुरस्तात्प्रतीचीनमश्वस्योपं दधाति पश्चात्प्राचीनमृषभस्यापशवो वा  
 अन्ये गोअश्वेभ्यः पशवो गोअश्वानेवास्मै समीचो दधात्येतावन्तो  
 वै पशवो (५१)

द्विपादश्च चतुष्पादश्च तान् वा एतदग्नौ प्र दधाति  
 यत्पशुशीर्षाण्युपदधात्यमुमारण्यमनु ते दिशामीत्याह ग्राम्येभ्य  
 एव पशुभ्य आरण्यान्पशूञ्छुचमनूत्सृजति तस्मात्समावत्पशूनां  
 प्रजायमानानामारण्याः पशवः कनीयाः सः शुचा ह्यृताः

सर्पशीर्षमुपं दधाति यैव सर्पे त्विषिस्तामेवाव रुन्धे (५२)

यथ्समीचीनं पशुशीर्षैरुपदध्याद्ग्राम्यान्पशून्दंशुकाः  
स्युर्यद्विषूचीनमारुण्यान् यजुरेव वेदेदव तां त्विषिं रुन्धे या  
सर्पे न ग्राम्यान्पशून् हिनस्ति नाऽऽरुण्यानथो खलूपधेयमेव  
यदुपदधाति तेन तां त्विषिमव रुन्धे या सर्पे यद्यजुर्वदति तेन  
शान्तम्॥ (५३)

ऊनान्तस्योपं प्राणाः स्यादिति वै पशवो रुन्धे चतुश्चत्वारिंशच्च॥६॥ [९]

पशुर्वा एष यदग्निर्योनिः खलु वा एषा पशोर्वि क्रियते  
यत्प्राचीनमैष्टकाद्यजुः क्रियते रेतोऽपस्या अपस्या उपं दधाति  
योनावेव रेतो दधाति पञ्चोपं दधाति पाङ्गाः पशवः पशूनेवास्मै  
प्र जनयति पञ्च दक्षिणतो वज्रो वा अपस्या वज्रेणैव यज्ञस्य  
दक्षिणतो रक्षाऽस्यपं हन्ति पञ्च पश्चात् (५४)

प्राचीरुपं दधाति पश्चाद्वै प्राचीनं रेतो धीयते  
पश्चादेवास्मै प्राचीनं रेतो दधाति पञ्च पुरस्तात्प्रतीचीरुपं  
दधाति पञ्च पश्चात्प्राचीस्तस्मात्प्राचीनं रेतो धीयते  
प्रतीचीः प्रजा जायन्ते पञ्चोत्तरतश्छन्दस्याः पशवो वै  
छन्दस्याः पशूनेव प्रजातान्स्वमायतनमभि पर्यूहत इयं वा  
अग्नेरतिदाहादबिभेथ्सैता - (५५)

अपस्या अपश्यत्ता उपाधत्त ततो वा इमां नात्यदहृद्यदपस्या

उप॒दधा॑त्यस्या अन॑तिदाहायो॒वाचं॑ हे॒यम॑द॒दि॒त्स ब्र॒ह्म॒णा॒न्नं॑ य॒स्यै॒ता  
उ॒प॒धी॒यान्तै॑ य उ॒ चै॒ना ए॒वं वे॒द॒दि॒ति प्रा॒णभृ॑त॒ उप॑ दधाति॒ रेत॑स्ये॒व  
प्रा॒णान्द॑धाति॒ तस्मा॑द्व॒दन्प्रा॒णन्पश्य॑ञ्छृ॒ण्वन्प॒शुर्जा॑यतेऽयं पुरो (५६)

भुव॒ इति॑ पु॒रस्ता॒दुप॑ दधाति प्रा॒णमे॒वैताभि॑र्दा॒धारा॒यं  
दक्षि॑णा वि॒श्वक॑र्मेति॒ दक्षि॑ण॒तो मन॑ ए॒वैताभि॑र्दा॒धारा॒यं  
प॒श्चाद्वि॒श्वव्य॑चा॒ इति॑ प॒श्चाच्चक्षु॑रे॒वैताभि॑र्दा॒धारे॒दमु॑त्त॒रात्सु॒वरि॑त्युत्तर॒तः  
श्रोत्र॑मे॒वैताभि॑र्दा॒धारे॒यमु॑परि॒ मति॑रित्यु॒परि॑ष्टा॒द्वाच॑मे॒वैताभि॑र्दा॒धार॒  
दश॑द॒शोप॑ दधाति॒ सवी॑र्य॒त्वाया॑क्ष्णयो- (५७)

पं दधाति॒ तस्मा॑दक्ष्ण॒या प॒शवो॑ऽङ्गानि॒ प्र ह॑रन्ति॒ प्रति॑ष्ठित्यै॒  
याः प्रा॒चीस्ताभि॑र्वसि॒ष्ठ आ॒ध्रो॒द्या दक्षि॑णा ताभि॑र्भ॒रद्वा॒जो  
याः प्र॒तीची॑स्ताभि॑र्वि॒श्वामि॑त्रो॒ या उ॒दीची॑स्ताभि॑र्ज॒मद॑ग्निर्या॒  
ऊ॒र्ध्वास्ताभि॑र्वि॒श्वक॑र्मा॒ य ए॒वमे॒तासा॑मृद्धिं वे॒दध्रो॑त्ये॒व य आ॑सामे॒वं  
ब॒न्धुतां॑ वे॒द ब॒न्धुमा॑न्भवति॒ य आ॑सामे॒वं क्लृ॑प्तिं वे॒द क॒ल्प॑ते- (५८)

ऽस्मै॒ य आ॑सामे॒वमा॑यत॒नं वे॒दाऽऽय॑त॒नवान्भव॑ति॒ य आ॑सामे॒वं  
प्रति॑ष्ठां वे॒द प्र॒त्ये॒व ति॑ष्ठति प्रा॒णभृ॑त॒ उप॒धाय॑ सं॒यत॑ उप॑ दधाति॒  
प्रा॒णाने॒वास्मि॑न्धित्वा सं॒यद्भिः॑ सं॒ यच्छ॑ति॒ तत्सं॑यता॒ सं॒यत्त्वम॑थो॒  
प्रा॒ण ए॒वापा॑नं दधाति॒ तस्मा॑त्प्रा॒णापा॑नौ सं॒ चर॑तो॒ विषू॑चीरु॒पं दधा॑ति॒  
तस्मा॑द्विष्व॑श्चौ प्रा॒णापा॑नौ यद्वा अ॒ग्नेर॑सं॒ यत॑- (५९)

मसु॑व॒र्ग्यम॑स्य॒ तत्सु॑व॒र्ग्योऽग्निर्य॑त्सं॒ यत॑ उप॒दधा॑ति॒  
समे॒वैनं॑ यच्छति॒ सु॒व॒र्ग्यमे॒वाक॒स्यवि॑र्वयः॒ कृ॒तम॑या॒नामि॒त्याह॑

वयोभिरेवायानव रुन्धेऽयैर्वयांसि सर्वतो वायुमतीर्भवन्ति  
तस्माद्यः सर्वतः पवते॥ (६०)

पश्चादेताः पुरोऽक्षण्या कल्पतेऽसं यत् पञ्चत्रिंशच्च॥७॥ [१०]

गायत्री त्रिष्टुब्जगत्यनुष्टुप्पङ्क्ता सह। बृहत्युष्णिहा  
ककुथसूचीभिः शिम्यन्तु त्वा। द्विपदा या चतुष्पदा त्रिपदा  
या च षट्पदा सछन्दा या च विच्छन्दाः सूचीभिः शिम्यन्तु  
त्वा। महानाग्नी रेवतयो विश्वा आशाः प्रसूवरीः। मेघ्या विद्युतो  
वाचः सूचीभिः शिम्यन्तु त्वा। रजता हरिणीः सीसा युजो  
युज्यन्ते कर्मभिः। अश्वस्य वाजिनस्त्वचि सूचीभिः शिम्यन्तु त्वा।  
नारी- (६१)

स्ते पलयो लोम वि चिन्वन्तु मनीषया। देवानां पत्नीर्दिशः  
सूचीभिः शिम्यन्तु त्वा। कुविदङ्ग यवमन्तो यव चिद्यथा दान्त्यनुपूर्वं  
वियूय। इहेहैषां कृणुत भोजनानि ये बर्हिषो नमोवृक्तिं न  
जग्मुः॥ (६२)

नारीस्त्रिंशच्च॥२॥ [११]

कस्त्वा छति कस्त्वा वि शास्ति कस्ते गात्राणि शिम्यति। क  
उ ते शमिता कविः। ऋतवस्त ऋतुधा परुः शमितारो वि शासतु।  
संवत्सरस्य धायंसा शिमीभिः शिम्यन्तु त्वा। दैव्या अध्वर्यवस्त्वा  
छन्तु वि च शासतु। गात्राणि पर्वशस्ते शिमाः कृण्वन्तु शिम्यन्तः।

अ॒र्ध॒मा॒साः प॒रू॑षि ते॒ मा॒सा॑श्छन्तु॒ शि॒म्यन्तः॑ । अ॒हो॒रा॒त्राणि॑ म॒रुतो॒  
वि॒लि॒ष्ट॑ (६३)

सू॒द॒यन्तु॑ ते । पृ॒थि॒वी ते॒ऽन्त॒रि॒क्षेण॑ वा॒यु॒श्छि॒द्रं भि॑षज्यतु ।  
द्यौ॒स्ते॒ नक्ष॑त्रैः स॒ह रू॒पं कृ॑णोतु साधु॒या । शं ते॒ परे॑भ्यो॒ गात्रे॑भ्यः  
श॒म॒स्त्वव॑रेभ्यः । श॒म॒स्थ॒भ्यो म॒ज्ज॒भ्यः श॒मु ते॒ त॒नुवै॑ भुवत् ॥ (६४)

वि॒लि॒ष्ट॒त्रि॒ंशच्च॑ ॥ २ ॥ [१२]

विष्णु॑मुखा॒ अन्न॑पते॒ याव॑ती॒ वि वै पु॑रुषमा॒त्रेणा॒ग्ने तव॑ श्रवो॒ ब्रह्म॑ ज॒ज्ञान॑ स्व॒यमा॑तृ॒णामे॒षां वै  
प॒शुर्गा॑य॒त्री क॒स्त्वा द्वा॑द॒श ॥ १२ ॥

विष्णु॑मुखा॒ अप॑चितिमा॒न् वि वा ए॒ताव॑ग्ने॒ तवं स्व॑यमातृ॒णां वि॑षू॒चीना॑नि॒ गाय॑त्री चतुः॒ षष्टिः ॥ ६४ ॥

विष्णु॑मुखास्त॒नुवै॑ भुवत् ॥

हरिः ॐ ॥

॥ कृष्ण-यजुर्वेदीय-तैत्तिरीय-संहितायां पञ्चमकाण्डे द्वितीयः प्रश्नः  
समाप्तः ॥ ५-२ ॥

## ॥तृतीयः प्रश्नः॥

### ॥तैत्तिरीयसंहितायां पञ्चमकाण्डे तृतीयः प्रश्नः॥

उ॒थ्स॒न्नय॒ज्ञो वा ए॒ष यद॒ग्निः किं वा॒हैत॒स्य क्रि॒यते किं वा॒ न  
यद्वै य॒ज्ञस्य॑ क्रि॒यमा॑णस्यान्त॒र्यन्ति॑ पू॒र्यति॑ वा अ॒स्य तदा॑श्चिनीरुपं  
दधात्य॒श्विनौ वै दे॒वानां॑ भिष॒जौ ताभ्या॑मे॒वास्मै भेष॒जं क॑रोति॒ पञ्चोपं॑  
दधाति॒ पाङ्क्तो॑ य॒ज्ञो यावा॑ने॒व य॒ज्ञस्तस्मै॑ भेष॒जं क॑रोत्यृत॒व्या उपं॑  
दधात्यृत॒नां क्लृ॑प्त्यै (१)

पञ्चोपं दधाति पञ्च वा ऋ॒तवो॑ याव॑न्त ए॒वर्तव॑स्तान्कल्पयति  
समा॒नप्र॑भृतयो भवन्ति समा॒नोद॑र्कास्तस्मा॑त्समा॒ना ऋ॒तव॑ एकै॒न  
पदे॑न॒ व्याव॑र्तन्ते तस्मा॑द्दृ॒तवो॑ व्याव॑र्तन्ते प्राण॒भृत॑ उपं दधात्यृत॒ष्वेव  
प्राणा॑न्दधाति तस्मा॑त्समा॒नाः सन्त॑ ऋ॒तवो॑ न जी॒र्यन्त्यथो॑ प्र  
ज॑नयत्ये॒वैना॑नेष वै वा॒युर्य॑त्प्रा॒णो यदृ॑त॒व्या उप॑धा॒य प्राण॑भृत - (२)

उप॒दधा॑ति॒ तस्मा॑त्स॒र्वानृ॑तू॒ननु॑ वा॒युरा व॑रीवर्ति वृष्टि॒सनी॑रुपं  
दधाति॒ वृष्टि॑मे॒वाव॑ रुन्धे यदै॒कधो॑प॒दध्या॑देक॒मृतुं व॑र्षेदनुपरि॒हारं  
सा॑दयति॒ तस्मा॑त्स॒र्वानृ॑तू॒न् व॑र्षति॒ यत्प्रा॑णभृत उप॒धा॒य  
वृष्टि॑सनी॒रुप॑दधाति॒ तस्मा॑द्वा॒युप्र॑च्युता दि॒वो वृष्टि॑री॒र्ते प॑शवो वै  
व॑य॒स्यां ना॑ना॒मन॑सः खलु॒ वै प॑शवो॒ ना॒नाव॑रता॒स्तोऽप॑ ए॒वाभि॑  
सम॑नसो (३)

यं का॒मये॑ताप॒शुः स्या॒दिति॑ वय॒स्यास्त॑स्योप॒धाया॑प॒स्यां

उप॑ दध्या॒दसं॑ज्ञानमे॒वासमै॑ प॒शुभिः॑ करोत्यप॒शुरे॒व भ॑वति॒ यं  
 का॒मये॑त प॒शुमा॒न्ध्या॒दित्य॑प॒स्यास्त॑स्यो॒प॒धाय॑ वय॒स्या उप॑  
 दध्या॒त्सं॑ज्ञानमे॒वासमै॑ प॒शुभिः॑ करोति प॒शुमा॒ने॒व भ॑वति॒ चत॑स्रः  
 पु॒रस्ता॒दुप॑ दधाति॒ तस्मा॑च्च॒त्वारि॒ चक्षु॑षो रू॒पाणि॒ द्वे शु॒क्ले द्वे  
 कृ॒ष्णे (४)

मूर्ध॑न्वती॒र्भवन्ति॒ तस्मा॑त्पु॒रस्ता॑न्मूर्धा पञ्च दक्षि॑णाया॒ऽ  
 श्रो॒ण्यामु॑प॒ दधाति॒ पञ्चोत्त॑रस्यां॒ तस्मा॑त्प॒श्चाद्व॑र्षी॒यान्-पु॒रस्ता॑त्प्रवणः  
 प॒शुर्ब॑स्तो वय॒ इति॒ दक्षि॑णेऽ२स॒ उप॑ दधाति वृ॒ष्णिर्व॑य॒ इत्युत्त॑रे-  
 २सा॑वे॒व प्र॑ति॒ दधाति॒ व्या॒घ्रो वय॒ इति॒ दक्षि॑णे प॒क्ष उप॑ दधाति  
 सि॒२हो वय॒ इत्युत्त॑रे प॒क्षयो॑रे॒व वी॒र्यं॑ दधाति॒ पुरु॑षो वय॒ इति॒  
 मध्ये॒ तस्मा॑त्पु॒रुषः॑ प॒शूना॑मधि॒पतिः॥ (५)

कृत्या उप॒धाय॑ प्राणभृ॒तः सम॑नसः कृष्णे पुरु॑षो वय॒ इति॒ पञ्च च॥५॥ ————— [१]

इन्द्रा॑ग्नी॒ अव्य॑थमा॒नामि॑ति॒ स्वय॑मातृ॒ण्णामु॑प॒ दधाती॑न्द्रा॒ग्निभ्या॑  
 वा इ॒मौ लो॒कौ वि॑धृ॒ताव॑नयो॒र्लो॒कयो॑र्वि॒धृत्या॒ अधृ॑ते॒व वा  
 ए॒षा यन्म॑ध्य॒मा चि॑तिरन्त॒रिक्ष॑मि॒व वा ए॒षेन्द्रा॑ग्नी॒ इत्या॑हेन्द्रा॒ग्नी वै  
 दे॒वाना॑मो॒जोभृ॑ता॒वो॒जसै॑वैना॒मन्त॑रि॒क्षे चि॑नुते॒ धृत्यै॑ स्वय॑मातृ॒ण्णामु॑प॒  
 दधा॑त्यन्त॒रिक्षं॑ वै स्वय॑मातृ॒ण्णाऽन्त॑रि॒क्षमे॒वोप॑ धृ॒त्तेऽश्व॑मु॒प॒ (६)

घ्रा॒पय॑ति प्रा॒णमे॒वास्या॑ दधा॒त्यथो॑ प्रा॒जाप॑त्यो वा अश्वः  
 प्र॒जाप॑तिनै॒वाग्निं॑ चि॒नुते॒ स्वय॑मातृ॒ण्णा भ॑वति प्रा॒णाना॑मु॒त्सृ॑ष्ट्या  
 अथो॑ सु॒व॒र्गस्य॑ लो॒कस्यानु॑ख्यात्यै दे॒वानां॑ वै सु॒व॒र्गं लो॒कं य॑तां

दिशः समं वीयन्त त एता दिश्या अपश्यन्ता उपादधत् ताभिर्वै ते  
दिशोऽदृहन् यद्विश्या उपदधाति दिशां विधृत्यै दशं प्राणभृतः  
पुरस्तादुपं (७)

दधाति नव वै पुरुषे प्राणा नाभिर्दशमी प्राणानेव पुरस्ताद्धत्ते  
तस्मात्पुरस्तात्प्राणा ज्योतिष्मतीमुत्तमामुपं दधाति तस्मात्प्राणानां  
वाग्ज्योतिरुत्तमा दशोपं दधाति दशाक्षरा विराड्विराट्छन्दसां  
ज्योतिर्ज्योतिरेव पुरस्ताद्धत्ते तस्मात्पुरस्ताज्ज्योतिरुपास्महे  
छन्दांसि पशुष्वजिमयुस्तान्बृहत्युदजयत्तस्माद्बार्हताः (८)

पशवं उच्यन्ते मा छन्द इति दक्षिणत उपं दधाति  
तस्माद्दक्षिणावृतो मासाः पृथिवी छन्द इति पश्चात्प्रतिष्ठित्या  
अग्निर्देवतेत्युत्तरत ओजो वा अग्निरोज एवोत्तरतो धत्ते  
तस्मादुत्तरतोभिप्रयायी जयति षट्त्रिंशत्सं पद्यन्ते षट्त्रिंशदक्षरा  
बृहती बार्हताः पशवो बृहत्यैवास्मै पशूनव रुन्धे बृहती छन्दसां  
स्वाराज्यं परीयाय यस्यैता - (९)

उपधीयन्ते गच्छति स्वाराज्यं सप्त वालखिल्याः पुरस्तादुपं  
दधाति सप्त पश्चात्सप्त वै शीर्षण्याः प्राणा द्वाववांश्चौ प्राणानां  
सवीर्यत्वाय मूर्धाऽसि राडिति पुरस्तादुपं दधाति यन्त्री राडिति  
पश्चात्प्राणानेवास्मै समीचो दधाति॥ (१०)

अश्वमुपं पुरस्तादुपं बार्हता एताश्चतुस्त्रिंशच्च॥५॥

[२]

देवा वै यद्यज्ञेऽकुर्वत् तदसुरा अकुर्वत् ते देवा एता



अक्ष्णयास्तोमीया अपश्यन्ता अन्यथाऽनूच्यान्यथोपादधत् तदसुरा  
 नान्ववायन्ततो देवा अभवन्परासुरा यदक्ष्णयास्तोमीया अन्यथाऽ-  
 नूच्यान्यथोपदधाति भ्रातृव्याभिभूत्यै भवत्यात्मना परास्य भ्रातृव्यो  
 भवत्याशुस्त्रिवृदिति पुरस्तादुप दधाति यज्ञमुखं वै त्रिवृद् (११)

यज्ञमुखमेव पुरस्ताद्वि यातयति व्योम सप्तदश इति  
 दक्षिणतोऽन्नं वै व्योमान्नं सप्तदशोऽन्नमेव दक्षिणतो धत्ते  
 तस्मादक्षिणेनान्नमद्यते धरुणं एकविंश इति पश्चात्प्रतिष्ठा वा  
 एकविंशः प्रतिष्ठित्यै भान्तः पञ्चदश इत्युत्तरत ओजो वै भान्त  
 ओजः पञ्चदश ओज एवोत्तरतो धत्ते तस्मादुत्तरतोभिप्रयायी  
 जयति प्रतूर्तिरष्टादश इति पुरस्ता- (१२)

दुप दधाति द्वौ त्रिवृतावभिपूर्वं यज्ञमुखे वि यातयत्यभिवर्तः  
 सविंश इति दक्षिणतोऽन्नं वा अभिवर्तोऽन्नं सविंशो-  
 ऽन्नमेव दक्षिणतो धत्ते तस्मादक्षिणेनान्नमद्यते वर्चो द्वाविंश  
 इति पश्चाद्यद्विंशतिर्द्वे तेन विराजौ यद्वे प्रतिष्ठा तेन  
 विराजोरेवाभिपूर्वमन्नाद्ये प्रति तिष्ठति तपो नवदश इत्युत्तरतस्तस्मात्

हस्तयोस्तपस्वितरो योनिश्चतुर्विंश इति पुरस्तादुप  
 दधाति चतुर्विंशत्यक्षरा गायत्री गायत्री यज्ञमुखं यज्ञमुखमेव  
 पुरस्ताद्वि यातयति गर्भाः पञ्चविंश इति दक्षिणतोऽन्नं वै गर्भा  
 अन्नं पञ्चविंशोऽन्नमेव दक्षिणतो धत्ते तस्मादक्षिणेनान्नमद्यत  
 ओजस्त्रिणव इति पश्चादिमे वै लोकास्त्रिणव एष्वेव लोकेषु प्रति

तिष्ठति सम्भरणस्त्रयोविंश इ- (१४)

त्युत्तरतस्तस्मात्सव्यो हस्तयोः सम्भार्यतरः क्रतुरेकत्रिंश इति पुरस्तादुप दधाति वाग्वै क्रतुर्यज्ञमुखं वाग्यज्ञमुखमेव पुरस्ताद्वि यातयति ब्रध्नस्य विष्टपं चतुस्त्रिंश इति दक्षिणतोऽसौ वा आदित्यो ब्रध्नस्य विष्टपं ब्रह्मवर्चसमेव दक्षिणतो धत्ते तस्माद्वक्षिणोऽर्धो ब्रह्मवर्चसितरः प्रतिष्ठा त्रयस्त्रिंश इति पश्चात्प्रतिष्ठित्यै नाकः षट्त्रिंश इत्युत्तरतः सुवर्गो वै लोको नाकः सुवर्गस्य लोकस्य समष्ट्यै॥ (१५)

वै त्रिवृदिति पुरस्तात्सव्यस्त्रयोविंश इति सुवर्गो वै पञ्च च॥(३) आशुर्व्याम धरुणो भान्तः प्रतूर्तिरभिवर्तो वर्चस्तपो योनिर्गर्भा ओजः सम्भरणः क्रतुर्ब्रध्नस्य प्रतिष्ठा नाकः षोडश॥५॥—[३]

अग्नेर्भागोऽसीति पुरस्तादुप दधाति यज्ञमुखं वा अग्निर्यज्ञमुखं दीक्षा यज्ञमुखं ब्रह्म यज्ञमुखं त्रिवृद्यज्ञमुखमेव पुरस्ताद्वि यातयति नृचक्षसां भागोऽसीति दक्षिणतः शुश्रुवांसो वै नृचक्षसोऽन्नं धाता जातायैवास्मा अन्नमपि दधाति तस्माज्जातोऽन्नमत्ति जनित्रः स्पृतः सप्तदशः स्तोम इत्याहान्नं वै जनित्र- (१६)

मन्त्रः सप्तदशोऽन्नमेव दक्षिणतो धत्ते तस्माद्वक्षिणेनान्नमद्यते मित्रस्य भागोऽसीति पश्चात्प्राणो वै मित्रोऽपानो वरुणः प्राणापानावेवास्मिन्दधाति दिवो वृष्टिर्वाताः स्पृता एकविंशः स्तोम इत्याह प्रतिष्ठा वा एकविंशः प्रतिष्ठित्या इन्द्रस्य

भा॒गोऽसीत्युत्तर॒तो ओजो॒ वा इन्द्र॒ ओजो॒ विष्णुरो॒जः क्ष॒त्रमो॒जः  
प॒ञ्चद॒श - (१७)

ओजं॑ ए॒वोत्तर॒तो ध॑त्ते तस्मा॑दुत्तरतोभि॒प्रया॒यी ज॑यति॒ वसू॑नां  
भा॒गोऽसीति॑ पुर॒स्तादुप॑ दधाति यज्ञ॒मुखं वै वस॑वो यज्ञ॒मुखं  
रु॒द्रा य॑ज्ञ॒मुखं च॑तुर्वि॒ंशो य॑ज्ञ॒मुखमे॒व पुर॒स्ताद्वि या॑तयत्यादि॒त्यानां॑  
भा॒गोऽसीति॑ दक्षिण॒तोऽन्नं॑ वा आ॑दि॒त्या अन्नं॑ म॒रुतोऽन्नं॑ गर्भा॒  
अन्नं॑ प॒ञ्चवि॒ंशोऽन्नमे॒व दक्षिण॒तो ध॑त्ते तस्मा॑द्दक्षिणे॒नान्नम॑द्यते॒  
ऽदित्यै॑ भा॒गो - (१८)

ऽसीति॑ प॒श्चात्प्रति॑ष्ठा वा अ॒दितिः॑ प्रति॒ष्ठा पू॒षा प्र॑ति॒ष्ठा त्रि॑ण॒वः  
प्रति॑ष्ठित्यै दे॒वस्य॑ सवि॒तुर्भा॒गोऽसीत्युत्तर॒तो ब्र॒ह्म वै दे॒वः स॑वि॒ता ब्र॒ह्म  
बृ॒हस्प॑तिर्ब्र॒ह्म च॑तुष्टो॒मो ब्र॑ह्मवर्च॒समे॒वोत्तर॒तो ध॑त्ते तस्मा॑दुत्तरोऽर्धो॑  
ब्र॒ह्मवर्च॑सि॒तरः सा॑वि॒त्रव॑ती भवति॒ प्रसू॑त्यै तस्मा॑द्वाह्म॒णाना॑मुदी॒ची  
स॒निः प्र॑सू॒ता ध॑र्त्रश्च॒तुष्टो॒म इति॑ पुर॒स्तादुप॑ दधाति यज्ञ॒मुखं वै  
ध॑र्त्रो (१९)

य॑ज्ञ॒मुखं च॑तुष्टो॒मो य॑ज्ञ॒मुखमे॒व पुर॒स्ताद्वि या॑तयति॒  
यावा॑नां भा॒गोऽसीति॑ दक्षिण॒तो मा॒सा वै यावा॑ अर्धमा॒सा  
अया॑वा॒स्तस्मा॑द्दक्षि॒णावृ॑तो मा॒सा अन्नं॑ वै यावा॒ अन्नं॑ प्र॒जा अन्नमे॒व  
दक्षिण॒तो ध॑त्ते तस्मा॑द्दक्षिणे॒नान्नम॑द्यत ऋ॒भूणां॑ भा॒गोऽसीति॑  
प॒श्चात् प्रति॑ष्ठित्यै वि॒वर्तो॑ऽष्टाच॒त्वारि॒ंश इत्युत्तर॒तोऽन॑यो॒र्लो॒कयोः॑

सवीर्यत्वाय तस्मादिमौ लोकौ समावद्दीर्यौ (२०)

यस्य मुख्यवतीः पुरस्तादुपधीयन्ते मुख्य एव भवत्यास्य मुख्यो जायते यस्यान्नवतीर्दक्षिणतोऽत्यन्नमास्यान्नादो जायते यस्य प्रतिष्ठावतीः पश्चात्प्रत्येव तिष्ठति यस्यौजस्वतीरुत्तरत ओजस्व्येव भवत्यास्यौजस्वी जायतेऽर्को वा एष यदग्निस्तस्यैतदेव स्तोत्रमेतच्छ्रुं यदेषा विधा (२१)

विधीयतेऽर्क एव तद्वर्कमनु वि धीयतेऽत्यन्नमास्यान्नादो जायते यस्यैषा विधा विधीयते य उ चैनामेवं वेद सृष्टीरुप दधाति यथासृष्टमेवाव रुन्धे न वा इदं दिवा न नक्तमासीदव्यावृत्तं ते देवा एता व्युष्टीरपश्यन्ता उपादधत् ततो वा इदं व्यौच्छद्यस्यैता उपधीयन्ते व्यैवास्मा उच्छृत्यथो तम एवाप हते॥ (२२)

वै जनित्रं पञ्चदशोऽदित्यै भागो वै धृत्रः समावद्दीर्यौ विधा ततो वा इदं चतुर्दश च॥(४)

अग्नेर्नृचक्षसाञ्जनित्रं मित्रस्येन्द्रस्य वसूनामादित्यानामदित्यै देवस्य सवितुः सावित्रवती धृत्रो यावानामृभूणां विवर्तश्चतुर्दश॥७॥

[४]

अग्ने जातान्म णुदा नः सुपन्नानिति पुरस्तादुप दधाति जातानेव भ्रातृव्यान्म णुदते सहसा जातानिति पश्चाञ्जनिष्यमाणानेव प्रति नुदते चतुश्चत्वारिंशः स्तोम इति दक्षिणतो ब्रह्मवर्चसं वै चतुश्चत्वारिंशो ब्रह्मवर्चसमेव दक्षिणतो धत्ते तस्मादक्षिणोऽर्धो ब्रह्मवर्चसितरः षोडशः स्तोम इत्युत्तरत ओजो वै षोडश ओज एवोत्तरतो धत्ते तस्मा- (२३)

दुत्तरतोभिप्रयायी जयति वज्रो वै चतुश्चत्वारिंशो वज्रः  
 षोडशो यदेते इष्टंके उपदधाति जाताश्चैव जनिष्यमाणाश्च  
 भ्रातृव्यान्प्रणुद्य वज्रमनु प्र हरति स्तृत्यै पुरीषवर्ती मध्य  
 उप दधाति पुरीषं वै मध्यमात्मनः सात्मानमेवाग्निं चिनुते  
 सात्मानमुष्मिलोके भवति य एवं वेदेता वा असपत्ना नामेष्टका  
 यस्यैता उपधीयन्ते (२४)

नास्य सपत्नो भवति पशुर्वा एष यदग्निर्विराज  
 उत्तमायां चित्यामुप दधाति विराजमेवोत्तमां पशुषु दधाति  
 तस्मात्पशुमानुत्तमां वाचं वदति दशदशोपं दधाति सवीर्य-  
 त्वायाक्ष्णयोपं दधाति तस्मादक्ष्ण्या पशवोऽङ्गानि प्र हरन्ति  
 प्रतिष्ठित्यै यानि वै छन्दांसि सुवर्ग्याण्यासन्तैर्देवाः सुवर्गं  
 लोकमायन्तेनर्षयो - (२५)

ऽश्राम्यन्ते तपोऽतप्यन्त तानि तपसाऽपश्यन्तेभ्य एता इष्टका  
 निरमिमतेवश्छन्दो वरिवश्छन्द इति ता उपादधत ताभिर्वै ते सुवर्गं  
 लोकमायन् यदेता इष्टका उपदधाति यान्येव छन्दांसि सुवर्ग्याणि  
 तैरेव यजमानः सुवर्गं लोकमेति यज्ञेन वै प्रजापतिः प्रजा असृजत  
 ताः स्तोमभागेरेवासृजत यथ (२६)

स्तोमभागा उपदधाति प्रजा एव तद्यजमानः सृजते  
 बृहस्पतिर्वा एतद्यज्ञस्य तेजः समभरद्यत्स्तोमभागा यत्स्तोमभागा  
 उपदधाति सतेजसमेवाग्निं चिनुते बृहस्पतिर्वा एतां यज्ञस्य

प्रतिष्ठामपश्यद्यथस्तोमभागा यथस्तोमभागा उपदधाति यज्ञस्य  
प्रतिष्ठित्यै सप्तसप्तोप दधाति सवीर्यत्वाय तिस्रो मध्ये  
प्रतिष्ठित्यै॥ (२७)

उत्तरतो धत्ते तस्मादुपधीयन्त ऋषयोऽसृजत यत् त्रिचत्वारिंशच्च॥५॥ [५]

रश्मिरित्येवाऽऽदित्यमसृजत प्रेतिरिति धर्ममन्वितिरिति  
दिवः सन्धिरित्यन्तरिक्षं प्रतिधिरिति पृथिवीं विष्टम्भ  
इति वृष्टिं प्रवेत्यहरनुवेति रात्रिमुशिगिति वसून्प्रकेत इति  
रुद्रान्सुदीतिरित्यादित्यानोज इति पितृस्तन्तुरिति प्रजाः  
पृतनाषाडिति पशून्नेवदित्योषधीरभिजिदसि युक्तग्रावे- (२८)

न्द्राय त्वेन्द्रं जिन्वेत्येव दक्षिणतो वज्रं पर्योहदभिजित्यै ताः  
प्रजा अपप्राणा असृजत तास्वधिपतिरसीत्येव प्राणमदधाद्यन्तेत्यपान  
सर्प इति चक्षुर्वयोधा इति श्रोत्रं ताः प्रजाः प्राणतीरपानतीः  
पश्यन्तीः शृण्वतीर्न मिथुनी अभवन्तासु त्रिवृदसीत्येव  
मिथुनमदधात्ताः प्रजा मिथुनी (२९)

भवन्तीर्न प्राजायन्त ताः सरोहोऽसि नीरोहोऽसीत्येव  
प्राजनयत्ताः प्रजाः प्रजाता न प्रत्यतिष्ठन्ता वसुकोऽसि वेषश्रिरसि  
वस्यष्टिरसीत्येवैषु लोकेषु प्रत्यस्थापयद्यदाह वसुकोऽसि  
वेषश्रिरसि वस्यष्टिरसीति प्रजा एव प्रजाता एषु लोकेषु  
प्रतिष्ठापयति सात्मान्तरिक्षं रोहति सप्राणोऽमुष्मिल्लोके प्रति

तिष्ठत्यव्यर्धुकः प्राणापानाभ्यां भवति य एवं वेद॥ (३०)

युक्तग्रांवा प्रजा मिथुन्यन्तरिक्षं द्वादश च॥३॥ \_\_\_\_\_[६]

नाकसद्भिर्वै देवाः सुवर्गं लोकमायन्तन्नाकसदां नाकसत्त्वं यन्नाकसदं उपदधाति नाकसद्भिरेव तद्यजमानः सुवर्गं लोकमैति सुवर्गो वै लोको नाको यस्यैता उपधीयन्ते नास्मा अकं भवति यजमानायतनं वै नाकसदो यन्नाकसदं उपदधात्यायतनमेव तद्यजमानः कुरुते पृष्ठानां वा एतत्तेजः सम्भृतं यन्नाकसदो यन्नाकसदं - (३१)

उपदधाति पृष्ठानामेव तेजोऽवं रुन्धे पञ्चचोडा उप दधात्यप्सरसं एवैनमेता भूता अमुष्मिल्लोक उप शिरेऽथो तनूपानीरेवैता यजमानस्य यं द्विष्यात्तमुपदधद् ध्यायेदेताभ्यं एवैनं देवताभ्यं आ वृश्चति ताजगार्तिमार्च्छत्युत्तरा नाकसद्भ्य उप दधाति यथा जायामानीयं गृहेषु निषादयति तादृगेव तत् (३२)

पश्चात्प्राचीमुत्तमामुप दधाति तस्मात्पश्चात्प्राची पत्यन्वास्ते स्वयमातृणां च विकर्णी चोत्तमे उप दधाति प्राणो वै स्वयमातृणाऽऽयुर्विकर्णी प्राणं चैवाऽऽयुश्च प्राणानामुत्तमौ धत्ते तस्मात्प्राणश्चाऽऽयुश्च प्राणानामुत्तमौ नान्यामुत्तरामिष्टकामुप दध्याद्यदन्यामुत्तरामिष्टकामुपदध्यात्पशूनां (३३)

च यजमानस्य च प्राणं चाऽऽयुश्चापि दध्यात्तस्मान्नान्योत्तरेष्टकोप

स्वयमातृणामुप दधात्यसौ वै स्वयमातृणामूमेवोप धत्तेऽश्वमुप  
 घ्रापयति प्राणमेवास्यां दधात्यथो प्राजापत्यो वा अश्वः प्रजा-  
 पतिनैवाग्निं चिनुते स्वयमातृणा भवति प्राणानामुत्सृष्ट्या अथो  
 सुवर्गस्य लोकस्यानुख्यात्या एषा वै देवानां विक्रान्तिर्यद्विकर्णी  
 यद्विकर्णीमुपदधाति देवानामेव विक्रान्तिमनु वि क्रमत उत्तरत उप  
 दधाति तस्मादुत्तरत उपचारोऽग्निर्वायुमती भवति समिद्धौ॥ (३४)

सम्भृतं यत्राकसदो यत्राकसदस्तत्पशूनामेपां वै द्वाविंशतिश्च॥४॥ [७]

छन्दांस्युप दधाति पशवो वै छन्दांसि पशूनेवाव रुन्धे  
 छन्दांसि वै देवानां वामं पशवो वाममेव पशूनव रुन्ध एतां ह  
 वै यज्ञसेनश्चेत्रियायणश्चितिं विदां चकार तथा वै स पशूनवारुन्ध  
 यदेतामुपदधाति पशूनेवाव रुन्धे गायत्रीः पुरस्तादुप दधाति तेजो  
 वै गायत्री तेज एव (३५)

मुखतो धत्ते मूर्धन्वतीर्भवन्ति मूर्धानमेवैनं समानानां करोति  
 त्रिष्टुभ उप दधातीन्द्रियं वै त्रिष्टुगिन्द्रियमेव मध्यतो धत्ते जगतीरुप  
 दधाति जागता वै पशवः पशूनेवाव रुन्धेऽनुष्टुभ उप दधाति  
 प्राणा वा अनुष्टुप्प्राणानामुत्सृष्ट्यै बृहतीरुष्णिहाः पङ्कीरक्षरपङ्कीरिति  
 विषुरूपाणि छन्दांस्युप दधाति विषुरूपा वै पशवः पशव- (३६)

छन्दांसि विषुरूपानेव पशूनव रुन्धे विषुरूपमस्य गृहे  
 दृश्यते यस्यैता उपधीयन्ते य उ चैना एवं वेदातिच्छन्दसमुप



दधात्यतिच्छन्दा वै सर्वाणि छन्दांसि सर्वेभिरेवैनं छन्दोभिश्चिनुते  
वर्ष्म वा एषा छन्दसां यदतिच्छन्दा यदतिच्छन्दसमुपदधाति  
वर्ष्मैवैनं समानानां करोति द्विपदा उपं दधाति द्विपाद्यजमानः  
प्रतिष्ठित्यै॥ (३७)

तेज एव पशवः पशवो यजमान एकञ्च॥३॥ [८]

सर्वाभ्यो वै देवताभ्योऽग्निश्चीयते यत्सयुजो नोपदध्याद्देवता  
अस्याग्निं वृक्षीरन् यत्सयुजं उपदधात्यात्मनैवैनं सयुजं चिनुते  
नाग्निना व्यृध्यतेऽथो यथा पुरुषः स्त्रावभिः सन्तत एवमेवैताभिर्ऋग्निः  
सन्ततोऽग्निना वै देवाः सुवर्गं लोकमायन्ता अमूः कृत्तिका अभवन्  
यस्यैता उपधीयन्ते सुवर्गमेव (३८)

लोकमेति गच्छति प्रकाशं चित्रमेव भवति मण्डलेष्टका उपं  
दधातीमे वै लोका मण्डलेष्टका इमे खलु वै लोका देवपुरा  
देवपुरा एव प्र विंशति नार्तिमाच्छत्यग्निं चिक्यानो विश्वज्योतिष  
उपं दधातीमानेवैताभिर्लोकां ज्योतिष्मतः कुरुतेऽथो प्राणानेवैता  
यजमानस्य दाधत्येता वै देवताः सुवर्ग्यास्ता एवान्वारभ्य सुवर्गं  
लोकमेति॥ (३९)

सुवर्गमेव ता एव चत्वारि च॥२॥ [९]

वृष्टिसनीरुपं दधाति वृष्टिमेवावं रुन्धे यदेकधोपदध्यादेकमृतुं  
वरषेदनुपरिहारं सादयति तस्मात्सर्वानृतून् वरषति

पुरोवातसनिर्सीत्याहैतद्वै वृष्ट्यै रूपं रूपेणैव वृष्टिमव रुन्धे  
 संयानीभिर्वै देवा इमाँल्लोकान्धसमेयुस्तथ्संयानीनां संयानित्वं  
 यथ्संयानीरुपदधाति यथाऽप्सु नावा संयात्येव- (४०)

मेवैताभिर्यजमान इमाँल्लोकान्धसं याति प्लवो वा एषो-  
 ऽग्नेर्यथ्संयानीर्यथ्संयानीरुपदधाति प्लवमेवैतमग्रय उपं दधात्युत  
 यस्यैतासूपहितास्वापोऽग्निः हरन्त्यहंत एवास्याग्निरादित्येष्टका  
 उपं दधात्यादित्या वा एतं भूत्यै प्रति नुदन्ते योऽलं भूत्यै सन्भूतिं  
 न प्राप्नोत्यादित्या - (४१)

एवैनं भूतिं गमयन्त्यसौ वा एतस्याऽऽदित्यो रुचमा दत्ते यो-  
 ऽग्निं चित्वा न रोचते यदादित्येष्टका उपदधात्यसावेवास्मिन्नादित्यो  
 रुचं दधाति यथाऽसौ देवानां रोचंत एवमेवैष मनुष्याणां रोचते  
 घृतेष्टका उपं दधात्येतद्वा अग्नेः प्रियं धाम यद् घृतं प्रियेणैवैनं धाम्ना  
 समर्धय- (४२)

त्यथो तेजसाऽनुपरिहारं सादयत्यपरिवर्गमेवास्मिन्तेजो  
 दधाति प्रजापतिरग्निमचिनुत स यशसा व्यार्ध्यत स एता यशोदा  
 अपश्यत्ता उपाधत्ता ताभिर्वै स यश आत्मन्नधत्त यद्यशोदा  
 उपदधाति यश एव ताभिर्यजमान आत्मन्धत्ते पञ्चोपं दधाति  
 पाङ्क्तः पुरुषो यावानेव पुरुषस्तस्मिन् यशो दधाति॥ (४३)

एवं प्राप्नोत्यादित्या अर्धयत्येकान्नपञ्चाशच्च॥४॥ [१०]

देवासुराः संयत्ता आसन्कनीयांसो देवा आसन्भूयांसो-

ऽसुरास्ते देवा एता इष्टंका अपश्यन्ता उपादधत भूयस्कृदसीत्येव  
 भूयाः सोऽभवन्वनस्पतिभिरोषधीभिर्वरिवस्कृदसीतीमाम-  
 जयन्प्राच्यसीति प्राचीं दिशमजयन्ध्वासीत्यमूमजयन्तरिक्षसदस्यन-  
 सीदेत्यन्तरिक्षमजयन्ततो देवा अभवन् (४४)

परासुरा यस्यैता उपधीयन्ते भूयानेव भवत्यभीमाँल्लोकाञ्जयति  
 भवत्यात्मना परास्य भ्रातृव्यो भवत्यप्सुषदसि श्येनसदसीत्याहेतद्वा  
 अग्ने रूपं रूपेणैवाग्निमवं रुन्धे पृथिव्यास्त्वा द्रविणे  
 सादयामीत्याहेमानेवैताभिर्लोकान् द्रविणावतः कुरुत आयुष्या  
 उप दधात्यायुरेवा- (४५)

स्मिन्दधात्यग्ने यत्ते परं हन्नामेत्याहेतद्वा अग्नेः प्रियं धामं  
 प्रियमेवास्य धामोपाप्नोति तावेहि स रभावहा इत्याह व्यैवैनेन  
 परि धत्ते पाञ्चजन्येष्वप्येध्यग्र इत्याहेष वा अग्निः पाञ्चजन्यो यः  
 पञ्चचितीकस्तस्मादेवमाहर्तव्या उप दधात्येतद्वा ऋतूनां प्रियं धामं  
 यदृतव्या ऋतूनामेव प्रियं धामाव रुन्धे सुमेक इत्याह संवत्सरो  
 वै सुमेकः संवत्सरस्यैव प्रियं धामोपाप्नोति॥ (४६)

अभवन्नायुरेवर्तव्या उप पङ्क्तिं शतिश्च॥३॥ [११]

प्रजापतेरक्ष्यंश्चयत् तत्परापतत् तदश्वोऽभवद्यदश्वयत्  
 तदश्वस्याश्वत्वं तद्देवा अश्वमेधेनैव प्रत्यदधुरेष वै प्रजापतिः  
 सर्वं करोति योऽश्वमेधेन यजते सर्व एव भवति सर्वस्य वा

एषा प्रायश्चित्तिः सर्वस्य भेषजं सर्वं वा एतेन पाप्मानं देवा  
अंतरन्नपि वा एतेन ब्रह्महृत्यामंतरन्त्सर्वं पाप्मानं (४७)

तरति तरति ब्रह्महृत्यां योऽश्वमेधेन यजते य उ चैनमेवं  
वेदोत्तरं वै तत्प्रजापतेरक्ष्यश्वयत् तस्मादश्वस्योत्तरतोऽव द्यन्ति  
दक्षिणतोऽन्येषां पशूनां वैतसः कटो भवत्यप्सुयोनिर्वा अश्वो-  
ऽप्सुजो वैतसः स्व एवैनं योनौ प्रतिष्ठापयति चतुष्टोमः स्तोमो  
भवति सरङ्गु वा अश्वस्य सक्थ्याऽवृहत् तद्देवाश्चतुष्टोमेनैव  
प्रत्यदधुर्यच्चतुष्टोमः स्तोमो भवत्यश्वस्य सर्वत्वाय॥ (४८)

सर्वं पाप्मानमवृहद्द्वादश च॥२॥ [१२]

उत्सन्नयज्ञ इन्द्राग्नी देवा वा अक्षण्यास्तोमीयां अग्नेर्भागाऽस्यग्नें जातान्श्मिरिति नाक्सद्विच्छन्दांसि  
सर्वाभ्यो वृष्टिसनीर्देवासुराः कर्नीयांसः प्रजापतेरक्षि द्वादश॥१२॥

उत्सन्नयज्ञो देवा वै यस्य मुख्यवतीर्नाक्सद्विरेवेताभिर्ष्टाचत्वारिंशत्॥४८॥

उत्सन्नयज्ञः सर्वत्वाय॥

हरिः ॐ॥

॥कृष्ण-यजुर्वेदीय-तैत्तिरीय-संहितायां पञ्चमकाण्डे तृतीयः प्रश्नः  
समाप्तः॥ ५-३॥

## ॥चतुर्थः प्रश्नः॥

॥तैत्तिरीयसंहितायां पञ्चमकाण्डे चतुर्थः प्रश्नः॥

दे॒वा॒सुराः संय॑त्ता आस॒न्ते न व्य॑जयन्त॒ स ए॒ता  
इन्द्र॑स्त॒नूर॑पश्य॒त्ता उपा॑धत्त॒ ताभि॑र्वै स त॒नुव॑मिन्द्रि॒यं वी॑र्य॒मात्म॑न्न॒धत्त॑  
ततो॑ दे॒वा अ॑भवन्परा॒सुरा॒ यदिन्द्र॑त॒नूरु॑प॒दधा॑ति त॒नुव॑मेव  
ताभि॑रिन्द्रि॒यं वी॑र्यं यज॑मान आ॒त्मन्ध॑त्तेऽथो सेन्द्र॑मे॒वाग्नि॑ः सत॑त॒नुं  
चिनु॑ते भवे॒त्यात्म॑ना॒ परा॑स्य॒ भ्रातृ॑व्यो (१)

भव॑ति य॒ज्ञो दे॒वेभ्यो॑ऽपा॒क्राम॑त्तम॒वरु॑धं नाश॑क्नुवन्त  
ए॒ता य॑ज्ञत॒नूर॑पश्य॒न्ता उपा॑दधत्त॒ ताभि॑र्वै ते य॒ज्ञमवा॑रुन्धत्त॒  
यद्य॑ज्ञत॒नूरु॑प॒दधा॑ति य॒ज्ञमे॒व ताभि॑र्यज॑मानोऽव॒ रुन्धे॑ त्रय॑स्त्रि॑ः शत॒मुप॑  
दधा॑ति त्रय॑स्त्रि॑ः श॒द्वे दे॒वता॑ दे॒वता॑ ए॒वाव॑ रुन्धेऽथो सा॒त्मान॑मे॒वाग्नि॑ः  
सत॑त॒नुं चिनु॑ते सा॒त्माऽमु॑ष्मि॒ल्लोके॑ (२)

भव॑ति॒ य ए॒वं वेद॑ ज्योति॑ष्मतीरु॒पं दधा॑ति॒ ज्योति॑रे॒वास्मि॑न्दधात्ये॒  
अ॒ग्निश्चितो॑ ज्व॒लति॒ ताभि॑रे॒वैन॑ः॒ समि॑न्द्र उ॒भयो॑रस्मै  
लो॒कयो॑ज्योति॑र्भवति॒ नक्ष॑त्रेष्ट॒का उप॑ दधात्ये॒तानि॒ वै दि॒वो  
ज्योती॑ः॒षि तान्ये॒वाव॑ रुन्धे सु॒कृतां॑ वा ए॒तानि॒ ज्योती॑ः॒षि  
यन्नक्ष॑त्राणि॒ तान्ये॒वाऽऽप्नो॑त्यथो॒ अनू॑का॒शमे॒वैतानि॑ (३)

ज्योती॑ः॒षि कुरु॑ते सुव॒र्गस्य॑ लो॒कस्यानु॑ख्यात्ये॒ यत्स॑ः॒स्पृष्टा॑  
उप॑द॒ध्याद्वृ॒ष्ट्यै लो॒कमपि॑ द॒ध्यादव॑र॒षुकः॑ प॒र्जन्यः॑ स्या॒दस॑ः॒स्पृष्टा॑

उप॑ दधाति॒ वृष्ट्या॑ ए॒व लो॒कं के॑रोति॒ वर्षु॑कः पु॒र्जन्यो॑ भवति  
 पु॒रस्ता॑दन्याः प्र॒तीची॑रुपं दधाति पु॒श्चाद॑न्याः प्राची॒स्तस्मा॑त्प्राची॒नानि॑  
 च प्र॒तीची॑नानि च नक्ष॑त्राण्या वर्तन्ते॥ (४)

भ्रातृव्यो लोक एवैतान्येकचत्वारिंशच्च॥४॥ [१]

ऋ॒त॒व्या उप॑ दधात्यृ॒तूनां क्लृ॑त्यै द्वि॒द्वमु॑पं दधाति॒  
 तस्मा॑द्द्वि॒द्वमृ॑तवोऽधृ॒तेव॑ वा ए॒षा यन्म॑ध्य॒मा चि॒तिर॒न्तरि॑क्षमिव॒ वा  
 ए॒षा द्वि॒द्वम॑न्यासु चि॒तीषू॑पं दधाति॒ चत॑स्रो मध्ये धृ॒त्या अन्तः॑श्लेषणं  
 वा ए॒ताश्चि॒तीनां॑ यदृ॒त॒व्या यदृ॒त॒व्या उप॑दधाति॒ चि॒तीनां॑ विधृ॒त्या  
 अव॑का॒मनू॑पं दधात्येषा वा अ॒ग्रेयो॑निः स॒योनि॑- (५)

मे॒वाग्निं॑ चि॒नुत उ॒वाच॑ ह वि॒श्वामि॒त्रोऽद॑दि॒त्स ब्र॒ह्म॒णान्नं॑ यस्यै॒ता  
 उप॑धी॒यान्तै॑ य उ॒ चैना॑ ए॒वं वेद॑दिति॒ संव॑त्स॒रो वा ए॒तं प्र॑ति॒ष्ठायै॑  
 नुद॑ते योऽग्निं॑ चि॒त्वा न प्र॑ति॒तिष्ठ॑ति पञ्च पूर्वा॒श्चित॑यो भवन्त्यथ  
 ष॒ष्ठीं चि॒तिं चि॒नुते॑ षड्वा ऋ॒तवः॑ संव॑त्स॒र ऋ॒तुष्वे॒व संव॑त्स॒रे प्र॑ति॒  
 तिष्ठ॑त्ये॒ता वा (६)

अधि॑प॒त्नीर्नामे॑ष्टका॒ यस्यै॒ता उप॑धी॒यन्तेऽधि॑पतिरे॒व संमा॑नानां  
 भव॑ति यं द्वि॒ष्यात्तमु॑प॒दध॑द् ध्याये॒देता॑भ्य॒ एवैनं॑ दे॒वता॑भ्य॒ आ  
 वृ॑श्चति ताज॒गार्ति॑मा॒र्च्छत्यङ्गि॑रसः सु॒वर्गं॑ लो॒कं यन्तो॑ या य॒ज्ञस्य॑  
 निष्कृ॑तिरासी॒त्तामृषि॑भ्यः प्रत्यौ॒हन्त॑द्वि॒रण्य॑मभव॒द्यद्वि॑रण्यश॒ल्कैः  
 प्रो॒क्षति॑ य॒ज्ञस्य॑ निष्कृ॑त्या अथो॑ भेष॒जमे॒वास्मै॑ करो- (७)

त्यथो रूपेणैवैनं समर्धयत्यथो हिरण्यज्योतिषैव सुवर्गं  
लोकमेति साहस्रवन्ता प्रोक्षति साहस्रः प्रजापतिः प्रजापतेरास्यां  
इमा मे अग्र इष्टका धेनवः सन्त्वित्याह धेनूरेवैनः कुरुते ता एनं  
कामदुघां अमुत्रामुष्मिल्लोक उप तिष्ठन्ते॥ (८)

सयोनमेता वै करोत्येकान्नचत्वारिंशच्च॥४॥ [२]

रुद्रो वा एष यदग्निः स एतरहिं जातो यरहिं सर्वश्चितः स यथा  
वत्सो जातः स्तनं प्रेप्सत्येवं वा एष एतरहिं भागधेयं प्रेप्सति  
तस्मै यदाहुतिं न जुहुयादध्वर्युं च यजमानं च ध्यायेच्छतरुद्रीयं  
जुहोति भागधेयेनैवैनं शमयति नाऽऽर्तिमाच्छत्यध्वर्युर्न यजमानो  
यद्राम्याणां पशूनां (९)

पयसा जुहुयाद्राम्यान्पशूञ्छुचाऽर्पयेद्यदारण्यानामारण्याञ्जर्तिलय  
वा जुहुयाद् गवीधुकयवाग्वा वा न ग्राम्यान्पशून् हिनस्ति ना-  
ऽऽरण्यानथो खल्वाहुरनाहुतिर्वै जर्तिलांश्च गवीधुकाश्चेत्यजक्षीरेण  
जुहोत्याग्नेयी वा एषा यदजाऽऽहुत्यैव जुहोति न ग्राम्यान्पशून्  
हिनस्ति नाऽऽरण्यानङ्गिरसः सुवर्गं लोकं यन्तो- (१०)

ऽजायां घर्मं प्राप्तिञ्चन्त्सा शोचन्ती पूर्णं पराजिहीत सौ(१)-  
ऽर्कोऽभवत् तदर्कस्यार्कत्वमर्कपूर्णं जुहोति सयोनित्वायोदङ्घ्रिष्ठञ्जुहो  
वै रुद्रस्य दिख्स्वायामेव दिशि रुद्रं निरवदयते चरमायामिष्टकायां

जुहोत्यन्त॒त ए॒व रु॒द्रं नि॒रव॑दयते त्रेधाविभु॒क्तं जु॑होति॒ त्रयं॑ इ॒मे  
लो॒का इ॒माने॒व लो॒कांश्च॑ समाव॑द्दीर्या॒न्करो॒तीय॑त्यग्रे जुहो- (११)

त्यथे॒यत्यथे॑यति॒ त्रयं॑ इ॒मे लो॒का ए॒भ्य ए॒वैनं॑ लो॒केभ्यः॑  
शम॑यति॒ तिस्र॑ उत्त॑रा आहु॑तीर्जुहोति॒ षट्थं॑ प॑द्यन्ते षड्वा ऋ॒तव॑  
ऋ॒तुभि॑रे॒वैनं॑ शम॑यति॒ यद॑नुपरि॒क्रामं॑ जुहु॒याद॑न्तरवचा॒रिणं॑  
रु॒द्रं कुर्या॑दथो॒ खल्वा॑हुः कस्यां॑ वाऽहं दि॒शि रु॒द्रः कस्यां॑  
वेत्य॑नुपरि॒क्राम॑मे॒व हो॑त॒व्यम॑परि॒वर्ग॑मे॒वैनं॑ शम॑य- (१२)

त्ये॒ता वै दे॒वताः॑ सु॒वर्ग्या॑ या उ॑त्त॒मास्ता॑ यज॑मानं वाचयति॒  
ताभि॑रे॒वैनं॑ सु॒वर्गं लो॒कं ग॑मयति॒ यं द्वि॒ष्यात्तस्य॑ सञ्चरे॒ पशू॑नां  
न्य॑स्येद्यः प्रथ॒मः प॒शुर॑भि॒तिष्ठ॑ति॒ स आ॒र्तिमा॑र्च्छति॥ (१३)

पशूनां यन्तोऽग्रे जुहोत्यपरिवर्गमेवैनं शमयति त्रिंशच्च॥५॥ [३]

अश्म॒न्नूर्ज॑मिति॒ परि॑ षिञ्चति मा॒र्जय॑त्ये॒वैन॑मथो॒ तर्प॑यत्ये॒व स  
ए॒नं तृ॒प्तोऽक्षु॑ध्यन्नशोचन्नमुष्मि॑ल्लो॒क उप॑ तिष्ठते तृप्य॑ति प्र॒जया॑  
प॒शुभि॑र्य ए॒वं वेद॑ तां न इ॒षमूर्जं॑ धत्त मरुतः स॒ररा॑णा इत्या॒हान्नं॑  
वा ऊ॒र्गन्न॑ म॒रुतोऽन्न॑मे॒वाव॑ रु॒न्धेऽश्म॑स्ते क्षु॒दमुं ते शु॒- (१४)

गृ॑च्छतु॒ यं द्वि॒ष्म इत्या॑ह॒ यमे॒व द्वेष्टि॑ तम॑स्य क्षु॒धा च॑ शु॒चा  
चा॑र्पयति॒ त्रिः प॑रिषिञ्चन्पर्येति॒ त्रिवृ॑द्वा अ॒ग्निर्या॑वाने॒वाग्नि॑स्तस्य शुचं॑  
शम॑यति॒ त्रिः पुनः॑ पर्येति॒ षट्थं॑ प॑द्यन्ते षड्वा ऋ॒तव॑ ऋ॒तुभि॑रे॒वास्य॑



शुचः॑ शमयत्यपां॑ वा एतत्पुष्पं॑ यद्वेतसोऽपा॑ (१५)

शरोऽव॑का वेतसशा॒ख्या चाव॑काभिश्च॒ वि क॑र्षत्यापो वै  
शान्ताः॑ शान्ताभिरे॒वास्य शुचः॑ शमयति॒ यो वा अ॒ग्निं चितं॑ प्रथमः  
पशुर॑धिक्राम॒तीश्वरो॑ वै त॑ शुचा प्र॒दहो॑ मण्डूकेन॒ वि क॑र्षत्येष वै  
पशूनाम॑नुपजीवनी॒यो न वा ए॒ष ग्राम्येषु॑ प॒शुषु॑ हितो नाऽऽर॒ण्येषु॑  
तमे॒व शुचाऽर्प॑यत्यष्टाभिर्वि॒ क॑र्ष- (१६)

त्यष्टाक्ष॑रा गायत्री॒ गाय॑त्रौऽग्निर्या॒वाने॒वाग्नि॑स्तस्य॒ शुचः॑  
शमयति॒ पाव॑कव॒तीभि॒रन्नं॑ वै पा॒वकोऽन्नै॒नैवा॑स्य॒ शुचः॑  
शमयति॒ मृत्यु॒र्वा ए॒ष यद॒ग्निर्ब्र॑ह्मण॒ एतद्रूपं॑ यत्कृ॒ष्णाजिनं॑  
कार्ष्णी॑ उपा॒नहा॒वुप॑ मुञ्चते॒ ब्रह्म॑णै॒व मृत्यो॒रन्तर्ध॑त्तेऽन्तर्मृत्यो॒र्धत्ते॑-  
ऽन्त॒रन्नाद्या॑दित्या॒हुरन्यामु॑पमुञ्चतेऽन्यां॒ नान्त॑- (१७)

रे॒व मृत्यो॒र्धत्ते॑ऽवा॒न्नाद्यः॑ रुन्धे॒ नम॑स्ते॒ हर॑से शोचिष॒ इत्या॑ह  
नम॑स्कृत्य॒ हि वसी॑या॑समुपचरन्त्यन्यं॒ तै अ॒स्मत्तप॑न्तु हेतय॒  
इत्या॑ह॒ यमे॒व द्वेष्टि॑ तम॑स्य शुचाऽर्प॑यति॒ पाव॑को अ॒स्मभ्यः॑  
शिवो॑ भवेत्या॒हान्नं॑ वै पा॒वकोऽन्न॑मे॒वाव॑ रुन्धे॒ द्वाभ्या॑मधि॒ क्राम॑ति  
प्रति॑ष्ठित्या॒ अप॒स्यव॑तीभ्या॒ः शान्त्यै॑॥ (१८)

शुर्वेतसोऽपामष्टाभिर्विकर्षति नान्तरेकान्नपञ्चाशच्च॥५॥ [४]

नृष॑दे॒ वडि॑ति॒ व्याघा॑रयति॒ प॒ङ्क्याऽऽहु॑त्या॒ यज्ञ॑मुखमा  
र॑भतेऽक्ष॒ण्या व्याघा॑रयति॒ तस्मा॑दक्ष॒ण्या प॒शवोऽङ्गा॑नि॒ प्र

हरन्ति॒ प्रति॑ष्ठित्यै॒ यद्व॑षट्कुर्याद्या॒तया॑माऽस्य॒ वषट्कारः॑ स्याद्यन्न  
व॑षट्कुर्याद्रक्षा॑सि॒ यज्ञ॑ रक्षा॑सि॒ ह॒न्युर्वडित्या॑ह॒ प॒रोक्ष॑मेव॒ वषट्करोति॑ नास्य  
या॒तया॑मा॒ वषट्कारो॑ भव॑ति॒ न य॒ज्ञ रक्षा॑सि॒ घ्नन्ति॑ हुतादो॒ वा  
अ॒न्ये देव॑ - (१९)

अ॒हुतादो॑ऽन्ये॒ तान॑ग्नि॒चिदे॒वोभया॑न्प्रीणाति॒ ये दे॒वा दे॒वाना॑मिति॒  
द॒ध्रा म॑धुमि॒श्रेणावो॑क्षति॒ हुताद॑श्चैव॒ देवान॑हुताद॑श्च॒ यज॑मानः॒ प्रीणा॑ति॒  
ते यज॑मानं॒ प्रीण॑न्ति॒ दध्रै॑व हुतादः॒ प्रीणा॑ति॒ मधु॑षाऽहुतादो॑ ग्रा॒म्यं  
वा ए॒तदन्नं॑ यद॒ध्या र॑ण्यं॒ मधु॑ यद॒ध्रा म॑धुमि॒श्रेणावो॑क्षत्युभय॒स्याव॑रुद्धौ  
ग्रुमु॒ष्टिना॑ऽवो॑क्षति॒ प्राजा॑पत्यो (२०)

वै ग्रुमु॒ष्टिः संयो॑नि॒त्वाय॒ द्वाभ्यां॑ प्रति॑ष्ठित्या॒ अनु॑परि॒चारम॑वो॒क्षत्य॑प  
वि॒ वा ए॒ष प्रा॒णैः प्र॒जया॑ प॒शुभिर्ऋ॑ध्यते॒ योऽग्निं॑ चि॒न्वन्न॑धिक्राम॑ति॒  
प्राण॑दा॒ अपा॑न॒दा इत्या॑ह॒ प्रा॒णाने॒वाऽऽत्म॑न्धत्ते॒ वर्चो॑दा॒ वरि॑वो॒दा  
इत्या॑ह॒ प्र॒जा वै वर्चः॑ प॒शवो॑ वरि॑वः॒ प्र॒जामे॒व प॒शूना॑त्मन्धत्त॒ इन्द्रो॑  
वृ॒त्रम॑हन्तं॒ वृत्रो॑ (२१)

हुतः॒ षोड॑शभि॒र्भोगै॑र॒सिना॑त्स ए॒ताम॑ग्नयेऽनी॒कव॑त्  
आहु॑तिमपश्य॒त्ताम॑जुहोत्॒ तस्या॑ग्निरनी॒कवा॑न्ध्वेन॒ भाग॑धेयेन॒ प्रीतः॑  
षोड॑श॒धा वृ॒त्रस्य॑ भो॒गानप्य॑दहद्वैश्व॒कर्म॑णेन॒ पाप्म॑नो॒ निर॑मुच्यत्  
यद॑ग्नयेऽनी॒कव॑त् आहु॑तिं॒ जुहो॑त्य॒ग्निरे॒वास्या॑नी॒कवा॑न्ध्वेन॒  
भाग॑धेयेन॒ प्रीतः॑ पाप्मान॒मपि॑ दहति॒ वैश्व॑कर्म॒णेन॑ पाप्मनो॒

निर्मुच्यते यं कामयेत चिरं पाप्मनो (२२)

निर्मुच्येतेत्येकैकं तस्य जुहुयाच्चिरमेव पाप्मनो निर्मुच्यते  
यं कामयेत ताजक्पाप्मनो निर्मुच्येतेति सर्वाणि तस्यानुद्भूत्य  
जुहुयात्ताजगेव पाप्मनो निर्मुच्यतेऽथो खलु नानैव सूक्ताभ्यां  
जुहोति नानैव सूक्तयोर्वीर्यं दधात्यथो प्रतिष्ठित्यै॥ (२३)

देवाः प्राजापत्यो वृत्रश्चिरं पाप्मनश्चत्वारिंशच्च॥५॥ ————— [५]

उदेनमुत्तरां नयेति समिध आ दधाति यथा जनं यतेश्वसं  
करोति तादृगेव तत्तिष्ठ आ दधाति त्रिवृद्धा अग्निर्यावानेवाग्निस्तस्मै  
भागधेयं करोत्यौदुम्बरीर्भवन्त्यूर्वा उदुम्बर ऊर्जमेवास्मा अपि  
दधात्युदु त्वा विश्वे देवा इत्याह प्राणा वै विश्वे देवाः प्राणै- (२४)

रेवैनमुद्यच्छतेऽग्ने भरन्तु चित्तिभिरित्याह यस्मा एवैनं  
चित्तायोद्यच्छते तेनैवैनं समर्धयति पञ्च दिशो दैवीर्यज्ञमवन्तु  
देवीरित्याह दिशो ह्येषोऽनु प्रच्यवतेऽपामतिं दुर्मतिं बाधमाना  
इत्याह रक्षसामपहत्यै रायस्पोषे यज्ञपतिमाभजन्तीरित्याह पशवो  
वै रायस्पोषः (२५)

पशूनेवाव रुन्धे षड्विंहरति षड्वा ऋतव ऋतुभिरेवैनं  
हरति द्वे परिगृह्यवती भवतो रक्षसामपहत्यै सूर्यरश्मिरुहरिकेशः  
पुरस्तादित्याह प्रसूत्यै ततः पावका आशिषो नो जुषन्तामित्याहान्नं

वै पाव॑कोऽन्न॑मे॒वाव॑ रुन्धे दे॒वासुराः संय॑त्ता आस॒न्ते दे॒वा  
ए॒तदप्र॑तिरथमपश्यन्ते॒न वै तैः॑ऽप्र॒त्य- (२६)

सुरा॑नजयन्तदप्रतिरथस्याप्रतिरथत्वं यदप्रतिरथं द्वितीयो  
होताऽन्वाहा॑प्रत्यै॒व तेन॑ यज॑मानो भ्रातृ॑व्याञ्जयत्यथो अन॑भिजितमे॒वाभि॑  
जय॑ति दश॑र्चं भव॑ति दशा॑क्षरा वि॒राड्विराज॑मौ लो॒कौ  
विधृ॑तावनयो॑र्लो॒कयोर्विधृ॑त्या अथो दशा॑क्षरा वि॒राडन्नं  
वि॒राड्विराज्ये॑वान्नाद्ये॒ प्रति॑ तिष्ठत्यस॑दिव॒ वा अ॒न्तरि॑क्षम॒न्तरि॑क्षमि॒वाग्नी॑  
(२७)

ऽश्मा॑नं नि द॑धाति स॒त्त्वाय॒ द्वाभ्यां॑ प्रति॑ष्ठित्यै वि॒मानं॑ ए॒ष  
दि॒वो मध्यं॑ आस्त॒ इत्या॑हु व्यै॒वैतया॑ मिमी॒ते मध्ये॑ दि॒वो निहि॑तः  
पृश्नि॑रश्मेत्या॒हान्नं॑ वै पृश्न्यन्न॑मे॒वाव॑ रुन्धे चत॑सृभि॒रा पुच्छा॑दिति  
च॒त्वारि॑ छन्दा॑सि॒ छन्दो॑भिरेवेन्द्रं॒ विश्वा॑ अवी॒वृध॑न्नित्या॒हु  
वृद्धि॑मे॒वोपाव॑र्तते॒ वाजा॑ना॒ऽस॒त्पतिं॑ पति॒- (२८)

मित्या॒हान्नं॑ वै वाजोऽन्न॑मे॒वाव॑ रुन्धे सु॒म्रहूर्य॑ज्ञो दे॒वाः आ  
च॑ वक्ष॒दित्या॑ह प्र॒जा वै प॒शवः॑ सु॒म्रं प्र॒जामे॒व प॒शूना॒त्मन्ध॑त्ते  
यक्ष॑दग्नि॒र्देवो॑ दे॒वाः आ च॑ वक्ष॒दित्या॑ह स्व॒गाकृत्यै॑ वाज॑स्य  
मा प्र॑स॒वेनो॑द्भा॒भेणोद॑ग्रभी॒दित्या॑हासौ वा आ॑दित्य उ॒द्यन्नुद्भा॑भ ए॒ष  
नि॒म्रोच॑न्नि॒ग्राभो॑ ब्रह्म॑णै॒वाऽऽत्मानं॑मुद्गृह्णाति॒ ब्रह्म॑णा॒ भ्रातृ॑व्यं नि  
गृह्णाति॥ (२९)

प्राचीमनु॑ प्रदिशं॑ प्रेहिं॑ विद्वानित्या॑ह देवलोकमे॒वैतयो॒पावर्तते॑  
क्रमध्वम॒ग्निना॑ नाक॒मित्या॑हेमाने॒वैतया॑ लोकान्क्रमते॑ पृथिव्या  
अ॒हमुद॑न्तरि॒क्षमारु॑ह॒मित्या॑हेमाने॒वैतया॑ लोकान्स्समारो॑हति  
सुव॒र्यन्तो॒ नापै॑क्षन्त॒ इत्या॑ह सुव॒र्गमे॒वैतया॑ लोकमे॒त्यग्रे॑ प्रेहिं (३०)

प्रथ॒मो दे॒वय॒तामि॒त्याहो॑भये॒ष्वेवैतया॑ देवमनुष्येषु चक्षु॑र्दधाति  
प॒ञ्चभि॑रधि॒ क्राम॑ति पाङ्क्तो॑ य॒ज्ञो यावा॑नेव य॒ज्ञस्तेन॑ सह  
सुव॒र्गं लोक॑मेति॒ नक्तो॑षासेति॒ पुरो॑नुवा॒क्याम॑न्वा॒ह प्र॒त्या अ॒ग्रे  
सह॑स्राक्षेत्या॑ह साह॒स्रः प्र॒जाप॑तिः प्र॒जाप॑ते॒रास्यै॑ तस्मै॑ ते विधेम॒  
वाजा॑य॒ स्वाहे॒त्याहा॑न्तं वै वाजोऽन्नमे॒वाव॑ (३१)

रुन्धे॑ द॒ध्नः पूर्णा॑मौदु॒म्बरी॑ऽ स्वयमातृ॒ण्णाया॑ जुहोत्यू॒र्ग्वै  
दध्यू॑र्गुदु॒म्बरो॒ऽसौ स्व॑यमातृ॒ण्णाऽमुष्या॑मेवोर्जं दधाति॒ तस्मा॑द॒मुतो॒  
ऽर्वाची॑मूर्जमुप॑ जीवामस्ति॒सृभिः॑ सादयति त्रिवृ॒द्धा अ॒ग्निर्यावा॑नेवा॒ग्निस्त  
प्र॑ति॒ष्ठां ग॑मयति॒ प्रेद्धो॑ अ॒ग्रे दी॑दिहि॒ पुरो॑ न॒ इत्यौदु॒म्बरी॑मा दधात्ये॒षा  
वै सू॒र्मी क॑र्णकावत्ये॒तया॑ ह स्म॒ (३२)

वै दे॒वा अ॑सुराणा॒ऽ शत॑त॒रुहा॑ऽस्तृ॒हन्ति॑ यदे॒तया॑  
स॒मिध॑मा॒दधा॑ति व॒ज्रमे॒वैतच्छ॑त॒घ्नीं यज॑मानो भ्रातृ॒व्याय॑ प्र ह॑रति  
स्तृ॒त्या अ॑छ॒म्बद्धारं॑ वि॒धेम॑ ते पर॒मे जन्म॑न्न॒ग्न इति॑ वैक॒ङ्कती॑मा  
द॒धाति॑ भा ए॒वाव॑ रुन्धे॑ ता॒ऽ स॑वि॒तुर्वरे॑ण्यस्य चि॒त्रामि॑ति॒  
शमी॑मयी॒ऽ शान्त्या॑ अ॒ग्निर्वा॑ ह॒ वा अ॑ग्नि॒चितं॑ दुहे॒ऽग्निचि॑द्वाऽग्निं

दुहे ता९ (३३)

संवितुर्वरण्यस्य चित्रामित्याहैष वा अग्नेर्दोहस्तमस्य कण्वं एव  
श्रायसोऽवेत्तेन ह स्मैन९ स दुहे यदेतया समिधमादधात्यग्निचिदेव  
तदग्निं दुहे सप्त ते अग्ने समिधः सप्त जिह्वा इत्याह सप्तैवास्य  
साप्तानि प्रीणाति पूर्णया जुहोति पूर्ण इव हि प्रजापतिः प्रजापते-  
(३४)

रात्यै न्यूनया जुहोति न्यूनाद्धि प्रजापतिः प्रजा असृजत  
प्रजाना९ सृष्ट्या अग्निर्देवेभ्यो निलायत स दिशोऽनु  
प्राविशञ्जुह्वन्मनसा दिशो ध्यायेद्दिग्भ्य एवैनमवं रुन्धे दध्ना  
पुरस्ताञ्जुहोत्याज्येनोपरिष्ठात्तेजश्चैवास्मा इन्द्रियं च समीचीं  
दधाति द्वादशकपालो वैश्वानरो भवति द्वादश मासाः संवत्सरः  
संवत्सरोऽग्निर्वैश्वानरः साक्षा- (३५)

देव वैश्वानरमवं रुन्धे यत्प्रयाजानूयाजान्कुर्याद्विकस्तिः सा  
यज्ञस्य दर्विहोमं करोति यज्ञस्य प्रतिष्ठित्यै राष्ट्रं वै वैश्वानरो  
विष्मरुतो वैश्वानर९ हुत्वा मारुताञ्जुहोति राष्ट्र एव विशमनुं  
बध्नात्युच्चैर्वैश्वानरस्याऽऽ श्रावयत्युपा९शु मारुताञ्जुहोति तस्माद्वाष्ट्रं  
विशमतिं वदति मारुता भवन्ति मरुतो वै देवानां विशो  
देवविशेनैवास्मै मनुष्यविशमवं रुन्धे सप्त भवन्ति सप्तगणा वै  
मरुतो गणश एव विशमवं रुन्धे गणेन गणमनुद्रुत्य जुहोति

विशमेवास्मा अनुवर्त्मानं करोति॥ (३६)

अग्ने प्रेह्यवं स्म दुहे तां प्रजापतेः साक्षान्मनुष्यविशमेकविंशतिश्च॥ ७॥ ————— [७]

वसोर्धारां जुहोति वसोर्मे धारांऽसदिति वा एषा हूयते घृतस्य वा एनमेषा धाराऽमुष्मिल्लोके पिन्वंमानोप तिष्ठत् आज्येन जुहोति तेजो वा आज्यं तेजो वसोर्धारा तेजसैवास्मै तेजोऽव रुन्धेऽथो कामा वै वसोर्धारा कामानेवाव रुन्धे यं कामयेत प्राणानस्यान्नाद्यं वि - (३७)

च्छिन्द्यामिति विग्राहं तस्य जुहुयात्प्राणानेवास्यान्नाद्यं विच्छिनत्ति यं कामयेत प्राणानस्यान्नाद्यं सं तनुयामिति सन्ततां तस्य जुहुयात्प्राणानेवास्यान्नाद्यं सं तेनोति द्वादश द्वादशानि जुहोति द्वादश मासाः संवत्सरः संवत्सरेणैवास्मा अन्नमव रुन्धेऽन्नं च मेऽक्षुच्च म इत्याहैतद्वा (३८)

अन्नस्य रूपं रूपेणैवान्नमव रुन्धेऽग्निश्च म आपश्च म इत्याहैषा वा अन्नस्य योनिः सयोन्येवान्नमव रुन्धेऽर्धेन्द्राणि जुहोति देवता एवाव रुन्धे यत्सर्वेषामर्धमिन्द्रः प्रति तस्मादिन्द्रो देवतानां भूयिष्ठभाक्तं इन्द्रमुत्तरमाहेन्द्रियमेवास्मिन्नुपरिष्ठादधाति यज्ञायुधानि जुहोति यज्ञो (३९)

वै यज्ञायुधानि यज्ञमेवाव रुन्धेऽथो एतद्वै यज्ञस्य रूपं रूपेणैव यज्ञमव रुन्धेऽवभृथश्च मे स्वगाकारश्च म इत्याह

स्व॒गाकृ॑त्या अ॒ग्निश्च॑ मे घ॒र्मश्च॑ म॒ इत्या॑हैतद्वै ब्र॒ह्मव॑र्च॒सस्य॑ रू॒पः  
रू॒पेणै॒व ब्र॒ह्मव॑र्च॒समव॑ रुन्ध॒ ऋक्॑ मे॒ सामं॑ च म॒ इत्या॑है- (४०)

तद्वै छ॒न्दसा॑ रू॒पः रू॒पेणै॒व छ॒न्दाः॑स्य॒व रुन्धे॑  
गर्भा॑श्च मे व॒त्साश्च॑ म॒ इत्या॑हैतद्वै प॒शूना॑ रू॒पः रू॒पेणै॒व  
प॒शून॑व॒ रुन्धे॑ क॒ल्पा॑ञ्जुहोत्य॒क्लृप्त॑स्य॒ क्लृप्त्यै॑ यु॒ग्मद॑यु॒जे जु॑होति  
मिथु॒नत्वायो॑त्तराव॒ती भ॑वतोऽभि॒क्रान्त्या॑ ए॒का च॑ मे ति॒स्रश्च॑ म॒  
इत्या॑ह दे॒वछ॒न्दसं॑ वा ए॒का च॑ ति॒स्रश्च॑ (४१)

म॒नुष्य॑छ॒न्दसं॑ च॒तस्र॑श्चाष्टौ च॒ दे॒वछ॒न्दसं॑ चै॒व म॒नुष्य॑छ॒न्दसं॑  
चा॒व रुन्ध॒ आ त्रय॑स्त्रिंश॒तो जु॑होति॒ त्रय॑स्त्रिंश॒द्वै दे॒वता॑ दे॒वता॑  
ए॒वाव॑ रुन्ध॒ आऽष्टा॑च॒त्वारि॑ंश॒तो जु॑होत्य॒ष्टाच॑त्वारिंश॒दक्षरा॑  
जग॑ती॒ जाग॑ताः प॒शवो॑ जग॑त्यै॒वास्मै॑ प॒शून॑व॒ रुन्धे॑ वा॒जश्च॑  
प्रस॑वश्चेति॒ द्वाद॑शं जु॑होति॒ द्वाद॑श॒ मासाः॑ सं॒वत्सरः॑ सं॒वत्सर॑ ए॒व  
प्रति॑ तिष्ठति॥ (४२)

वि वै य॒ज्ञः सामं॑ च म॒ इत्या॑ह च ति॒स्रश्चै॒कात्रप॑ञ्चाशच्च॥६॥ [८]

अ॒ग्निर्दे॒वेभ्यो॑ऽप्रा॒काम॑द्वा॒गधे॒यमि॒च्छमा॑न॒स्तं दे॒वा अ॑ब्रुव॒न्नुप॑ न  
आ व॑र्तस्व ह॒व्यं नो॑ व॒हेति॒ सोऽब्र॑वी॒द्वरं॑ वृ॒णै म॒ह्यमे॒व वा॑जप्रस॒वीयं॑  
जुह॑वन्निति॒ तस्मा॑द॒ग्नये॑ वा॒जप्रस॑वीयं जुह॒ति यद्वा॑जप्रस॒वीयं॑  
जुहोत्य॒ग्निमे॒व तद्वा॑ग॒धेये॑न॒ सम॑र्धयत्यथो॒ अभिषे॑क ए॒वास्य॑  
स च॑तु॒र्दशभि॑र्जुहोति स॒प्त ग्रा॒म्या ओष॑धयः स॒प्ता- (४३)



ऽऽरुण्या उभयीषामवरुद्धा अन्नस्यान्नस्य जुहोत्यन्नस्यान्नस्यावरु  
 औदुम्बरेण सुवेण जुहोत्यूर्वा उदुम्बर ऊर्गन्नमूर्जैवास्मा  
 ऊर्जमन्नमव रुन्धेऽग्निर्वै देवानामभिषिक्तोऽग्निचिन्मनुष्याणां  
 तस्मादग्निचिद्वर्षति न धावेदवरुद्धः ह्यस्यान्नमन्नमिव खलु वै  
 वरुषं यद्धावेदन्नाद्याद्धावेदुपावर्तेतान्नाद्यमेवाभ्यु- (४४)

पावर्तते नक्तोषासेति कृष्णायै श्वेतवत्सायै पयसा  
 जुहोत्यह्नेवास्मै रात्रिं प्र दापयति रात्रियाऽहरहोरात्रे एवास्मै प्रत्ते  
 काममन्नाद्यं दुहाते राष्ट्रभृतो जुहोति राष्ट्रमेवाव रुन्धे षड्विर्जुहोति  
 षड्वा ऋतवं ऋतुष्वेव प्रति तिष्ठति भुवनस्य पत इति रथमुखे  
 पश्चाऽऽहुतीर्जुहोति वज्रो वै रथो वज्रैणैव दिशो- (४५)

ऽभि जयत्यग्निचितः ह वा अमुष्मिल्लोके वातोऽभि पवते  
 वातनामानि जुहोत्यभ्येवैनममुष्मिल्लोके वातः पवते त्रीणि जुहोति  
 त्रय इमे लोका एभ्य एव लोकेभ्यो वातमव रुन्धे समुद्रोऽसि  
 नभस्वानित्याहैतद्वै वातस्य रूपः रूपेणैव वातमव रुन्धेऽञ्जलिना  
 जुहोति न ह्यैतेषामन्यथाऽऽहुतिरवकल्पते॥ (४६)

ओषधयः सप्ताभि दिशोऽन्यथा द्वे च॥४॥

[९]

सुवर्गाय वै लोकाय देवरथो युज्यते यत्राकूताय मनुष्यरथ एष  
 खलु वै देवरथो यदग्निरग्निं युनज्मि शवंसा घृतेनेत्याह युनक्त्येवैनः  
 स एनं युक्तः सुवर्गं लोकमभि वहति यत्सर्वाभिः पञ्चभिर्युज्याद्युक्तो-

ऽस्याग्निः प्रच्युतः स्यादप्रतिष्ठिता आहुतयः स्युरप्रतिष्ठिताः स्तोमा  
अप्रतिष्ठितान्युक्थानि तिसृभिः प्रातःसवनेऽभि मृशति त्रिवृद् (४७)

वा अग्निर्यावानेवाग्निस्तं युनक्ति यथाऽनसि युक्त आधीयत  
एवमेव तत्प्रत्याहुतयस्तिष्ठन्ति प्रति स्तोमाः प्रत्युक्थानि  
यज्ञायज्ञियस्य स्तोत्रे द्वाभ्यामभि मृशत्येतावान् वै यज्ञो  
यावानग्निष्टोमो भूमा त्वा अस्यात ऊर्ध्वः क्रियते यावानेव  
यज्ञस्तमन्ततोऽन्वारोहति द्वाभ्यां प्रतिष्ठित्या एकयाऽप्रस्तुतं  
भवत्यथा- (४८)

ऽभि मृशत्युपैनुमुत्तरो यज्ञो नमृत्यथो सन्तत्यै प्र वा एषो-  
ऽस्माल्लोकाच्च्यवते योऽग्निं चिनुते न वा एतस्यानिष्टक आहुतिरव-  
कल्पते यां वा एषोऽनिष्टक आहुतिं जुहोति स्रवति वै सा तां  
स्रवन्तीं यज्ञोऽनु परा भवति यज्ञं यजमानो यत्पुनश्चितिं चिनुत  
आहुतीनां प्रतिष्ठित्यै प्रत्याहुतयस्तिष्ठन्ति (४९)

न यज्ञः पराभवति न यजमानोऽष्टावुपं दधात्यष्टाक्षरा गायत्री  
गायत्रेणैवेनं छन्दसा चिनुते यदेकादश त्रैष्टुभेन यद्वादश जागतेन  
छन्दोभिरेवैनं चिनुते नपात्को वै नामैषोऽग्निर्यत्पुनश्चितिर्य एवं  
विद्वान्पुनश्चितिं चिनुत आ तृतीयात्पुरुषादन्नमत्ति यथा वै पुनराधेयं  
एवं पुनश्चितिर्योऽग्न्याधेयेन न- (५०)

ध्नोति स पुनराधेयमा धत्ते योऽग्निं चित्वा नध्नोति स

पुनश्चितिं चिनुते यत्पुनश्चितिं चिनुत ऋद्ध्या अथो खल्वाहुर्न  
 चेतव्येति रुद्रो वा एष यदग्निर्यथा व्याघ्रः सुप्तं बोधयति  
 तादृगेव तदथो खल्वाहुश्चेतव्येति यथा वसीयांसं भागधेयेन  
 बोधयति तादृगेव तन्मनुरग्निमचिनुत तेन नाऽऽर्धोऽथ्स एतां  
 पुनश्चितिमपश्यत्तामचिनुत तया वै स आर्धोऽद्यत्पुनश्चितिं चिनुत  
 ऋद्धौ॥ (५१)

त्रिवृदथ तिष्ठन्त्यग्न्याधेयेन नाचिनुत सप्तदश च॥५॥ [१०]

छन्द्श्चितं चिन्वीत पशुकामः पशवो वै छन्दांसि पशुमानेव  
 भवति श्येनचितं चिन्वीत सुवर्गकामः श्येनो वै वयंसां पतिष्ठः  
 श्येन एव भूत्वा सुवर्गं लोकं पतति कङ्कचितं चिन्वीत यः  
 कामयेत शीर्षण्वानमुष्मिल्लोके स्यामिति शीर्षण्वानेवामुष्मिल्लोके  
 भवत्यलजचितं चिन्वीत चतुःसीतं प्रतिष्ठाकामश्चतस्रो दिशो  
 दिक्ष्वैव प्रति तिष्ठति प्रउगचितं चिन्वीत भ्रातृव्यवान्प्रै- (५२)

व भ्रातृव्यान्नुदत उभयतःप्रउगं चिन्वीत यः कामयेत प्र  
 जातान्भ्रातृव्यान्नुदेय प्रतिजनिष्यमाणानिति प्रैव जातान्भ्रातृव्यान्नुदते  
 प्रति जनिष्यमाणान्नथचक्रचितं चिन्वीत भ्रातृव्यवान् वज्रो वै रथो  
 वज्रमेव भ्रातृव्येभ्यः प्र हरति द्रोणचितं चिन्वीतान्नकामो द्रोणे  
 वा अन्नं भ्रियते सयोन्येवान्नमव रुन्धे समूहं चिन्वीत पशुकामः  
 पशुमानेव भवति (५३)

परिचाय्यं चिन्वीत ग्रामकामो ग्राम्यैव भवति श्मशानचितं  
 चिन्वीत यः कामयेत पितृलोकं ऋध्रुयामिति पितृलोक एवर्ध्नोति  
 विश्वामित्रजमदग्नी वसिष्ठेनास्पर्धेतां स एता जमदग्निर्विह्व्या  
 अपश्यत्ता उपाधत्ता ताभिर्वै स वसिष्ठस्येन्द्रियं वीर्यमवृद्धं  
 यद्विह्व्या उपदधातीन्द्रियमेव ताभिर्वीर्यं यजमानो भ्रातृव्यस्य वृद्धे  
 होतुर्धिष्णिय उप दधाति यजमानायतनं वै (५४)

होता स्व एवास्मां आयतनं इन्द्रियं वीर्यमव रुन्धे द्वादशोप  
 दधाति द्वादशाक्षरा जगती जागताः पशवो जगत्यैवास्मै पशूनव  
 रुन्धेऽष्टावष्टावन्येषु धिष्णियेषूप दधात्यष्टाशफाः पशवः पशून्वाव  
 रुन्धे षण्मांर्जालीये षड्वा ऋतव ऋतवः खलु वै देवाः पितरं ऋतून्व  
 देवान्पितृन्प्रीणाति॥ (५५)

प्र भवति यजमानायतनं वा अष्टाचत्वारिंशच्च॥४॥ [११]

पवंस्व वाजंसातय इत्यनुष्टुक्प्रतिपद्वति तिस्रोऽनुष्टुभश्चतस्रो  
 गायत्रियो यत्तिस्रोऽनुष्टुभस्तस्मादश्वस्त्रिभिस्तिष्ठंस्तिष्ठति  
 यच्चतस्रो गायत्रियस्तस्मात्सर्वाश्चतुरः पदः प्रतिदधत्पलायते  
 परमा वा एषा छन्दसां यदनुष्टुक्परमश्चतुष्टोमः स्तोमानां  
 परमस्त्रिरात्रो यज्ञानां परमोऽश्वः पशूनां परमेणैवैनं परमतां  
 गमयत्येकविंशमहर्भवति (५६)

यस्मिन्नश्वं आलभ्यते द्वादश मासाः पञ्चर्तवस्त्रयं इमे लोका

असावा॑दित्य॒ एक॑वि॒ंश ए॒ष प्र॒जाप॑तिः प्राजाप॒त्योऽश्व॑स्तमे॒व  
सा॒क्षाद॑प्नोति॒ शक्र॑रयः पृ॒ष्ठं भ॑वन्त्यन्यद॒न्यच्छ॑न्दोऽन्ये॑न्ये वा ए॒ते  
प॒शव॑ आ ल॒भ्यन्त॑ उ॒तेव॑ ग्रा॒म्या उ॒तेवा॑रण्या यच्छ॒क्ररयः॑ पृ॒ष्ठं  
भ॑वन्त्यश्व॑स्य सर्व॒त्वाय॑ पार्थुर॒श्मं ब्र॑ह्मसा॒मं भ॑वति र॒श्मिना॒ वा  
अश्वो॑ (५७)

य॒त ई॒श्वरो॑ वा अश्वोऽय॒तोऽप्र॑तिष्ठितः परा॑ं परा॒वतं॑  
गन्तो॒र्यत्पा॑र्थुर॒श्मं ब्र॑ह्मसा॒मं भ॑वत्यश्व॑स्य य॒त्यै धृ॒त्यै सङ्क॑त्यच्छावाकसा॒  
भ॑वत्यु॒त्सन्न॑य॒ज्ञो वा ए॒ष यद॑श्वमे॒धः क॑स्तद्वेदे॒त्याहु॑र्यदि॒ सर्वो॑ वा  
क्रि॒यते॒ न वा॒ सर्व॑ इति॒ यत्सङ्क॑त्यच्छावाकसा॒मं भ॑वत्यश्व॑स्य  
सर्व॒त्वाय॑ पर्या॒प्त्या अन॑न्तरायाय॒ सर्व॑स्तोमोऽतिरा॒त्र उ॑त्त॒मम॑हर्भवति॒  
सर्व॑स्याऽऽस्यै॒ सर्व॑स्य॒ जित्यै॒ सर्व॑मे॒व तेना॑ऽऽप्नोति॒ सर्व॑  
जयति॥ (५८)

अहर्भवति॒ वा अश्वो॑ऽहर्भवति॒ दशं॑ च॥३॥ ————— [१२]

दे॒वा॒सुराः॑ तेन॒र्तव्या॑ रु॒द्रोऽश्म॑न्वृषदे॒ वडु॑दे॒नं प्रा॒चीमि॑ति॒ वसो॑र्धारा॒मग्नि॑र्दे॒वेभ्यः॑ सुव॒र्गाय॑ यत्राकृ॒ताय॑

छन्दश्चितं॒ पव॑स्व॒ द्वाद॑श॥१२॥

दे॒वा॒सुरा॑ अ॒जायां॑ वै श्रु॒मुष्टिः॑ प्र॒थ॒मो दे॒वय॑तामे॒तद्वै छ॑न्द॒सामृ॑धोत्य॒ष्टौ प॑ञ्चाशत्॥५८॥

दे॒वा॒सुराः॑ सर्वं॑ जयति॥

हरिः ॐ॥

॥कृष्ण-यजुर्वेदीय-तैत्तिरीय-संहितायां पञ्चमकाण्डे चतुर्थः प्रश्नः

समाप्तः॥५-४॥

## ॥ पञ्चमः प्रश्नः ॥

## ॥ तैत्तिरीयसंहितायां पञ्चमकाण्डे पञ्चमः प्रश्नः ॥

यदेकेन सऽस्थापयति यज्ञस्य सन्तत्या अविच्छेदायैन्द्राः  
 पशवो ये मुष्करा यदैन्द्राः सन्तोऽग्निभ्य आलभ्यन्ते देवताभ्यः  
 समदं दधात्याग्नेयीस्त्रिष्टुभो याज्यानुवाक्याः कुर्याद्यदाग्नेयीस्तेना-  
 ऽऽग्नेया यत् त्रिष्टुभस्तेनैन्द्राः समृद्धौ न देवताभ्यः समदं दधाति  
 वायवे नियुत्वते तूपरमा लभते तेजोऽग्नेर्वायुस्तेजस एष आ लभ्यते  
 तस्माद्यद्रियङ् वायुर्- (१)

वाति तद्रियङ्गिर्दहति स्वमेव तत्तेजोऽन्वेति यत्र नियुत्वते  
 स्यादुन्माद्येद्यजमानो नियुत्वते भवति यजमानस्यानुन्मादाय  
 वायुमती श्वेतवती याज्यानुवाक्ये भवतः सतेजस्त्वायं हिरण्यगर्भः  
 समवर्तताग्र इत्याधारमा धारयति प्रजापतिर्वै हिरण्यगर्भः  
 प्रजापतेरनुरूपत्वाय सर्वाणि वा एष रूपाणि पशूनां प्रत्या लभ्यते  
 यच्छ्रुणस्तत् (२)

पुरुषाणां रूपं यत्तूपरस्तदश्वानां यदन्यतोदन्तद्ववां  
 यदव्या इव शफास्तदवीनां यदजस्तदजानां वायुर्वै पशूनां  
 प्रियं धाम यद्वायव्यो भवत्येतमेवैनमभि संजानानाः पशव उप  
 तिष्ठन्ते वायव्यः कार्या(३)ऽऽऽऽ प्राजापत्या(३) इत्याहुयद्वायव्यं  
 कुर्यात्प्रजापतेरियाद्यत्प्राजापत्यं कुर्याद्वायो- (३)

रियाद्यद्वायव्यः पशुर्भवति तेन वायोर्नैति यत्प्राजापत्यः  
 पुरोडाशो भवति तेन प्रजापतेर्नैति यद्वादशकपालस्तेन  
 वैश्वानरात्रेत्याग्रावैष्णवमेकादशकपालं निर्वपति दीक्षिष्यमाणो-  
 ऽग्निः सर्वा देवता विष्णुर्यज्ञो देवताश्चैव यज्ञं चाऽऽरभतेऽग्निरवमो  
 देवतानां विष्णुः परमो यदाग्रावैष्णवमेकादशकपालं निर्वपति  
 देवता (४)

एवोभयतः परिगृह्य यजमानोऽव रुन्धे पुरोडाशेन वै देवा  
 अमुष्मिल्लोक आर्ध्रुवश्चरुणाऽस्मिन् यः कामयेतामुष्मिल्लोक  
 ऋध्रुयामिति स पुरोडाशं कुर्वीतामुष्मिन्नेव लोकं ऋध्नोति  
 यदष्टाकपालस्तेनाऽऽग्नेयो यत् त्रिकपालस्तेन वैष्णवः समृद्धौ  
 यः कामयेतास्मिल्लोकं ऋध्रुयामिति स चरुं कुर्वीताग्नेर्धृतं  
 विष्णोस्तण्डुलास्तस्मा- (५)

चरुः कार्योऽस्मिन्नेव लोकं ऋध्नोत्यादित्यो भवतीयं वा  
 अदितिर्स्यामेव प्रति तिष्ठत्यथो अस्यामेवार्धिं यज्ञं तनुते यो वै  
 संवत्सरमुख्यमभृत्वाऽग्निं चिनुते यथा सामि गर्भोऽवपद्यते तादृगेव  
 तदार्तिमार्च्छद्वैश्वानरं द्वादशकपालं पुरस्तान्निर्वपेत्संवत्सरो वा  
 अग्निर्वैश्वानरो यथा संवत्सरमात्वा (६)

काल आगते विजायत एवमेव संवत्सरमात्वा काल  
 आगतेऽग्निं चिनुते नार्तिमार्च्छत्येषा वा अग्नेः प्रिया तनूर्यद्वैश्वानरः



प्रियामेवास्यं तनुवमव रुन्धे त्रीण्येतानि हवींषि भवन्ति त्रयं  
इमे लोका एषां लोकानां रोहाय॥ (७)

यद्रियङ्ङायुर्यच्चशृणस्तद्वायोर्निर्वपति देवतास्तस्मादात्वाष्टात्रिंशच्च॥ ७ ॥ ————— [१]

प्रजापतिः प्रजाः सृष्ट्वा प्रेणानु प्राविशत्ताभ्यः पुनः सम्भावितुं  
नाशक्रोत्सोऽब्रवीदृध्रवदिथ्स यो मेतः पुनः सञ्चिनवदिति तं देवाः  
समचिन्वन्ततो वै त आर्ध्रुवन् यत्समचिन्वन्तच्चित्यस्य चित्यत्वं य  
एवं विद्वानग्निं चिनुत ऋध्रोत्येव कस्मै कमग्निश्चीयत इत्याहुरग्निवा-  
(८)

नसानीति वा अग्निश्चीयतेऽग्निवानेव भवति कस्मै  
कमग्निश्चीयत इत्याहुर्देवा मा वेदन्निति वा अग्निश्चीयते विदुरेनं  
देवाः कस्मै कमग्निश्चीयत इत्याहुर्गृह्यसानीति वा अग्निश्चीयते  
गृह्येव भवति कस्मै कमग्निश्चीयत इत्याहुः पशुमानसानीति वा  
अग्नि- (९)

श्चीयते पशुमानेव भवति कस्मै कमग्निश्चीयत इत्याहुः सप्त  
मा पुरुषा उप जीवानिति वा अग्निश्चीयते त्रयः प्राञ्चस्त्रयः प्रत्यं  
च आत्मा सप्तम एतावन्त एवेनममुष्मिल्लोक उप जीवन्ति प्रजा-  
पतिरग्निमचिकीषत तं पृथिव्यब्रवीन्न मय्यग्निं चैष्यसेति मा धक्ष्यति  
सा त्वातिदह्यमाना वि धविष्ये (१०)

स पापीयान्भविष्यसीति सोऽब्रवीत्तथा वा अहं करिष्यामि  
यथा त्वा नातिधक्ष्यतीति स इमामभ्यमृशत् प्रजापतिस्त्वा

सादयतु तया देवतयाऽङ्गिरस्वद्ध्रुवा सीदेतीमामेवेष्टकां  
कृत्वोपाधत्तानतिदाहाय यत्प्रत्यग्निं चिन्वीत तदभि मृशेत्प्रजा-  
पतिस्त्वा सादयतु तया देवतयाऽङ्गिरस्वद्ध्रुवा सीदे- (११)

तीमामेवेष्टकां कृत्वोप धत्तेऽनतिदाहाय प्रजापतिरकामयतु  
प्र जायेयेति स एतमुख्यमपश्यत्तः संवत्सरमबिभस्ततो वै स  
प्राजायत तस्मात्संवत्सरं भार्यः प्रैव जायते तं वसवोऽब्रुवन्  
त्वमजनिष्ठा वयं प्र जायामहा इति तं वसुभ्यः प्रायच्छुतं  
त्रीण्यहान्यबिभरुस्तेन (१२)

त्रीणि च शतान्यसृजन्त त्रयस्त्रिंशतं च तस्मात् त्र्यहं भार्यः  
प्रैव जायते तान्नुद्रा अब्रुवन् ययमजनिद्वं वयं प्र जायामहा  
इति तः रुद्रेभ्यः प्रायच्छन्तः षडहान्यबिभरुस्तेन त्रीणि च  
शतान्यसृजन्त त्रयस्त्रिंशतं च तस्मात्षडहं भार्यः प्रैव जायते  
तानादित्या अब्रुवन् ययमजनिद्वं वयं (१३)

प्र जायामहा इति तमादित्येभ्यः प्रायच्छन्तं द्वादशाहान्यबिभरुस्ते  
त्रीणि च शतान्यसृजन्त त्रयस्त्रिंशतं च तस्माद्द्वादशाहं भार्यः प्रैव  
जायते तेन वै ते सहस्रमसृजन्तोऽखाः सहस्रतमीं य एवमुख्यः  
साहस्रं वेद प्र सहस्रं पशूनांप्रोति॥ (१४)

अग्निवान्यशुमानं सानीति वा अग्निर्धिव्ये मृशेत्प्रजापतिस्त्वा सादयतु तया देवतयाऽङ्गिरस्वद्ध्रुवा सीद

तेन तानादित्या अब्रुवन् ययमजनिद्वं वयश्चत्वारिंशच्च॥७॥

यजुषा वा एषा क्रियते यजुषा पच्यते यजुषा वि मुच्यते  
 यदुखा सा वा एषैतरहि यातयाम्नी सा न पुनः प्रयुज्येत्याहुरग्रे  
 युक्ष्वा हि ये तव युक्ष्वा हि देवहूतमा९ इत्युखायां जुहोति तेनैवेनां  
 पुनः प्र युङ्क्ते तेनायातयाम्नी यो वा अग्निं योग आगते युनक्ति युङ्क्ते  
 युञ्जानेष्वग्रे (१५)

युक्ष्वा हि ये तव युक्ष्वा हि देवहूतमा९ इत्याहैष वा  
 अग्रेर्योगस्तेनैवेनं युनक्ति युङ्क्ते युञ्जानेषु ब्रह्मवादिनो वदन्ति  
 न्यङ्कुग्निश्चेतव्या(३) उत्ताना(३) इति वयंसां वा एष प्रतिमया  
 चीयते यदग्निर्यन्यश्च चिनुयात्पृष्टित एनमाहुतय ऋच्छेयुर्यदुत्तानं  
 न पतितु९ शक्रयादसुवर्ग्योऽस्य स्यात्प्राचीनमुत्तानं (१६)

पुरुषशीर्षमुप दधाति मुखत एवैनमाहुतय ऋच्छन्ति नोत्तानं  
 चिनुते सुवर्ग्योऽस्य भवति सौर्या जुहोति चक्षुरेवास्मिन्प्रति दधाति  
 द्विर्जुहोति द्वे हि चक्षुषी समान्या जुहोति समान९ हि चक्षुः  
 समृद्धौ देवासुराः संयत्ता आसन्ते वामं वसु सं न्यदधत तद्देवा  
 वामभृतावृञ्जत तद्वामभृतो वामभृत्त्वं यद्वामभृतमुपदधाति वाममेव  
 तथा वसु यजमानो भ्रातृव्यस्य वृङ्क्ते हिरण्यमूर्ध्नी भवति ज्योतिर्वै  
 हिरण्यं ज्योतिर्वामं ज्योतिषैवास्य ज्योतिर्वामं वृङ्क्ते द्वियजुर्भवति  
 प्रतिष्ठित्यै॥ (१७)

आपो वरुणस्य पत्न्य आसन्ता अग्निरभ्यध्यायत्ताः  
 समभवत्तस्य रेतः परापतत् तदियमभवद्यद् द्वितीयं परापतत्  
 तदसावभवदियं वै विराडसौ स्वराड्यद् विराजावुपदधातीमे  
 एवोप धत्ते यद्वा असौ रेतः सिञ्चति तदस्यां प्रति तिष्ठति तत्प्र  
 जायते ता ओषधयो (१८)

वीरुधो भवन्ति ता अग्निरत्ति य एवं वेद प्रैव जायते-  
 ऽन्नादो भवति यो रेतस्वी स्यात्प्रथमायां तस्य चित्यामुभे  
 उप दध्यादिमे एवास्मै समीची रेतः सिञ्चतो यः सिक्तरैताः  
 स्यात्प्रथमायां तस्य चित्यामन्यामुप दध्यादुत्तमायामन्याः रेत  
 एवास्य सिक्तमाभ्यामुभयतः परि गृह्णाति संवत्सरं न कं (१९)

चन प्रत्यवरोहेन्न हीमे कं चन प्रत्यवरोहतस्तदेनयोर्व्रतं यो  
 वा अपशीर्षाणमग्निं चिनुतेऽपशीर्षाऽमुष्मिल्लोके भवति यः  
 सशीर्षाणं चिनुते सशीर्षाऽमुष्मिल्लोके भवति चित्तिं जुहोमि  
 मनसा घृतेन यथा देवा इहागमन्वीतिहोत्रा ऋतावृधः समुद्रस्य  
 वयुनस्य पत्नञ्जुहोमि विश्वकर्मणे विश्वाऽहाऽमर्त्यः हविरिति  
 स्वयमातृणामुपधाय जुहो- (२०)

त्येतद्वा अग्नेः शिरः सशीर्षाणमेवाग्निं चिनुते सशीर्षा-  
 ऽमुष्मिल्लोके भवति य एवं वेद सुवर्गाय वा एष लोकाय  
 चीयते यदग्निस्तस्य यदयथापूर्वं क्रियतेऽसुवर्ग्यमस्य तत्सुवर्ग्यो-

ऽग्निश्चितिमुपधायाभि मृशेच्चित्तिमचित्तिं चिनवद्वि विद्वान्पृष्ठेव  
 वीता वृजिना च मर्तात्राये च नः स्वपत्याय देव दिति च  
 रास्वादिति मुरुष्येति यथापूर्वमेवैनामुप धत्ते प्राञ्चमेनं चिनुते  
 सुवर्ग्योऽस्य भवति॥ (२१)

ओषधयः कर्जुहोति स्वपत्यायाष्टादश च॥४॥ [४]

विश्वकर्मा दिशां पतिः स नः पशून्पातु सोऽस्मान्पातु तस्मै  
 नमः प्रजापती रुद्रो वरुणोऽग्निर्दिशां पतिः स नः पशून्पातु सो-  
 ऽस्मान्पातु तस्मै नम एता वै देवता एतेषां पशूनामधिपतयस्ताभ्यो  
 वा एष आ वृश्च्यते यः पशुशीर्षाण्युपदधाति हिरण्येष्टका उप  
 दधात्येताभ्य एव देवताभ्यो नमस्करोति ब्रह्मवादिनो (२२)

वदन्त्यग्नौ ग्राम्यान्पशून् दधाति शुचाऽऽरण्यानर्पयति किं तत्  
 उच्छिष्टं षतीति यद्विरण्येष्टका उपदधात्यमृतं वै हिरण्यममृतेनैव  
 ग्राम्येभ्यः पशुभ्यो भेषजं करोति नैनान् हिनस्ति प्राणो वै प्रथमा  
 स्वयमातृणा व्यानो द्वितीयाऽपानस्तृतीयाऽनु प्राण्यात्प्रथमाऽ  
 स्वयमातृणामुपधाय प्राणेनैव प्राणं समर्धयति व्यन्याद् (२३)

द्वितीयांमुपधाय व्यानेनैव व्यानं समर्धयत्यपान्यात्तृतीयांमुपधा-  
 य समर्धयत्यथो प्राणैरेवैनं समिन्द्रे भूर्भुवः सुवरिति स्वयमा-  
 तृणा उप दधातीमे वै लोकाः स्वयमातृणा एताभिः खलु वै  
 व्याहृतीभिः प्रजापतिः प्राजायत यदेताभिर्व्याहृतीभिः स्वयमातृणा

उप॒दधा॑ती॒माने॒व लो॒कानु॑प॒धायै॑षु (२४)

लो॒केष्वधि॑ प्र जा॒यते प्रा॒णाय॑ व्या॒नाया॑पा॒नाय॑ वा॒चे त्वा॒  
चक्षु॑षे त्वा॒ तया॑ दे॒वत॑याऽङ्गि॒रस्व॑द्धु॒वा सी॑दा॒ग्निना॑ वै दे॒वाः सु॑व॒र्गं  
लो॒कम॑जिगा॒ं सन्ते॒न प॑तितुं नाश॑कृ॒वन्त ए॒ताश्च॑त॒स्रः स्व॑यमा॒तृणा॑  
अ॒पश्य॑न्ता दि॒क्षूप॑दधत् तेन॑ स॒र्वत॑श्चक्षुषा सु॒वर्गं लो॒कमा॑यन्  
यच्च॑त॒स्रः स्व॑यमा॒तृणा॑ दि॒क्षूप॑दधा॒ति स॒र्वत॑श्चक्षुषै॒व तद॑ग्निना॒  
यज॑मानः सु॒वर्गं लो॒कमे॑ति॥ (२५)

ब्रह्मवादिनो व्यन्यादेषु यजमानस्त्रीणि च॥४॥ [५]

अग्र॒ आ या॑हि वी॒तय॒ इत्या॒हाह॑तै॒वैन॑म॒ग्निं दू॑तं वृ॒णीम॑ह  
इत्या॑ह हू॒त्वैवैनं॑ वृणी॒तेऽग्नि॑ना॒ऽग्निः समि॑ध्यत् इत्या॑ह॒ समि॑न्द्र  
ए॒वैन॑म॒ग्निर्वृ॑त्राणि जङ्घ॒नदि॒त्याह॑ समि॑द्ध ए॒वास्मि॑न्निन्द्रि॒यं द॑धात्य॒ग्नेः  
स्तोमं॑ मनाम॒ह इत्या॑ह मनु॒त ए॒वैन॑मे॒तानि॒ वा अ॒ह्नां रू॒पाण्य॑-  
(२६)

न्व॒हमे॒वैनं॑ चिनु॒तेऽवा॒ह्नां रू॒पाणि॑ रुन्धे ब्रह्मवा॒दिनो॑  
वदन्ति॒ कस्मा॑त्स॒त्याद्या॑तया॒ग्नीर॑न्या इष्ट॑का अया॑तया॒ग्नी  
लो॒कम्पृ॑णेत्यै॒न्द्राग्नी॑ हि बा॒रह॑स्प॒त्येति॑ ब्रूयादिन्द्रा॒ग्नी च॒ हि दे॒वानां॑  
बृह॑स्पतिश्चाया॑तयामा॒नोऽनु॑च॒रव॑ती भव॒त्यजा॑मित्वा॒यानु॑ष्टुभाऽनु॑  
चर॑त्या॒त्मा वै लो॒कम्पृ॑णा प्रा॒णोऽनु॑ष्टु॒प्तस्मा॑त्प्रा॒णः सर्वा॑ण्यङ्गान्यनु॑  
चर॑ति॒ ता अ॑स्य॒ सूद॑दोह॒स (२७)

इत्याह तस्मात्पुरुषिपरुषि रसः सोमः श्रीणन्ति पृश्नय  
 इत्याहान्नं वै पृश्नयन्नमेवाव रुन्धेऽर्को वा अग्निरर्कोऽन्नमन्नमेवाव  
 रुन्धे जन्म देवानां विशस्त्रिष्वा रोचने दिव इत्याहेमानेवासमै  
 लोकाञ्ज्योतिष्मतः करोति यो वा इष्टकानां प्रतिष्ठां वेद प्रत्येव  
 तिष्ठति तया देवतयाऽङ्गिरस्वद्ध्रुवा सीदेत्याहैषा वा इष्टकानां  
 प्रतिष्ठा य एवं वेद प्रत्येव तिष्ठति॥ (२८)

रूपाणि सूर्यदोहसस्तया षोडश च॥३॥ \_\_\_\_\_[६]

सुवर्गाय वा एष लोकाय चीयते यदग्निर्वज्रं एकादशिनी  
 यदग्नावैकादशिनीं मिनुयाद्वज्रेणैव सुवर्गाल्लोकादन्तर्दध्याद्यन्न  
 मिनुयात्स्वरुभिः पशून्व्यर्धयेदेकयूपं मिनोति नैनं वज्रेण  
 सुवर्गाल्लोकादन्तर्दधाति न स्वरुभिः पशून्व्यर्धयति वि वा एष  
 इन्द्रियेण वीर्येणर्ध्यते योऽग्निं चिन्वन्नधिक्रामत्यैन्द्रिया (२९)

ऋचाक्रमणं प्रतीष्टकामुप दध्यान्नेन्द्रियेण वीर्येण व्यध्यते रुद्रो  
 वा एष यदग्निस्तस्य तिस्रः शरव्याः प्रतीची तिरश्च्यनूची ताभ्यो  
 वा एष आ वृश्च्यते योऽग्निं चिनुतेऽग्निं चित्वा तिसृधन्वमयाचितं  
 ब्राह्मणाय दद्यात्ताभ्य एव नमस्करोत्यथो ताभ्य एवात्मानं  
 निष्क्रीणीते यत्ते रुद्र पुरः (३०)

धनुस्तद्वातो अनु वातु ते तस्मै ते रुद्र संवत्सरेण नमस्करोमि  
 यत्ते रुद्र दक्षिणा धनुस्तद्वातो अनु वातु ते तस्मै ते रुद्र परिवत्सरेण

नमस्करोमि॒ यत्ते॑ रु॒द्र प॒श्चाद्धनु॒स्तद्वातो॒ अनु॑ वातु ते॒ तस्मै॑ ते  
रु॒द्रेदाव॑त्स॒रेण॒ नमस्करोमि॒ यत्ते॑ रु॒द्रोत्तरा॑द्धनुस्तत् (३१)

वातो॒ अनु॑ वातु ते॒ तस्मै॑ ते रु॒द्रेदुव॑त्स॒रेण॒ नमस्करोमि॒ यत्ते॑  
रु॒द्रोपरि॑ धनुस्तद्वातो॒ अनु॑ वातु ते॒ तस्मै॑ ते रु॒द्र व॑त्स॒रेण॒ नमस्करोमि॒  
रु॒द्रो वा ए॒ष यद॑ग्निः स यथा॑ व्याघ्रः क्रुद्धस्तिष्ठत्ये॒वं वा ए॒ष ए॒तर॑हि  
सञ्चित॑मे॒तैरुप॑ तिष्ठते नमस्का॒रैरे॒वैन॑ः शमयति॒ यैऽग्नयः॑ (३२)

पु॒री॒ष्याः प्रवि॑ष्टाः पृथि॒वीमनु॑। तेषां॒ त्वम॑स्युत्त॒मः प्र णो॑  
जी॒वात॑वे सु॒वा। आपं॑ त्वाऽग्ने॒ मन॑सापं॒ त्वाऽग्ने॒ तप॑सापं॒  
त्वाऽग्ने॒ दी॒क्षयापं॑ त्वा॒ग्न उप॑सद्भिरापं॒ त्वाऽग्ने॒ सु॒त्ययापं॑ त्वाऽग्ने॒  
दक्षि॑णाभिरापं॒ त्वाऽग्ने॒ऽवभृ॑थेनापं॒ त्वाऽग्ने॒ व॒शयापं॑ त्वाऽग्ने॒  
स्वगा॑का॒रेणेत्या॑हैषा वा अ॒ग्नेरा॑तिस्तयै॒वैन॑माप्रोति॥ (३३)

ऐन्द्रिया पुर उ॒त्तरा॑द्धनुस्तद॒ग्नयं॑ आहा॒ष्टौ च॥५॥ ————— [७]

गा॒य॒त्रेण॑ पु॒रस्ता॒दुप॑ तिष्ठते प्रा॒णमे॒वास्मि॑न्दधाति बृह॒द्रथन्त॑रा॒  
भ्यां॑ प॒क्षावो॑जं ए॒वास्मि॑न्दधात्यृ॒तुस्था॑य॒ज्ञाय॑ज्ञि॒येन॒ पुच्छं॑मृ॒तुष्वे॒व  
प्रति॑ तिष्ठति पृ॒ष्ठैरुप॑ तिष्ठते तेजो॒ वै पृ॒ष्ठानि॑ तेजं ए॒वास्मि॑न्दधाति  
प्र॒जाप॑तिर॒ग्निम॑सृजत॒ सौऽस्मा॑त्सृष्टः परा॑डै॒त्तं वा॑रव॒न्तीय॑नावा॒रय॑त॒  
तद्वा॑रव॒न्तीय॑स्य वा॒रव॑न्तीय॒त्वः श्यै॑तेन॒ श्ये॑ती अ॒कुरु॑त॒ तच्छै॑तस्य  
श्यै॑त॒त्वम् (३४)

यद्वा॑रव॒न्तीय॑नोप॒तिष्ठ॑ते वा॒रय॑त ए॒वैन॑ः श्यै॑तेन॒ श्ये॑ती कु॒रुते



प्रजापतेरुहदयेनापिपक्षं प्रत्युपं तिष्ठते प्रेमाणमेवास्य गच्छति  
 प्राच्यां त्वा दिशा सादयामि गायत्रेण छन्दसाग्निना देवतयाग्नेः  
 शीर्ष्णाग्नेः शिर उपं दधामि दक्षिणया त्वा दिशा सादयामि त्रैष्टुभेन  
 छन्दसेन्द्रेण देवतयाग्नेः पक्षेणाग्नेः पक्षमुपं दधामि प्रतीच्यां त्वा  
 दिशा सादयामि (३५)

जागतेन छन्दसा सवित्रा देवतयाग्नेः पुच्छेनाग्नेः पुच्छमुपं  
 दधाम्युदीच्या त्वा दिशा सादयाम्यानुष्टुभेन छन्दसा मित्रावरुणाभ्यां  
 देवतयाग्नेः पक्षेणाग्नेः पक्षमुपं दधाम्यूर्ध्वयां त्वा दिशा सादयामि  
 पाङ्केन छन्दसा बृहस्पतिना देवतयाग्नेः पृष्ठेनाग्नेः पृष्ठमुपं दधामि  
 यो वा अपात्मानमग्निं चिनुतेऽपात्मा मुष्मिल्लोके भवति यः सात्मानं  
 चिनुते सात्मा मुष्मिल्लोके भवत्यात्मेष्टका उपं दधात्येष वा अग्नेरात्मा  
 सात्मानमेवाग्निं चिनुते सात्मा मुष्मिल्लोके भवति य एवं वेद॥ (३६)

श्येतत्वं प्रतीच्यां त्वा दिशा सादयामि यः सात्मानञ्चिनुते द्वाविंशतिश्च॥३॥ ——— [८]

अग्रं उदधे या त इषुर्युवा नाम तया नो मृड तस्यास्ते  
 नमस्तस्यास्त उप जीवन्तो भूयास्माग्ने दुध्र गह्य किंशिल वन्य  
 या त इषुर्युवा नाम तया नो मृड तस्यास्ते नमस्तस्यास्त उप  
 जीवन्तो भूयास्म पञ्च वा एतेऽग्नयो यच्चितय उदधिरेव नाम प्रथमो  
 दुध्रः (३७)

द्वितीयो गह्यस्तृतीयः किंशिलश्चतुर्थो वन्यः पञ्चमस्तेभ्यो

यदाहुतीर्न जुहुयादध्वर्युं च यजमानं च प्र दहेयुर्यदेता  
 आहुतीर्जुहोति भागधेयेनैवैनञ्छमयति नार्तिमाच्छत्यध्वर्युर्न  
 यजमानो वाङ्म आसन्नसोः प्राणोऽक्ष्योश्चक्षुः कर्णयोः श्रोत्रं  
 बाहुवोर्बलमूरुवोरोजोऽरिष्टा विश्वान्यङ्गानि तनूः (३८)

तनुवां मे सह नमस्ते अस्तु मा मां हिंसीरप वा  
 एतस्मात्प्राणाः क्रामन्ति योऽग्निं चिन्वन्नधिक्रामति वाङ्म  
 आसन्नसोः प्राण इत्याह प्राणानेवाऽऽत्मन्धत्ते यो रुद्रो अग्नौ यो  
 अप्सु य ओषधीषु यो रुद्रो विश्वा भुवनाविवेश तस्मै रुद्राय  
 नमो अस्त्वाहुतिभागा वा अन्ये रुद्रा हविर्भागाः (३९)

अन्ये शतरुद्रीयः हुत्वा गावीधुकं चरुमेतेन यजुषा  
 चरमायामिष्टकायां नि दध्याद्भागधेयेनैवैनं शमयति तस्य त्वे  
 शतरुद्रीयः हुतमित्याहुयस्यैतदग्नौ क्रियत इति वसवस्त्वा  
 रुद्रैः पुरस्तात्पान्तु पितरस्त्वा यमराजानः पितृभिर्दक्षिणतः  
 पान्त्वादित्यास्त्वा विश्वैर्देवैः पश्चात्पान्तु द्युतानस्त्वा मारुतो  
 मरुद्भिरुत्तरतः पातु (४०)

देवास्त्वेन्द्रज्येष्ठा वरुणराजानोऽधस्ताच्चोपरिष्टाच्च पान्तु न वा  
 एतेन पूतो न मेध्यो न प्रोक्षितो यदेनमतः प्राचीनं प्रोक्षति  
 यत्सञ्चितमाज्येन प्रोक्षति तेन पूतस्तेन मेध्यस्तेन प्रोक्षितः॥ (४१)

समीची नामासि प्राची दिक्तस्यास्तेऽग्निरधिपतिरसितो रक्षिता  
 यश्चाधिपतिर्यश्च गोप्ता ताभ्यां नमस्तौ नो मृडयतान्ते यं द्विष्मो यश्च  
 नो द्वेष्टि तं वां जम्भे दधाम्योजस्विनी नामासि दक्षिणा दिक्तस्यास्त  
 इन्द्रोऽधिपतिः पृदाकुः प्राची नामासि प्रतीची दिक्तस्यास्ते (४२)

सोमोऽधिपतिः स्वजोऽवस्थावा नामास्युदीची दिक्तस्यास्ते  
 वरुणोऽधिपतिस्तिरश्चराजिरधिपती नामासि बृहती दिक्तस्यास्ते  
 बृहस्पतिरधिपतिः श्वित्रो वशिनी नामासीयं दिक्तस्यास्ते यमोऽधि-  
 पतिः कल्माषग्रीवो रक्षिता यश्चाधिपतिर्यश्च गोप्ता ताभ्यां नमस्तौ  
 नो मृडयतान्ते यं द्विष्मो यश्च (४३)

नो द्वेष्टि तं वां जम्भे दधाम्येता वै देवता अग्निं चित् रक्षन्ति  
 ताभ्यो यदाहुतीर्न जुहुयादध्वर्युं च यजमानं च ध्यायेयुर्यदेता  
 आहुतीर्जुहोति भागधेयेनैवेनाञ्छमयति नार्तिमाच्छत्यध्वर्युर्न  
 यजमानो हेतयो नाम स्थ तेषां वः पुरो गृहा अग्निर्व इषवः  
 सलिलो निलिम्पा नाम (४४)

स्थ तेषां वो दक्षिणा गृहाः पितरो व इषवः सगरो वज्रिणो  
 नाम स्थ तेषां वः पश्चाद्गृहाः स्वप्नो व इषवो गह्वरोऽवस्थावानो  
 नाम स्थ तेषां व उत्तराद्गृहा आपो व इषवः समुद्रोऽधिपतयो नाम  
 स्थ तेषां व उपरि गृहा वरुणं व इषवोऽवस्वान्क्रव्या नाम स्थ  
 पार्थिवास्तेषां व इह गृहाः (४५)

अन्नं व इषवो निमिषो वातनामन्तेभ्यो वो नमस्ते नो मृडयत  
 ते यं द्विष्मो यश्च नो द्वेष्टि तं वो जम्भे दधामि हुतादो वा अन्ये  
 देवा अहुतादोऽन्ये तानग्निचिदेवोभयान्प्रीणाति दध्ना मधुमिश्रेणैता  
 आहुतीर्जुहोति भागधेयेनैवैनान्प्रीणात्यथो खल्वाहुरिष्टका वै देवा  
 अहुताद इति (४६)

अनुपरिक्रामं जुहोत्यपरिवर्गमेवैनान्प्रीणातीमं स्तनमूर्जस्वन्तं  
 धयापां प्रप्यातमग्ने सरिरस्य मध्ये। उथ्सं जुषस्व मधुमन्तमूर्वं  
 समुद्रियं सदनमा विशस्व। यो वा अग्निं प्रयुज्य न विमुञ्चति  
 यथाश्वो युक्तोऽविमुच्यमानः क्षुध्यन्पराभवत्येवमस्याग्निः परा  
 भवति तं पराभवन्तं यजमानोऽनु परा भवति सोऽग्निं चित्वा  
 लूक्षः (४७)

भवतीमं स्तनमूर्जस्वन्तं धयापामित्याज्यस्य पूर्णां सुचं  
 जुहोत्येष वा अग्नेर्विमोको विमुच्यैवास्मा अन्नमपि दधाति  
 तस्मादाहुर्यश्चैवं वेद यश्च न सुधायं ह वै वाजी सुहितो  
 दधातीत्यग्निर्वाव वाजी तमेव तत्प्रीणाति स एनं प्रीतः प्रीणाति  
 वसीयान्भवति॥ (४८)

प्रतीची दिक्तस्यास्ते द्विष्मो यश्च निलिम्पा नामेह गृहा इति लूक्षो वसीयान्भवति॥७॥—[१०]

इन्द्राय राज्ञे सूकरो वरुणाय राज्ञे कृष्णो यमाय राज्ञे ऋश्यं  
 ऋषभाय राज्ञे गवयः शार्दूलाय राज्ञे गौरः पुरुषराजाय मर्कटः

क्षिप्रश्येनस्य वर्तिका नीलङ्गोः क्रिमिः सोमस्य राज्ञः कुलुङ्गः  
सिन्धोः शिःशुमारो हिमवतो हृस्ती ॥ (४९)

इन्द्रायाष्टाविंशतिः ॥ १ ॥ [११]

मयुः प्राजापत्य ऊलो हलीक्ष्णो वृषदः शस्ते धातुः सरस्वत्यै  
शारिः श्येता पुरुषवाक्सरस्वते शुकः श्येतः पुरुषवागारण्योऽजो  
नकुलः शका ते पौष्णा वाचे क्रौञ्चः ॥ (५०)

मयुस्त्रयोविंशतिः ॥ १ ॥ [१२]

अपां नत्रे जषो नाक्रो मकरः कुलीकयस्तेऽकूपारस्य वाचे  
पैङ्गराजो भगाय कुषीतक आती वाहसो दर्विदा ते वायव्या  
दिग्भ्यश्चक्रवाकः ॥ (५१)

अपामेकान्नविंशतिः ॥ १ ॥ [१३]

बलायाजगर आखुः सृजया शयण्डकस्ते मैत्रा मृत्यवेऽसितो  
मन्यवे स्वजः कुम्भीनसः पुष्करसादो लोहिताहिस्ते त्वाष्ट्राः  
प्रतिश्रुत्कायै वाहसः ॥ (५२)

[१४]

पुरुषमृगश्चन्द्रमसे गोधा कालका दारवाघाटस्ते वनस्पतीनामेण्यहे  
कृष्णो रात्रियै पिकः क्ष्विङ्गा नीलशीर्ष्णी तैर्यम्णे धातुः  
कत्कटः ॥ (५३)

[१५]

सौरी ब॒लाक॑श्यो म॒यूरः श्ये॑नस्ते ग॒न्ध॒र्वाणां वसू॑नां क॒पिञ्ज॑लो  
रु॒द्राणां ति॑त्तिरी रो॒हित्कुण्ड॑णार्ची गो॒लत्ति॑का ता अ॒प्सर॑सा॒मरण॑याय  
सृम॒रः॥ (५४)

[१६]

पृ॒षतो वै॑श्वदे॒वः पि॒त्वो न्यङ्कुः क॑शस्तेऽनु॑मत्या अ॒न्यवा॒पो-  
ऽर्ध॑मा॒सानां मा॒सां क॒श्यपः क॒रिः कु॑टरु॒र्दात्यो॒हस्ते सि॑नीवा॒ल्यै  
बृ॒हस्प॑तये शित्पु॒टः॥ (५)

[१७]

शका॑ भौमी पा॒त्रः कशो॑ मा॒न्थील॑वस्ते पि॒तृणा॑मृ॒तूनां जह॑का  
सं॒वत्स॑राय॒ लोपा॑ क॒पोत॒ उलू॑कः श॒शस्ते नैर्ऋ॑ताः कृ॒कवा॑कुः  
सा॒वि॒त्रः॥ (५६)

बलाय पुरुषमृगः सौरी पृषतः शकाष्टादशाष्टादशः॥ [१८]

रु॒रू रौ॒द्रः कृ॑कला॒सः श॒कुनिः पि॒प्पका॑ ते श॒रव्या॑यै  
हरि॑णो मा॒रुतो ब्र॑ह्म॒णे शा॒र्गस्तर॑क्षुः कृ॒ष्णः श्वा च॑तुर॒क्षो गर्द॑भस्त  
इ॒तर॑ज॒नाना॑म॒ग्नये धू॒ङ्गा॥ (५७)

रुरुर्विशतिः॥ [१९]

अ॒ल॒ज आ॑न्तरि॒क्ष उ॒द्रो म॒द्गुः प्ल॒वस्ते॑ऽपाम॒दित्यै

ह॒५स॒साचि॑रिन्द्रा॒ण्यै की॒र्शा गृ॒ध्रः शि॒ति॒क॒क्षी वा॑र्धा॒ण॒सस्ते  
दि॒व्या द्या॑वापृ॒थि॒व्या॑ श्वा॒वित्॥ (५८)

[२०]

सु॒पु॒र्णः पा॑र्ज॒न्यो ह॒५सो वृ॒को वृष॑द॒५श॒स्त ऐ॒न्द्रा अ॒पा॒मु॒द्रो-  
ऽर्य॑म्णे लो॒पा॒शः सि॒५हो न॑कु॒लो व्या॒घ्रस्ते म॑हेन्द्रा॒य का॒मा॒य  
पर॑स्वान्॥ (५९)

अ॒ल॒जः सु॒पु॒र्णोऽष्टा॑द॒शाष्टा॑द॒श॥१॥ [२१]

आ॒ग्ने॒यः कृ॒ष्णग्री॑वः सा॒रस्व॑ती मे॒षी ब॒भ्रुः सौ॒म्यः पौ॒ष्णः श्या॒मः  
शि॑ति॒पृ॒ष्ठो बा॑र्हस्प॒त्यः शि॒ल्पो वै॑श्वदे॒व ऐ॒न्द्रोऽरु॑णो मा॒रुतः क॒ल्माष॑  
ऐ॒न्द्रा॒ग्नः स॒॑५हि॒तोऽधो॑रा॒मः सा॒वि॒त्रो वा॑रु॒णः पे॒त्वः॥ (६०)

आ॒ग्ने॒यो द्वा॒वि॒५श॒तिः॥१॥ [२२]

अश्व॑स्तूप॒रो गो॑मृ॒गस्ते प्रा॑जाप॒त्या आ॑ग्ने॒यौ कृ॒ष्णग्री॑वौ त्वा॒ष्टौ  
लो॒मश॑स॒क्थौ शि॑ति॒पृ॒ष्ठौ बा॑र्हस्प॒त्यौ धा॒त्रे पृ॑षो॒दरः सौ॒र्यो ब॒ल॒क्षः  
पे॒त्वः॥ (६१)

अश्वः॑ पो॒ड॒श॥१॥ [२३]

अ॒ग्नये॑ऽनी॒कव॑ते रोहि॑ता॒ञ्जिर॑न॒ङ्गान॒धोरा॑मौ सा॒वि॒त्रौ पौ॒ष्णौ  
र॑ज॒तना॑भी वैश्वदे॒वौ पि॒शङ्गौ तू॒परौ मा॑रुतः क॒ल्माष॑ आ॒ग्ने॒यः  
कृ॒ष्णोऽजः॑ सा॒रस्व॑ती मे॒षी वा॑रु॒णः कृ॒ष्ण ए॒क॑शि॒तिपा॒त्पे॒त्वः (६२)

अ॒ग्नयोऽनी॒कव॑ते द्वा॒वि॒५श॒तिः॥१॥ [२४]

यदेकेन प्रजापतिः प्रेणानु यजुषापौ विश्वकर्माग्न आ याहि सुवर्गाय वज्रो गायत्रेणाग्न उदधे  
 समीचीन्द्राय मयुरपां बलाय पुरुषमृगः सौरी पृषतः शका रुरुरलजः सुपर्ण आग्नेयोऽश्वोऽग्नयेऽनीकवते  
 चतुर्विंशतिः॥२४॥

यदेकेन स पापीयानेतद्वा अग्नेर्धनुस्तद्देवास्त्वेन्द्रज्येष्ठा अपां नप्रेऽश्वस्तूपरो द्विषष्टिः॥६२॥

यदेकेनैकशितिपात्येत्वं॥

हरिः ॐ॥

॥कृष्ण-यजुर्वेदीय-तैत्तिरीय-संहितायां पञ्चमकाण्डे पञ्चमः प्रश्नः  
 समाप्तः॥५-५॥



## ॥षष्ठः प्रश्नः॥

## ॥तैत्तिरीयसंहितायां पञ्चमकाण्डे षष्ठः प्रश्नः॥

हिरण्यवर्णाः शुचयः पावका यासु जातः कश्यपो यास्विन्द्रः।  
 अग्निं या गर्भं दधिरे विरूपास्ता न आपः शः स्योना भवन्तु।  
 यासां राजा वरुणो याति मध्ये सत्यानृते अवपश्यञ्जनानाम्।  
 मधुश्चुतः शुचयो याः पावकास्ता न आपः शः स्योना भवन्तु।  
 यासां देवा दिवि कृण्वन्ति भुक्षं या अन्तरिक्षे बहुधा भवन्ति। याः  
 पृथिवीं पयसोन्दन्ति (१)

शुक्रास्ता न आपः शः स्योना भवन्तु। शिवेन मा चक्षुषा  
 पश्यतापः शिवया तनुवोपं स्पृशत त्वचं मे। सर्वा अग्नीं  
 रप्सुषदो हुवे वो मयि वर्चो बलमोजो नि धत्त। यददः  
 सम्प्रयतीरहावनदता हुते। तस्मादा नद्यो नाम स्थ ता वो नामानि  
 सिन्धवः। यत्प्रेषिता वरुणेन ताः शीभं समवल्गता। (२)

तदाप्रोदिन्द्रो वो यतीस्तस्मादापो अनु स्थन। अपकामं  
 स्यन्दमाना अवीवरत वो हिकम्। इन्द्रो वः शक्तिभिर्देवीस्तस्माद्वार्णाम्  
 वो हितम्। एको देवो अप्यतिष्ठत्स्यन्दमाना यथावशम्।  
 उदानिषुर्महीरिति तस्मादुदकमुच्यते। आपो भद्रा घृतमिदापं  
 आसुरग्नीषोमौ बिभ्रत्याप इत्ताः। तीव्रो रसो मधुपृचाम् (३)

अरुङ्म आ मा प्राणेन सह वर्चसा गन्तु। आदित्यश्याम्युत वा

शृणोम्या मा घोषो गच्छति वाङ् आसाम्। मन्ये भेजानो अमृतस्य  
 तर्हि हिरण्यवर्णा अतृपं यदा वः। आपो हि ष्ठा मयोभुवस्ता न  
 ऊर्जे दधातन। महे रणाय चक्षसे। यो वः शिवतमो रसस्तस्य  
 भाजयतेह नः। उशतीरिव मातरः। तस्मा अरं गमाम वो यस्य  
 क्षयाय जिन्वथ। आपो जनयथा च नः। दिवि श्रयस्वान्तरिक्षे  
 यतस्व पृथिव्या सम्भव ब्रह्मवर्चसमसि ब्रह्मवर्चसाय त्वा॥ (४)

उन्दन्ति समवल्गात मधुपृचा मातरो द्वाविंशतिश्च॥४॥ [१]

अपां ग्रहान्गृह्णात्येतद्वाव राजसूयं यदेते ग्रहाः सवो-  
 ऽग्निर्वरुणसवो राजसूयमग्निसवश्चित्यस्ताभ्यामेव सूयतेऽथो  
 उभावेव लोकावभि जयति यश्च राजसूयेनेजानस्य यश्चाग्निचित  
 आपो भवन्त्यापो वा अग्नेर्भ्रातृव्या यदपोऽग्नेरधस्तादुपदधाति  
 भ्रातृव्याभिभूत्यै भवत्यात्मना परास्य भ्रातृव्यो भवत्यमृतम् (५)

वा आपस्तस्मादद्विरवतान्तमभि पिञ्चन्ति नार्तिमार्च्छति  
 सर्वमायुरेति यस्यैता उपधीयन्ते य उ चैना एवं वेदान्नं वा आपः  
 पशव आपोऽन्नं पशवोऽन्नादः पशुमान्भवति यस्यैता उपधीयन्ते  
 य उ चैना एवं वेद द्वादश भवन्ति द्वादश मासाः संवत्सरः  
 संवत्सरेणैवास्मै (६)

अन्नमव रुन्धे पात्राणि भवन्ति पात्रे वा अन्नमद्यते  
 सयोन्येवान्नमव रुन्ध आ द्वादशात्पुरुषादन्नमत्यथो पात्रान्न छिद्यते  
 यस्यैता उपधीयन्ते य उ चैना एवं वेद कुम्भाश्च कुम्भीश्च मिथुनानि

भवन्ति मिथुनस्य प्रजात्यै प्र प्रजया पशुभिर्मिथुनैर्जायते यस्यैता  
उपधीयन्ते य उ (७)

चैना एव वेद शुक्वा अग्निः सोऽध्वर्यु यजमानं प्रजाः शुचा-  
ऽर्पयति यदप उपदधाति शुचमेवास्य शमयति नार्तिमाच्छत्यध्वर्युर्न  
यजमानः शाम्यन्ति प्रजा यत्रैता उपधीयन्तेऽपां वा एतानि हृदयानि  
यदेता आपो यदेता अप उपदधाति दिव्याभिरेवैनाः सः सृजति  
वर्षुकः पर्जन्यः (८)

भवति यो वा एतासामायतनं कृप्तिं वेदाऽऽयतनवान्भवति  
कल्पतेऽस्मा अनुसीतमुप दधात्येतद्वा आसामायतनमेषा कृप्तिर्य  
एवं वेदाऽऽयतनवान्भवति कल्पतेऽस्मै द्वन्द्वमन्या उप दधाति  
चतस्रो मध्ये धृत्या अन्नं वा इष्टका एतत्खलु वै साक्षादन्नं यदेष  
चरुर्यदेतं चरुमुपदधाति साक्षात् (९)

एवास्मा अन्नमव रुन्धे मध्यत उप दधाति मध्यत एवास्मा अन्नं  
दधाति तस्मान्मध्यतोऽन्नमद्यते बारहस्पत्यो भवति ब्रह्म वै देवानां  
बृहस्पतिर्ब्रह्मणैवास्मा अन्नमव रुन्धे ब्रह्मवर्चसमसि ब्रह्मवर्चसाय  
त्वेत्याह तेजस्वी ब्रह्मवर्चसी भवति यस्यैष उपधीयते य उ चैनमेवं  
वेदः॥ (१०)

अमृतमस्मै जायते यस्यैता उपधीयन्ते य उ पर्जन्यं उपदधाति साक्षात्सप्तचत्वारिंशच्च॥६॥ [२]

भूतेष्टका उप दधात्यत्रात्र वै मृत्युर्जायते यत्रयत्रैव मृत्युर्जायते

तत॑ ए॒वैन॒मव॑ं यज॒ते तस्मा॑दग्नि॒चि॒त्सर्व॑मायु॒रेति॑ सर्वे ह्य॑स्य मृ॒त्यवो॒-  
 ऽवै॑ष्टा॒स्तस्मा॑दग्नि॒चि॒न्नाभि॑चरित॒वै प्र॒त्यगे॑नमभिचारः स्तृ॒णुते॑ सू॒यते॒  
 वा ए॒ष यो॑ऽग्निं चि॒नुते॑ दे॒वसु॒वामे॒तानि॑ ह॒वीः॑ ऽषि॑ भवन्त्ये॒ताव॑न्तो॒ वै  
 दे॒वाना॑ः स॒वास्त ए॒व (११)

अ॒स्मै स॒वान्प्र य॑च्छन्ति॒ त ए॑न॒ः सु॒वन्ते स॒वो॑ऽग्निर्वरुणस॒वो  
 रा॒ज॒सूय॑ ब्रह्मस॒वश्चित्यो॑ दे॒वस्य॑ त्वा स॒वितुः॑ प्र॒सव॑ इत्या॒ह  
 स॒वितृ॑प्र॒सूत ए॒वैनं॑ ब्रह्म॒णा दे॒वता॑भि॒रभि पि॑श्चत्यन्न॒स्यान्न॑स्या॒भि  
 पि॑श्चत्यन्न॒स्यान्न॑स्याव॒रुद्धौ पु॒रस्ता॑त्प्रत्यश्च॒मभि पि॑श्चति पु॒रस्ता॑द्धि  
 प्र॒ती॒चीन॒मन्न॑म॒द्यते॑ शी॒र्षतो॑ऽभि पि॑श्चति शी॒र्षतो॑ ह्यन्न॑म॒द्यत॒ आ  
 मु॒खाद॒न्वव॑स्मावयति (१२)

मु॒ख॒त ए॒वास्मा॑ अ॒न्नाद्यं॑ दधात्य॒ग्नेस्त्वा॒ साम्रा॑ज्येना॒भि  
 पि॑श्चामीत्या॒हैष वा अ॒ग्नेः स॒वस्तेनै॒वैन॑म॒भि पि॑श्चति बृह॒स्पते॑स्त्वा  
 साम्रा॑ज्येना॒भि पि॑श्चामीत्या॒ह ब्रह्म॒ वै दे॒वानां॑ बृह॒स्पति॑र्ब्रह्म॒णैवैन॑म॒भि  
 पि॑श्चतीन्द्र॒स्य त्वा॒ साम्रा॑ज्येना॒भि पि॑श्चामीत्या॒हेन्द्रि॒यमे॒वास्मि॑न्नुप॒रि॑ष्टाद्

वै रा॒ज॒सूय॑स्य रू॒पं य ए॒वं वि॒द्वान॒ग्निं चि॑नुत उ॒भावे॒व  
 लो॒काव॑भि ज॑यति॒ यश्च॑ रा॒ज॒सूये॑नेजा॒नस्य॒ यश्चा॑ग्नि॒चित् इन्द्र॑स्य  
 सुषु॒वाण॑स्य॒ दश॑धेन्द्रि॒यं वी॒र्यं॑ प॒राप॑तत्तद्दे॒वाः सौ॑त्राम॒ण्या  
 स॒मभ॑रन्त्सू॒यते॒ वा ए॒ष यो॑ऽग्निं चि॒नुते॑ऽग्निं चि॒त्वा सौ॑त्राम॒ण्या  
 य॑जेतेन्द्रि॒यमे॒व वी॒र्यं॑ स॒म्भृत्या॑त्मन्ध॒त्ते॥ (१४)

त एवान्ववन्सावयत्येतदष्टाचत्वारिंशच्च॥४॥ [३]

सजूरब्दोऽयावभिः सजूरूषा अरुणीभिः सजूः सूर्य एतंशेन  
सजोषावश्विना द२सोभिः सजूरग्निर्वैश्वानर इडाभिर्घृतेन स्वाहा  
संवत्सरो वा अब्दो मासा अयावा उषा अरुणी सूर्य एतंश इमे  
अश्विना संवत्सरोऽग्निर्वैश्वानरः पशव इडा पशवो घृत२ संवत्सरं  
पशवोऽनु प्र जायन्ते संवत्सरेणैवास्मै पशून्प्र जनयति दर्भस्तम्बे  
जुहोति यत् (१५)

वा अस्या अमृतं यद्वीर्यं तद्दर्भास्तस्मिञ्जुहोति प्रैव जायते-  
ऽन्नादो भवति यस्यैवं जुह्वत्येता वै देवता अग्नेः पुरस्ताद्वागास्ता  
एव प्रीणात्यथो चक्षुरेवाग्नेः पुरस्तात्प्रति दधात्यनन्धो भवति य  
एवं वेदापो वा इदमग्ने सलिलमासीत्स प्रजापतिः पुष्करपर्णे  
वातो भूतोऽलेलायत्सः (१६)

प्रतिष्ठां नाविन्दत स एतदपां कुलायमपश्यत्तस्मिन्नग्निमचिनुत  
तदियमभवत्ततो वै स प्रत्यतिष्ठद्यां पुरस्तादुपादधात्तच्छिरोऽभवत्सा  
प्राची दिग्यां दक्षिणत उपादधात्स दक्षिणः पक्षोऽभवत्सा दक्षिणा  
दिग्यां पश्चादुपादधात्तत्पुच्छमभवत्सा प्रतीची दिग्यामुत्तरत  
उपादधात् (१७)

स उत्तरः पक्षोऽभवत्सोदीची दिग्यामुपरिष्ठादुपादधात्तत्पृष्ठमभवत्  
दिगियं वा अग्निः पश्चैष्टकस्तस्माद्यदस्यां खनन्त्यभीष्टकां

तृन्दन्त्यभि शर्करा५ सर्वा वा इयं वयोभ्यो नक्तं दृशे दीप्यते  
तस्मादिमां वयांसि नक्तं नाध्यासते य एवं विद्वानग्निं चिनुते  
प्रत्येव (१८)

तिष्ठत्यभि दिशो जयत्याग्नेयो वै ब्राह्मणस्तस्माद्ब्राह्मणाय  
सर्वासु दिक्ष्वर्धुकः स्वामेव तद्दिशमन्वेत्युपां वा अग्निः  
कुलायन्तस्मादापोऽग्निः हारुकाः स्वामेव तद्योनिं प्र  
विशन्ति॥ (१९)

यदलेलायथ्स उत्तरत उपादधादेव द्वात्रिंशच्च॥५॥ ————— [४]

संवत्सरमुख्यम्भृत्वा द्वितीये संवत्सर आग्नेयमष्टाकपालं  
निर्वपेदैन्द्रमेकादशकपालं वैश्वदेवं द्वादशकपालं बारहस्पत्यं चरुं  
वैष्णवं त्रिकपालं तृतीये संवत्सरेऽभिजिता यजेत यदष्टाकपालो  
भवत्यष्टाक्षरा गायत्र्याग्नेयं गायत्रं प्रातःसवनं प्रातःसवनमेव  
तेन दाधार गायत्रं छन्दो यदेकादशकपालो भवत्येकादशाक्षरा  
त्रिष्टुगैन्द्रं त्रैष्टुभं माध्यन्दिनं सवनं माध्यन्दिनमेव सवनं तेन  
दाधार त्रिष्टुभम् (२०)

छन्दो यद्द्वादशकपालो भवति द्वादशाक्षरा जगती वैश्वदेवं  
जागतां तृतीयसवनन्तृतीयसवनमेव तेन दाधार जगतीं छन्दो  
यद्बारहस्पत्यश्चरुर्भवति ब्रह्म वै देवानां बृहस्पतिर्ब्रह्मैव तेन दाधार  
यद्वैष्णवस्त्रिकपालो भवति यज्ञो वै विष्णुर्यज्ञमेव तेन दाधार  
यत्तृतीये संवत्सरेऽभिजिता यजतेऽभिजित्यै यथ्संवत्सरमुख्यं

बिभर्तीममेव (२१)

तेन॑ लो॒कः॑ स्पृ॒णोति॑ यद्वि॒तीये॑ संव॒त्सरे॑ऽग्निं चि॒नुते॑-  
 ऽन्तरि॑क्षमे॒व तेन॑ स्पृ॒णोति॑ यत्तृ॒तीये॑ संव॒त्सरे॑ यज॑तेऽमु॒मेव  
 तेन॑ लो॒कः॑ स्पृ॒णोत्ये॒तं वै परं॑ आ॒द्धारः॑ क॒क्षीवा॑ः औशि॒जो  
 वी॒तह॑व्यः श्राय॒सस्त्र॑सद॒स्युः पौरु॑कु॒थ्स्यः प्र॒जाका॑मा अचि॒न्वत्  
 ततो॒ वै ते स॒हस्रं॑ सह॒स्रं पु॒त्रान॑विन्दन्त॒ प्रथ॑ते प्र॒जया॑ प॒शुभि॑स्तां  
 मात्रा॑माप्रोति॒ यां तेऽग॑च्छन् य एवं वि॒द्वाने॒तम॑ग्निं चि॒नुते॑॥ (२२)

दाधारं त्रिष्टुभमिममेवैवं चत्वारि च॥३॥ [५]

प्र॒जाप॑तिर॒ग्निम॑चिनुत् स क्षुरप॑विभृ॒त्वाति॑ष्ठत्तं दे॒वा बिभ्य॑तो  
 नोपा॑यन्ते छन्दो॑भिरा॒त्मानं॑ छादयि॒त्वोपा॑यन्तच्छन्द॑सां छन्द॒स्त्वं  
 ब्र॒ह्म वै छन्दा॑ःसि ब्र॒ह्मण॑ एतद्रूपं यत्कृ॒ष्णाजि॑नङ्का॒र्ष्णी उपा॑नहावुपं  
 मुञ्च॑ते छन्दो॑भिरे॒वात्मानं॑ छादयि॒त्वाग्नि॑मुपं चर॒त्या॒त्मनो॑ऽहि॑सायै  
 देव॑नि॒धिर्वा ए॒ष नि धी॑यते यद॒ग्निः (२३)

अ॒न्ये वा वै नि॒धिम॑गुप्तं वि॒न्दन्ति॒ न वा प्र॑ति प्र जा॑नात्यु॒खामा  
 क्रा॑मत्या॒त्मानं॑मे॒वाधि॑पां कुरु॑ते गु॒प्त्या अथो॒ खल्वा॑हुर्नाक्रम्येति॑  
 नैर्ऋ॒त्यु॒खा यदा॑क्रामे॒न्नैर्ऋ॑त्या आ॒त्मान॑मपि दध्या॒त्तस्मान्ना॑क्रम्यां  
 पुरु॑षशी॒र्षमुप॑ दधाति॒ गुप्त्या॒ अथो॒ यथा॑ ब्रूयादे॒तन्मे गो॑पा॒येति॑  
 तादृ॑गे॒व तत् (२४)

प्र॒जाप॑तिर्वा अथ॑र्वा॒ग्निरे॒व द॒ध्यङ्घ्रा॑थर्व॒णस्त॑स्येष्ट॑का

अस्थान्येत९ ह वाव तदृषिरभ्यनूवाचेन्द्रो दधीचो अस्थभिरिति  
 यदिष्टकाभिरग्निं चिनोति सात्मानमेवाग्निं चिनुते सात्मा मुष्मिल्लोके  
 भवति य एवं वेद शरीरं वा एतदग्रेर्यच्चित्य आत्मा वैश्वानरो  
 यच्चिते वैश्वानरं जुहोति शरीरमेव स३स्कृत्य (२५)

अभ्यारोहति शरीरं वा एतद्यजमानः स३स्क्रुरुते यदग्निं चिनुते  
 यच्चिते वैश्वानरं जुहोति शरीरमेव स३स्कृत्यात्मनाभ्यारोहति  
 तस्मात्तस्य नाव द्यन्ति जीवन्नेव देवानप्येति वैश्वानर्यर्चा पुरीषमुप  
 दधातीयं वा अग्निवैश्वानरस्तस्यैषा चितिर्यत्पुरीषमग्निमेव वैश्वानरं  
 चिनुत एषा वा अग्नेः प्रिया तनूर्यद्वैश्वानरः प्रियामेवास्य तनुवमव  
 रुन्धे॥ (२६)

अग्निस्तथ्स३स्कृत्याग्नेर्दश च॥४॥ [६]

अग्नेर्वै दीक्षया देवा विराजमाप्नुवन्तिस्त्रो रात्रीर्दीक्षितः  
 स्यात् त्रिपदा विराड्विराजमाप्नोति षड्रात्रीर्दीक्षितः स्यात् षड्वा  
 ऋतवः संवत्सरः संवत्सरो विराड्विराजमाप्नोति दश रात्रीर्दीक्षितः  
 स्याद्दशाक्षरा विराड्विराजमाप्नोति द्वादश रात्रीर्दीक्षितः स्याद्द्वादश  
 मासाः संवत्सरः संवत्सरो विराड्विराजमाप्नोति त्रयोदश  
 रात्रीर्दीक्षितः स्यात् त्रयोदश (२७)

मासाः संवत्सरः संवत्सरो विराड्विराजमाप्नोति पञ्चदश  
 रात्रीर्दीक्षितः स्यात्पञ्चदश वा अर्धमासस्य रात्रयोऽर्धमासशः



संवत्सर आ॑प्यते संवत्स॒रो वि॒राड्विराज॑माप्रोति सप्तद॑श  
 रात्री॑र्दीक्षितः स्याद्द्वाद॑श मा॒साः पञ्च॑तवः स संवत्स॒रः  
 संवत्स॒रो वि॒राड्विराज॑माप्रोति चतु॑र्विंशति॒ः रात्री॑र्दीक्षितः  
 स्याच्चतु॑र्विंशतिर॒र्धमा॒साः संवत्स॒रः संवत्स॒रो वि॒राड्विराज॑माप्रोति  
 त्रिंश॑त॒ः रात्री॑र्दीक्षितः स्यात् (२८)

त्रिं॑शदक्षरा वि॒राड्विराज॑माप्रोति मासं दीक्षितः स्याद्यो मासः  
 स संवत्स॒रः संवत्स॒रो वि॒राड्विराज॑माप्रोति चतुरो॑ मा॒सो दी॑क्षितः  
 स्याच्चतुरो॑ वा ए॒तं मा॒सो वस॑वोऽबिभरुस्ते पृथि॒वीमाज॑यन्गाय॒त्रीं  
 छन्दो॑ऽष्टौ रु॒द्रास्तै॑ऽन्तरिक्ष॒माज॑यन्निष्टु॒भं छन्दो॑ द्वाद॑शादित्यास्ते  
 दिव॒माज॑य॒ञ्जग॑तीं छन्द॒स्ततो॑ वै ते व्या॒वृत्त॑मगच्छ॒ञ्छ्रैष्ठ्यं॑ दे॒वानां॑  
 तस्मा॑द्द्वाद॑श मा॒सो भृ॒त्वाग्निं॑ चिन्वीत॒ द्वाद॑श मा॒साः संवत्स॒रः  
 संवत्स॒रोऽग्नि॑श्चित्य॒स्तस्या॑होरा॒त्राणीष्ट॑का आ॒प्तेष्ट॑कमेनं चिनु॒तेऽथो॑  
 व्या॒वृत्त॑मे॒व गच्छ॑ति श्रैष्ठ्यं॑ समा॒नाना॑म्॥ (२९)

स्यात् त्रयो॑दश त्रिं॑शत॒ः रात्री॑र्दीक्षितः स्याद्वै तै॑ऽष्टाविं॑शतिश्च॥३॥ [७]

सुव॒र्गाय॒ वा ए॒ष लो॒काय॑ चीयते यद॒ग्निस्तं॑ यन्ना॒न्वारो॑है॒त्सुव॒र्गालो॑  
 हीयेत॑ पृथि॒वीमाक्र॑मिषं प्रा॒णो मा॒ मा हा॑सीद॒न्तरि॑क्ष॒माक्र॑मिषं  
 प्र॒जा मा॒ मा हा॑सीद्वि॒माक्र॑मिष॒ः सुव॑रग॒न्मेत्या॑हैष वा  
 अ॒ग्नेर॑न्वारो॒हस्तेनै॒वैन॑म॒न्वारो॑हति सुव॒र्गस्य॑ लो॒कस्य॑ सम॑ष्ट्यै  
 यत्प॒क्षस॑म्मितां मि॒नुयात् (३०)

कनी॑या॒सं यज्ञ॑क्र॒तुमुपे॑या॒त्पापी॑यस्यस्या॒त्मनः॑ प्र॒जा  
स्या॒द्वेदि॑स॒मितां॑ मि॒नोति॑ ज्या॒या॒समे॒व य॑ज्ञ॒क्र॒तुमुपे॑ति  
नास्या॒त्मनः॑ पा॒पी॒यसी॑ प्र॒जा भ॑वति सा॒हस्रं॑ चि॒न्वीत॑ प्रथ॒मं  
चि॒न्वा॒नः स॒हस्रं॑स॒मि॒तो वा अ॒यं लो॒क इ॒ममे॒व लो॒कम॒भि  
ज॑यति॒ द्विषा॑हस्रं चि॒न्वीत॑ द्वि॒तीयं॑ चि॒न्वा॒नो द्विषा॑हस्रं वा  
अ॒न्तरि॑क्षम॒न्तरि॑क्षमे॒वाभि॑ ज॑यति॒ त्रिषा॑हस्रं चि॒न्वीत॑ तृ॒तीयं॑  
चि॒न्वा॒नः (३१)

त्रिषा॑हस्रो वा अ॒सौ लो॒कोऽमु॑मे॒व लो॒कम॒भि ज॑यति जानुद॒घ्नं  
चि॒न्वीत॑ प्रथ॒मं चि॒न्वा॒नो गा॑यत्रि॒यैवे॒मं लो॒कम॒भ्यारो॑हति नाभिद॒घ्नं  
चि॒न्वीत॑ द्वि॒तीयं॑ चि॒न्वा॒नस्त्रि॑ष्टुभै॒वान्तरि॑क्षम॒भ्यारो॑हति ग्रीवद॒घ्नं  
चि॒न्वीत॑ तृ॒तीयं॑ चि॒न्वा॒नो जग॑त्ये॒वामुं॑ लो॒कम॒भ्यारो॑हति नाग्निं  
चि॒त्वा रा॒मामु॑पे॒यादयो॑नौ रे॒तो धा॑स्यामीति न द्वि॒तीयं॑ चि॒त्वान्यस्य॑  
स्त्रि॒यम् (३२)

उपे॑यान्न तृ॒तीयं॑ चि॒त्वा कां च॑नोपे॒याद्रेतो॑ वा ए॒तन्नि ध॑त्ते  
यद॒ग्निं चि॑नुते यदु॒पे॒याद्रेत॑सा व्य॒ध्येता॑थो खल्वा॒हुरप्र॑ज॒स्यं  
तद्य॒न्नोपे॑यादिति यद्रेतः॒सिचा॑वुप॒दधा॑ति ते ए॒व यज॑मानस्य रे॒तो  
बिभृ॑त॒स्तस्मा॑दु॒पे॒याद्रेत॑सोऽस्क॒न्दाय॑ त्रीणि॒ वाव रेता॑सि पि॒ता  
पु॒त्रः पौ॒त्रः (३३)

यद्वे रे॒तःसिचा॑वुप॒दध्या॑द्रेतोऽस्य विच्छि॒न्धात्ति॑स्त्र उप॑  
दधाति॒ रेत॑सः सन्त॑त्या इ॒यं वाव प्र॑थ॒मा रे॒तःसि॑ग्वा॒ग्वा इ॒यं

तस्मात्पश्यन्तीमां पश्यन्ति वाचं वदन्तीमन्तरिक्षं द्वितीयां प्राणो  
वा अन्तरिक्षं तस्मान्नान्तरिक्षं पश्यन्ति न प्राणमसौ तृतीया  
चक्षुर्वा असौ तस्मात्पश्यन्त्यमूं पश्यन्ति चक्षुर्यजुषेमां च (३४)

अमूं चोपं दधाति मनसा मध्यमामेषां लोकानां क्लृप्त्या  
अथो प्राणानामिष्टो यज्ञो भृगुभिराशीर्दा वसुभिस्तस्य त इष्टस्य  
वीतस्य द्रविणेह भक्षीयेत्याह स्तुतशस्त्रे एवैतेन दुहे पिता  
मातरिश्वाच्छिद्रा पदा धा अच्छिद्रा उशिजः पदानु तक्षुः सोमो  
विश्ववित्रेता नैषद्बृहस्पतिरुक्थामदानि शंसिषदित्याहेतद्वा  
अग्रेरुक्थन्तेनैवैनमनु शंसति॥ (३५)

मिनुर्यात्तृतीयं चिन्वानस्त्रियं पौत्रंश्च वै सप्तदश च॥६॥ [८]

सूयते वा एषोऽग्नीनां य उखायां भ्रियते यद्धः सादयेद्गर्भाः  
प्रपादुकाः स्युरथो यथा सवात्प्रत्यवरोहति तादृगेव तदासन्दी  
सादयति गर्भाणां धृत्या अप्रपादायाथो सवमेवैनं करोति गर्भो  
वा एष यदुख्यो योनिः शिक्यं यच्छिक्यादुखां निरूहेद्योनेर्गर्भं  
निरहण्याथ्यडुद्यामं शिक्यं भवति षोढाविहितो वै (३६)

पुरुष आत्मा च शिरश्च चत्वार्यङ्गान्यात्मन्नेवैनं बिभर्ति प्रजा-  
पतिर्वा एष यदग्निस्तस्योखा चोलूखलं च स्तनौ तावस्य प्रजा  
उप जीवन्ति यदुखां चोलूखलं चोपदधाति ताभ्यामेव यजमानो-  
ऽमुष्मिल्लोकेऽग्निं दुहे संवत्सरो वा एष यदग्निस्तस्य त्रेधाविहिता

इष्टकाः प्राजापत्या वैष्णवीः (३७)

वैश्वकर्मणीरहोरात्राण्येवास्य प्राजापत्या यदुख्यं बिभर्ति  
प्राजापत्या एव तदुप धत्ते यत्समिधं आदधाति वैष्णवा वै  
वनस्पतयो वैष्णवीरेव तदुप धत्ते यदिष्टकाभिरग्निं चिनोतीयं  
वै विश्वकर्मा वैश्वकर्मणीरेव तदुप धत्ते तस्मादाहुस्त्रिवृदग्निरिति  
तं वा एतं यजमान एव चिन्वीत यदस्यान्यश्चिनुयाद्यत्तं  
दक्षिणाभिर्न राधयेदग्निमस्य वृञ्जीत योऽस्याग्निं चिनुयात्तं  
दक्षिणाभी राधयेदग्निमेव तथस्पृणोति॥ (३८)

षोढाविहितो वै वैष्णवीरन्यो विश्वं शतिश्च॥३॥ [९]

प्रजापतिरग्निमचिनुतर्तुभिः संवत्सरं वसन्तेनैवास्य  
पूर्वार्धमचिनुत ग्रीष्मेण दक्षिणं पक्षं वर्षाभिः पुच्छं शरदोत्तरं  
पक्षं हेमन्तेन मध्यं ब्रह्मणा वा अस्य तत्पूर्वार्धमचिनुत क्षत्रेण  
दक्षिणं पक्षं पशुभिः पुच्छं विशोत्तरं पक्षमाशया मध्यं य एवं  
विद्वानग्निं चिनुत ऋतुभिरेवैनं चिनुतेऽथो एतदेव सर्वमव (३९)

रुन्धे शृण्वन्त्येनमग्निं चिक्यान्मत्त्यन्नं रोचत इयं वाव  
प्रथमा चित्तिरोषधयो वनस्पतयः पुरीषमन्तरिक्षं द्वितीया वयांसि  
पुरीषमसौ तृतीया नक्षत्राणि पुरीषं यज्ञश्चतुर्थी दक्षिणा पुरीषं  
यजमानः पञ्चमी प्रजा पुरीषं यत् त्रिचितीकं चिन्वीत यज्ञं  
दक्षिणामात्मानं प्रजामन्तरियात्तस्मात्पञ्चचितीकश्चेतव्य एतदेव

सर्वं स्पृणोति यत्तिस्त्रिंशतयः (४०)

त्रिवृद्धाग्रिर्यद्वे द्विपाद्यजमानः प्रतिष्ठित्यै पञ्च चितयो भवन्ति  
पाङ्कः पुरुष आत्मानमेव स्पृणोति पञ्च चितयो भवन्ति पञ्चभिः  
पुरीषैरभ्यूहति दश सं पद्यन्ते दशाक्षरो वै पुरुषो यावानेव  
पुरुषस्तः स्पृणोत्यथो दशाक्षरा विराडन्न विराड्विराज्येवान्नाद्ये  
प्रति तिष्ठति संवत्सरो वै षष्ठी चित्तिरुत्तवः पुरीषः षड्वितयो  
भवन्ति षट्पुरुषाणि द्वादश सं पद्यन्ते द्वादश मासाः संवत्सरः  
संवत्सर एव प्रति तिष्ठति॥ (४१)

अव चितयः पुरीषं पञ्चदश च॥३॥ [१०]

रोहितो धूम्रोहितः कर्कशुरोहितस्ते प्राजापत्या बभ्रुररुणबभ्रुः  
शुकबभ्रुस्ते रौद्राः श्येतः श्येताक्षः श्येतग्रीवस्ते पितृदेवत्यास्तिस्रः  
कृष्णा वशा वारुण्यस्तिस्रः श्वेता वशाः सौर्यो मैत्राबारहस्पत्या  
धूम्रललामास्तूपराः॥ (४२)

[११]

पृश्निस्तिरश्चीनपृश्निरूर्ध्वपृश्निस्ते मारुताः फल्गूलोहितोर्णी  
बलक्षी ताः सारस्वत्यः पृषती स्थूलपृषती क्षुद्रपृषती ता  
वैश्वदेव्यस्तिस्रः श्यामा वशाः पौष्णियस्तिस्रो रोहिणीर्वशा मैत्रियं  
ऐन्द्राबारहस्पत्या अरुणललामास्तूपराः॥ (४३)

रोहितः पृश्निः षड्विंशतिः षड्विंशतिः॥१॥ [१२]

शितिबाहुरन्यतः शितिबाहुः समन्तशितिबाहुस्त ऐन्द्रवायवाः  
 शितिरन्ध्रोऽन्यतः शितिरन्ध्रः समन्तशितिरन्ध्रस्ते मैत्रावरुणाः  
 शुद्धवालः सर्वशुद्धवालो मणिवालस्त आश्विनास्तिस्रः  
 शिल्पा वशा वैश्वदेव्यस्तिस्रः श्येनीः परमेष्ठिने सोमापौष्णाः  
 श्यामललामास्तूपराः ॥ (४४)

[१३]

उन्नत ऋषभो वामनस्त ऐन्द्रावरुणाः शितिककुच्छितिपृष्ठः  
 शितिभसत्त ऐन्द्राबारहस्पत्याः शितिपाच्छित्योष्ठः शितिभ्रुस्त  
 ऐन्द्रावैष्णवास्तिस्रः सिध्मा वशा वैश्वकर्मण्यस्तिस्रो धात्रे पृषोदरा  
 ऐन्द्रापौष्णाः श्येतललामास्तूपराः ॥ (४५)

शितिबाहुरुन्नतः पञ्चविंशतिः पञ्चविंशतिः ॥१॥ [१४]

कर्णास्त्रयो यामाः सौम्यास्त्रयः श्वितिङ्गा अग्नये यविष्ठाय त्रयो  
 नकुलास्तिस्रो रोहिणीस्त्रयव्यस्ता वसूनान्तिस्रोऽरुणा दित्यौह्यस्ता  
 रुद्राणां सोमैन्द्रा बभ्रुललामास्तूपराः ॥ (४६)

कर्णास्त्रयोविंशतिः ॥१॥ [१५]

शुण्ठास्त्रयो वैष्णवा अधीलोधकर्णास्त्रयो विष्णव उरुक्रमाय  
 लप्सुदिनस्त्रयो विष्णव उरुगायाय पञ्चावीस्तिस्र आदित्यानां त्रिवत्सा  
 ऽङ्गिरसामैन्द्रावैष्णवा गौरललामास्तूपराः ॥ (४७)

शुण्ठा विंशतिः ॥१॥ [१६]

इन्द्राय॑ राज्ञे॒ त्रयः॑ शिति॑पृष्ठा इन्द्रा॑याधिराजाय॒ त्रयः॑  
शितिक॑कुद इन्द्रा॑य स्वराज्ञे॒ त्रयः॑ शिति॑भसदस्तिस्त्रस्तुयौ॑ह्यः  
सा॒ध्याना॑न्तिस्त्रः प॑ष्ठौह्यो विश्वे॑षां दे॒वाना॑माग्नेन्द्राः कृष्णल॑लामास्तूपराः

इन्द्राय॑ राज्ञे॒ द्वाविंशतिः॑॥१॥ [१७]

अदित्यै॑ त्रयो॑ रोहितै॒ता इन्द्रा॑ण्यै त्रयः॑ कृष्णै॒ताः कुह्वै॑  
त्रयो॑ऽरुणै॒तास्तिस्रो॑ धे॒नवो॑ रा॒कायै॑ त्रयो॑ऽन॒ड्वाहः॑ सिनीवा॒ल्या  
आ॑ग्नावैष्ण॒वा रोहि॑तललामास्तूपराः॥ (४९)

अदित्या॑ अष्टाद॑श॥१॥ [१८]

सौम्या॑स्त्रयः॑ पि॒शङ्गाः॒ सोमा॑य॒ राज्ञे॒ त्रयः॑ सा॒रङ्गाः॒ पार्ज॑न्या  
नभो॑रूपास्तिस्रो॑ऽजा म॒ल्हा इन्द्रा॑ण्यै तिस्रो॑ मे॒ष्य आदि॑त्या  
द्या॒वापृ॑थिव्या॑ माल॒ङ्गास्तूप॑राः॥ (५०)

सौम्या॑ एका॒त्रविंशतिः॑॥१॥ [१९]

वा॒रुणा॑स्त्रयः॑ कृष्णल॑लामा वरु॑णाय॒ राज्ञे॒ त्रयो॑ रोहि॑तोललामा  
वरु॑णाय रि॒शाद॑से त्रयो॑ऽरुणल॑लामाः शिल्पा॑स्त्रयो॑ वैश्वदे॒वास्त्रयः॑  
पृ॒श्नयः॑ सर्वदे॒वत्या॑ ऐन्द्रा॑सूराः श्येत॑ललामास्तूपराः॥ (५१)

वा॒रुणा॑ विंशतिः॑॥१॥ [२०]

सोमा॑य स्वराज्ञे॑ऽनोवा॒हाव॑न॒ड्वाहा॑विन्द्रा॒ग्निभ्या॑मोजो॒दाभ्या॑मुष्टा॒राभि॑  
भ्या॑ बल॒दाभ्या॑ सीरवा॒हाव॑वी द्वे धे॒नू भौमी॑ दिग्भ्यो वड॑बे द्वे धे॒नू  
भौमी॑ वैरा॒जी पु॑रुषी द्वे धे॒नू भौमी॑ वा॒यव॑ आरोहणवा॒हाव॑न॒ड्वाहौ॑

वारुणी कृष्णे वशे अराड्यौ दिव्यावृषभौ परिमरौ॥ (५२)

सोमाय स्वराज्ञे चतुस्त्रिंशत्॥१॥ [२१]

एकादश प्रातर्गव्याः पशव आ लभ्यन्ते छगुलः कल्माषः  
किकिदीविर्विदीगयस्ते त्वाष्ट्राः सौरीर्नव श्वेता वशा अनूबन्ध्या  
भवन्त्याग्नेय ऐन्द्राग्र आश्विनस्ते विशालयूप आ लभ्यन्ते॥ (५३)

एकादश पञ्चविंशतिः॥१॥ [२२]

पिशङ्गास्त्रयो वासन्ताः सारङ्गास्त्रयो ग्रैष्माः पृषन्तस्त्रयो  
वार्षिकाः पृश्नयस्त्रयः शारदाः पृश्निसक्थास्त्रयो हैमन्तिका  
अवलिप्तास्त्रयः शैशिराः संवत्सराय निवक्षसः (५४)

पिशङ्गा विंशतिः॥१॥ [२३]

हिरण्यवर्णा अपां ग्रहान्भूतेष्टकाः सज्जः संवत्सरं प्रजापतिः स क्षुरपविरग्नेर्वै दीक्षया सुवर्गाय तं  
यन्न सूयते प्रजापतिरुक्तुभी रोहितः पृश्नः शितिबाहरुन्नतः कर्णाः शुण्ठा इन्द्रायादित्यै सोम्या वारुणाः  
सोमायैकादश पिशङ्गास्त्रयैविंशतिः॥ २३॥

हिरण्यवर्णा भूतेष्टकाश्छन्दो यत्कर्नीयासन्निवृद्धाग्निर्वारुणाश्चतुःपञ्चाशत्॥ ५४॥

हिरण्यवर्णा निवक्षसः॥

हरिः ॐ॥

॥कृष्ण-यजुर्वेदीय-तैत्तिरीय-संहितायां पञ्चमकाण्डे षष्ठः प्रश्नः  
समाप्तः॥ ५-६॥



## ॥ सप्तमः प्रश्नः ॥

## ॥ तैत्तिरीयसंहितायां पञ्चमकाण्डे सप्तमः प्रश्नः ॥

यो वा अयंथादेवतमग्निं चिनुत आ देवताभ्यो वृश्च्यते  
 पापीयान्भवति यो यंथादेवतं न देवताभ्य आ वृश्च्यते  
 वसीयान्भवत्याग्नेय्या गायत्रिया प्रथमां चितिमभि मृशेत्  
 त्रिष्टुभां द्वितीयां जगत्या तृतीयांमनुष्टुभां चतुर्थीं पङ्क्त्या पञ्चमीं  
 यंथादेवतमेवाग्निं चिनुते न देवताभ्य आ वृश्च्यते वसीयान्भवतीडांयै  
 वा एषा विभक्तिः पशव इडां पशुभिरेनम् (१)

चिनुते यो वै प्रजापतये प्रतिप्रोच्याग्निं चिनोति  
 नार्तिमार्च्छत्यश्वावभितस्तिष्ठेतां कृष्ण उत्तरतः श्वेतो दक्षिण-  
 स्तावालभ्येष्टका उप दध्यादेतद्वै प्रजापते रूपं प्राजापत्योऽश्वः  
 साक्षादेव प्रजापतये प्रतिप्रोच्याग्निं चिनोति नार्तिमार्च्छत्येतद्वा  
 अहो रूपं यच्छ्वेतोऽश्वो रात्रियै कृष्ण एतदहः (२)

रूपं यदिष्टका रात्रियै पुरीषमिष्टका उपधास्यञ्छ्वेतमश्वमभि  
 मृशेत्पुरीषमुपधास्यन्कृष्णमहोरात्राभ्यामेवैनं चिनुते हिरण्यपात्रं  
 मधोः पूर्णं ददाति मध्व्योऽसानीति सौर्या चित्रवत्यावेक्षते चित्रमेव  
 भवति मध्यन्दिनेऽश्वमव घ्रापयत्यसौ वा आदित्य इन्द्र एष  
 प्रजापतिः प्राजापत्योऽश्वस्तमेव साक्षाद्वधोति॥ (३)

त्वामग्ने वृषभं चेकिंतानं पुनर्युवानञ्जनयन्नुपागाम्। अस्थूरि णो  
 गार्हपत्यानि सन्तु तिग्मेन नो ब्रह्मणा सः शिंशाधि। पशवो वा  
 एते यदिष्टकाश्चित्यामृषभमुप दधाति मिथुनमेवास्य तद्यज्ञे  
 करोति प्रजननाय तस्माद्यथेयूथ ऋषभः। संवत्सरस्य प्रतिमां  
 यां त्वां राज्युपासते। प्रजाः सुवीरां कृत्वा विश्वमायुर्व्यश्नवत्।  
 प्राजापत्याम् (४)

एतामुप दधातीयं वावैषैकाष्टका यदेवैकाष्टकायामन्नं क्रियते  
 तदेवैतयाव रुन्ध एषा वै प्रजापतेः कामदुघा तयैव यजमानो-  
 ऽमुष्मिल्लोकेऽग्निं दुहे येन देवा ज्योतिषोर्ध्वा उदायन् येनादित्या  
 वसवो येन रुद्राः। येनाङ्गिरसो महिमानमानशुस्तेनैतु यजमानः  
 स्वस्ति। सुवर्गाय वा एष लोकाय (५)

चीयते यदग्निर्येन देवा ज्योतिषोर्ध्वा उदायन्नित्युख्यः  
 समिन्द्र इष्टका एवैता उप धत्ते वानस्पत्याः सुवर्गस्य लोकस्य  
 समष्ट्यै शतायुधाय शतवीर्याय शतोतयेऽभिमातिषाहे। शतं  
 यो नः शरदो अजीतानिन्द्रो नेषदति दुरितानि विश्वा। ये  
 चत्वारः पथर्यो देवयाना अन्तरा द्यावापृथिवी वियन्ति। तेषां यो  
 अज्यानिमर्जीतिमा वहत्तस्मै नो देवाः (६)

परि दत्तेह सर्वे। ग्रीष्मो हेमन्त उत नो वसन्तः शरद्वर्षाः  
 सुवितं नो अस्तु। तेषामृतूनां शतशारदानां निवात एषामभये

स्याम। इदुवत्सरायं परिवत्सरायं संवत्सरायं कृणुता बृहन्नमः।  
 तेषां वयं सुमतौ यज्ञियानां ज्योगर्जीता अहताः स्याम। भद्रान्नः  
 श्रेयः समनैष्ट देवास्त्वयावसेन समशीमहि त्वा। स नो मयोभूः  
 पितो (७)

आ विशस्व शं तोकायं तनुवै स्योनः। अज्यानीरेता उप  
 दधात्येता वै देवता अपराजितास्ता एव प्र विशति नैव जीयते  
 ब्रह्मवादिनो वदन्ति यदर्धमासा मासा ऋतवः संवत्सर ओषधीः  
 पचन्त्यथ कस्मादन्याभ्यो देवताभ्य आग्रयणं निरूप्यत इत्येता हि  
 तद्देवता उदजयन् यदृतुभ्यो निर्वपेद्देवताभ्यः समदं दध्यादाग्रयणं  
 निरूप्येता आहुतीर्जुहोत्यर्धमासानेव मासानृतून्संवत्सरं प्रीणाति  
 न देवताभ्यः समदं दधाति भद्रान्नः श्रेयः समनैष्ट देवा इत्याह  
 हुताद्याय यजमानस्यापराभावाय॥ (८)

प्राजापत्यां लोकायं देवाः पितो दध्यादाग्रयणं पञ्चविंशतिश्च॥५॥ [२]

इन्द्रस्य वज्रोऽसि वार्त्रघ्नस्तनूपा नः प्रतिस्पशः। यो  
 नः पुरस्तादक्षिणतः पश्चादुत्तरतोऽघायुरभिदासत्येतं सो-  
 ऽश्मानमृच्छतु। देवासुराः संयन्ता आसन्तेऽसुरा दिग्भ्य आबाधन्त  
 तां देवा इष्वा च वज्रेण चापानुदन्त यद्वज्रिणीरुपदधातीष्वा चैव  
 तद्वज्रेण च यजमानो भ्रातृव्यानपं नुदते दिक्षूपं (९)

दधाति देवपुरा एवैतास्तनूपानीः पर्यूहतेऽग्नाविष्णू सजोषंसेमा

वर्धन्तु वा॒ गिरः॑। द्यु॒मैर्वा॒जैर्भिरा॑ गन्तम्। ब्र॒ह्म॒वा॒दिना॑ वदन्ति  
 यन्न दे॒वता॑यै जु॒ह्वत्यथ॑ कि॒न्दे॒व॒त्या॑ वसो॒धरि॑त्यग्निर्वसुस्तस्यैषा  
 धारा॒ विष्णु॑र्वसुस्तस्यैषा धारा॑ग्नावैष्ण॒व्यर्चा॑ वसो॒र्धारा॑ जुहोति  
 भा॒ग॒धे॒यै॒नै॒वैनौ॑ सम॒र्धय॑त्यथो॑ ए॒ताम् (१०)

ए॒वाहु॑तिमा॒यत॑नवतीं करोति॒ यत्काम॑ ए॒नां जु॒होति॑ तदे॒वाव॑  
 रु॒न्धे रु॒द्रो वा ए॒ष यद॒ग्नि॒स्तस्यै॑ते त॒नुवौ॑ घो॒रान्या॑ शि॒वान्या॑  
 यच्छ॑तरु॒द्रीयं॑ जुहोति॒ यैवा॒स्य॑ घो॒रा त॒नूस्तां॑ तेन॑ शमयति॒  
 यद्वसो॒र्धारा॑ जुहोति॒ यैवा॒स्य॑ शि॒वा त॒नूस्तां॑ तेन॑ प्रीणाति॒ यो वै  
 वसो॒र्धारा॑यै (११)

प्र॒ति॒ष्ठां वेद॑ प्रत्ये॒व ति॑ष्ठति॒ यदा॒ज्यं मु॒च्छिष्ये॑त॒ तस्मि॑न्ब्रह्मो॒दनं॑  
 प॑चेत्तं ब्रा॒ह्म॒णाश्च॒त्वारः॑ प्रा॒श्नी॒युरे॒ष वा अ॒ग्निर्वै॑श्वान॒रो यद्वा॑ ह॒ण  
 ए॒षा खलु॑ वा अ॒ग्नेः प्रि॒या त॒नूर्यद्वै॑श्वान॒रः प्रि॒याया॑मे॒वैनौ॑ त॒नुवां॑  
 प्र॒ति॒ष्ठाप॑यति॒ चत॑स्रो धे॒नू॒र्दद्या॑त्ताभि॒रे॒व यज॑मानोऽमुष्मि॑ल्लो॒केऽग्निं॑  
 द॑हे॥ (१२)

उपे॒ताभ्या॑यै षट्त्वारि॑शच्च॥ ४॥

[३]

चित्तिं॑ञ्जुहोमि॒ मन॑सा घृ॒तेने॒त्याहा॑दाभ्या॒ वै नामै॑षाहु॒तिर्वै॑श्वकर्म॒णी  
 नैनं॑ चि॒क्या॒नं भ्रातृ॑व्यो द॒भ्रो॒त्यथो॑ दे॒वता॑ ए॒वाव॑ रु॒न्धेऽग्ने॑ तम॒द्येति॑  
 प॒ङ्क्या जु॒होति॑ प॒ङ्क्याहु॑त्या यज्ञ॒मुख॑मार॒भते॑ स॒प्त ते॑ अ॒ग्ने  
 स॒मिधः॑ स॒प्त जि॒ह्वा इत्या॑ह॒ होत्रा॑ ए॒वाव॑ रु॒न्धेऽग्नि॑र्दे॒वेभ्यो॑-

## उपाक्रामद्वागधेयम् (१३)

इच्छमानस्तस्मा एतद्वागधेयं प्रायच्छन्नेतद्वा अग्नेरग्निहोत्रमेतर्हि  
खलु वा एष जातो यर्हि सर्वश्चितो जातायैवास्मा अन्नमपि  
दधाति स एनं प्रीतः प्रीणाति वसीयान्भवति ब्रह्मवादिनो वदन्ति  
यदेष गार्हपत्यश्चीयतेऽथ क्वास्याहवनीय इत्यसावादित्य इति  
ब्रूयादेतस्मिन् हि सर्वाभ्यो देवताभ्यो जुह्वति (१४)

य एवं विद्वानग्निं चिनुते साक्षादेव देवता ऋध्नोत्यग्ने यशस्विन्  
यशसेममर्पयेन्द्रावतीमर्पचितीमिहा वह। अयं मूर्धा परमेष्ठी  
सुवर्चाः समानानामुत्तमश्लोको अस्तु। भद्रं पश्यन्त उप सेदुरग्ने  
तपो दीक्षामर्षयः सुवर्विदः। ततः क्षत्रं बलमोजश्च जातं तदस्मै  
देवा अभि सं नमन्तु। धाता विधाता परमा (१५)

उत सन्दृक्प्रजापतिः परमेष्ठी विराजा। स्तोमाश्छन्दांसि  
निविदो म आहुरेतस्मै राष्ट्रमभि सं नमाम। अभ्यावर्तध्वमुप  
मेत साकमयः शास्ताधिपतिर्वो अस्तु। अस्य विज्ञानमनु सः  
रभध्वमिमं पश्चादनु जीवाथ सर्वे। राष्ट्रभृत एता उप दधात्येषा वा  
अग्नेश्चिती राष्ट्रभृत्यैवास्मिन्नाष्ट्रं दधाति राष्ट्रमेव भवति नास्माद्राष्ट्रं  
भ्रंशते॥ (१६)

भागधेयजुह्वति परमा राष्ट्रं दधाति सप्त च॥४॥ [४]

यथा वै पुत्रो जातो म्रियत एवं वा एष म्रियते यस्याग्निरुख्यं

उद्वायति यन्निर्मन्थ्यं कुर्याद्विच्छिन्द्याद्भातृव्यमस्मै जनयेत्स एव पुनः  
परीध्यः स्वादेवैनं योनेर्जनयति नास्मै भ्रातृव्यं जनयति तमो वा  
एतं गृह्णाति यस्याग्निरुख्यं उद्वायति मृत्युस्तमः कृष्णं वासः कृष्णा  
धेनुर्दक्षिणा तमसा (१७)

एव तमो मृत्युमपं हते हिरण्यं ददाति ज्योतिर्वै हिरण्यं  
ज्योतिषैव तमोऽपं हतेऽथो तेजो वै हिरण्यन्तेज एवाऽऽ-  
त्मन्धत्ते सुवर्नं घर्मः स्वाहा सुवर्नार्कः स्वाहा सुवर्नं शुक्रः  
स्वाहा सुवर्नं ज्योतिः स्वाहा सुवर्नं सूर्यः स्वाहार्को वा एष  
यदग्निरसावादित्यः (१८)

अश्वमेधो यदेता आहुतीर्जुहोत्यर्काश्वमेधयोरैव ज्योतींषि सं  
दधात्येष ह त्वा अर्काश्वमेधी यस्यैतदग्नौ क्रियत आपो वा इदमग्रे  
सलिलमासीत्स एतां प्रजापतिः प्रथमां चित्तिमपश्यत्तामुपाधत्त  
तदियमभवत्तं विश्वकर्माब्रवीदुप त्वायानीति नेह लोको-  
ऽस्तीति (१९)

अब्रवीत्स एतां द्वितीयां चित्तिमपश्यत्तामुपाधत्त तदन्तरिक्षमभवत्  
यज्ञः प्रजापतिमब्रवीदुप त्वायानीति नेह लोकोऽस्तीत्यब्रवीत्स  
विश्वकर्माणमब्रवीदुप त्वायानीति केन मोपैष्यसीति दिश्याभिरित्यब्रवीत्  
उपाधत्त ता दिशः (२०)

अभवन्त्स परमेष्ठी प्रजापतिमब्रवीदुप त्वायानीति नेह लोको-  
ऽस्तीत्यब्रवीत्स विश्वकर्माणं च यज्ञं चाब्रवीदुप वामायानीति

नेह लोकोऽस्तीत्यब्रूताः स एतां तृतीयां चितिमपश्यन्तामुपाधत्त  
तदसावभवत्स आदित्यः प्रजापतिमब्रवीदुप त्वा (२१)

आयानीति नेह लोकोऽस्तीत्यब्रवीत्स विश्वकर्माणं  
च यज्ञं चाब्रवीदुप वामायानीति नेह लोकोऽस्तीत्यब्रूताः  
स परमेष्ठिनमब्रवीदुप त्वायानीति केन मोपैष्यसीति  
लोकम्पृणयेत्यब्रवीत्तं लोकम्पृणयौपैतस्मादयातयाम्नी लोकम्पृणा-  
यातयामा ह्यसौ (२२)

आदित्यस्तानृषयोऽब्रुवन्नुप व आयामेति केन न उपैष्यथेति  
भूमेत्यब्रुवन्तां द्वाभ्यां चितौभ्यामुपायन्त्स पञ्चचितीकः समपद्यत्  
य एवं विद्वानग्निं चिनुते भूयानेव भवत्यभीमाँल्लोकाञ्जयति विदुरेनं  
देवा अथो एतासामेव देवतानां सायुज्यं गच्छति॥ (२३)

तमसाऽऽदित्योऽस्तीति दिशं आदित्यः प्रजापतिमब्रवीदुप त्वाऽसौ पञ्चचत्वारिंशच्च॥७॥—[५]

वयो वा अग्निर्यदग्निचित्पक्षिणोऽश्नीयात्तमेवाग्निमद्यादार्तिमार्च्छं  
व्रतं चरेत्संवत्सरं हि व्रतं नाति पशुर्वा एष यदग्निर्हिनस्ति खलु  
वै तं पशुर्य एनं पुरस्तात्प्रत्यञ्मुपचरति तस्मात्प्रश्वात्प्राडुपचर्य  
आत्मनोऽहिंसायै तेजोऽसि तेजो मे यच्छ पृथिवीं यच्छ (२४)

पृथिव्यै मां पाहि ज्योतिरसि ज्योतिर्मे यच्छान्तरिक्षं  
यच्छान्तरिक्षान्मा पाहि सुवरसि सुवर्मे यच्छ दिवं यच्छ दिवो  
मां पाहीत्याहैताभिर्वा इमे लोका विधृता यदेता उपदधात्येषां

लो॒कानां॒ वि॒धृत्यै॒ स्वय॑मातृ॒ण्णा उ॑प॒धाय॑ हिर॒ण्येष्ट॑का उ॒प॑  
दधा॒ती॒मे वै लो॒काः स्व॑यमातृ॒ण्णा ज्योति॑र॒हिर॑ण्यं यथ॒स्वय॑मातृ॒ण्णा  
उ॑प॒धाय॑ (२५)

हिर॒ण्येष्ट॑का उ॒प॑दधा॒ती॒माने॒वैताभि॑र्लो॒कां ज्योति॑ष्मतः कुरु॒ते-  
ऽथो॑ ए॒ताभि॑रे॒वास्मा॑ इ॒मे लो॒काः प्र भा॑न्ति यास्ते॑ अ॒ग्ने सूर्ये॑  
रुचं॑ उद्य॒तो दि॒वंमा॑तृन्वन्ति॑ र॒श्मिभिः॑। ताभिः॑ सर्वा॑भी रु॒चे जना॑य  
नस्कृ॒धि। या वो॑ दे॒वाः सूर्ये॑ रु॒चो गो॒ष्वश्वेषु॑ या रुचं॑। इन्द्रा॑ग्नी  
ताभिः॑ सर्वा॑भी रुचं॑ नो धत्त बृह॒स्पते। रुचं॑ नो धेहि (२६)

ब्रा॒ह्म॒णेषु॑ रुच॒ः राज॑सु नस्कृ॒धि। रुचं॑ वि॒श्येषु॑ शू॒द्रेषु॑ मयि॑ धेहि  
रु॒चा रुच॑म्। द्वेधा॑ वा अ॒ग्निं चि॑क्या॒नस्य॑ यशं॑ इन्द्रि॒यं गच्छ॑त्य॒ग्निं  
वा चि॒तमी॑जा॒नं वा यदे॒ता आहु॑तीर्जु॒होत्या॑त्म॒न्नेव॑ यशं॑ इन्द्रि॒यं धत्त॑  
ई॒श्वरो॑ वा ए॒ष आ॒र्तिमा॒र्तो॒र्योऽग्निं॑ चि॒न्वन्न॑धि॒क्राम॑ति॒ तत्त्वा॑ या॒मि  
ब्र॒ह्म॒णा व॑न्द॒मान॒ इति॑ वा॒रु॒ण्यर्चा॑ (२७)

जुहु॒या॒च्छान्ति॑रे॒वेषा॑ग्नेर्गु॒प्तिरा॑त्म॒नो ह॒विष्कृ॑तो॒ वा ए॒ष योऽग्निं॑  
चि॒नुते॑ यथा॒ वै ह॒विः स्क॑न्द॒त्येवं॑ वा ए॒ष स्क॑न्दति॒ योऽग्निं॑ चि॒त्वा  
स्त्रिय॑मु॒पैति॑ मै॒त्राव॑रु॒ण्यामि॑क्षं॒या यजे॑त मै॒त्राव॑रु॒णता॑मे॒वोपै॑त्या॒त्मनो॑-  
ऽस्क॑न्दाय॒ यो वा अ॒ग्निमृ॑तु॒स्थां वेद॑र्तु॒र्ऋतु॑र॒स्मै क॑ल्प॒मान॑ ए॒ति  
प्र॒त्ये॒व तिष्ठ॑ति संव॒त्सरो॑ वा अ॒ग्निः (२८)

ऋ॒तु॒स्थास्त॑स्य॒ वस॑न्तः शिरो॑ ग्री॒ष्मो दक्षि॑णः प॒क्षो



वरुषाः पुच्छं शरदुत्तरः पक्षो हैमन्तो मध्यं पूर्वपक्षाश्चितयो-  
 ऽपरपक्षाः पुरीषमहोरात्राणीष्टका एष वा अग्निर्ऋतुस्था य एवं  
 वेदतुर्ऋतुस्मै कल्पमान एति प्रत्येव तिष्ठति प्रजापतिर्वा एतं  
 ज्यैष्ठ्यकामो न्यधत्त ततो वै स ज्यैष्ठ्यमगच्छुद्य एवं विद्वानग्निं  
 चिनुते ज्यैष्ठ्यमेव गच्छति॥ (२९)

पृथिवीं यच्छु यथ्वयमातृणा उपधायं धेहृचाग्निश्चिनुते त्रीणि च॥६॥ [६]

यदाकूतात्समसुस्रोद्धृदो वा मनसो वा सम्भृतं चक्षुषो वा।  
 तमनु प्रेहि सुकृतस्य लोकं यत्रर्षयः प्रथमजा ये पुराणाः। एतं  
 संधस्थ परि ते ददामि यमावहाच्छेवधिं जातवेदाः। अन्वागन्ता  
 यज्ञपतिर्वा अत्र तं स्म जानीत परमे व्योमन्। जानीतादेनं परमे  
 व्योमन्देवाः सधस्था विद रूपमस्य। यदागच्छात् (३०)

पृथिभिर्देवयानैरिष्टापूर्ते कृणुतादविरस्मै। सम्प्र च्यवध्वमनु  
 सम्प्र याताग्ने पथो देवयानान्कृणुध्वम्। अस्मिन्सधस्थे  
 अध्युत्तरस्मिन्विश्वे देवा यजमानश्च सीदत। प्रस्तरेण परिधिना  
 स्रुचा वेद्यां च बरहिषा। ऋचेमं यज्ञं नो वह सुवर्देवेषु गन्तवे।  
 यदिष्टं यत्परादानं यद्दत्तं या च दक्षिणा। तत् (३१)

अग्निर्वैश्वकर्मणः सुवर्देवेषु नो दधत्। येनां सहस्रं वहसि  
 येनाग्ने सर्ववेदसम्। तेनेमं यज्ञं नो वह सुवर्देवेषु गन्तवे। येनाग्ने  
 दक्षिणा युक्ता यज्ञं वहन्त्यृत्विजः। तेनेमं यज्ञं नो वह सुवर्देवेषु  
 गन्तवे। येनाग्ने सुकृतः पथा मधोर्धारा व्यानशुः। तेनेमं यज्ञं नो

वह सुवर्देवेषु गन्तवे। यत्र धारा अनपेता मधोर्धृतस्य च याः।  
तदग्निर्वैश्वकर्मणः सुवर्देवेषु नो दधत्॥ (३२)

आगच्छात्तद्व्यानशुस्तेनेमं यज्ञं नो वह सुवर्देवेषु गन्तवे चतुर्दश च॥३॥ [७]

यास्ते अग्ने समिधो यानि धाम या जिह्वा जातवेदो यो  
अर्चिः। ये ते अग्ने मेडयो य इन्द्रवस्तेभिरात्मानं चिनुहि प्रजानन्।  
उत्सन्नयज्ञो वा एष यदग्निः किं वा हैतस्य क्रियते किं वा न यद्वा  
अध्वर्युरग्नेश्चिन्वन्नन्तरेत्यात्मनो वै तदन्तरैति यास्ते अग्ने समिधो  
यानि (३३)

धामेत्याहैषा वा अग्नेः स्वयञ्चितिरग्निरेव तदग्निं चिनोति  
नाध्वर्युरात्मनोऽन्तरैति चतस्र आशाः प्र चरन्त्वग्नय इमं  
नो यज्ञं नयतु प्रजानन्। घृतं पिन्वन्नजरं सुवीरं ब्रह्म  
समिद्धवत्याहुतीनाम्। सुवर्गाय वा एष लोकायोप धीयते  
यत्कूर्मश्चतस्र आशाः प्र चरन्त्वग्नय इत्याह (३४)

दिश एवैतेन प्र जानातीमं नो यज्ञं नयतु प्रजानन्नित्याह  
सुवर्गस्य लोकस्याभनीत्यै ब्रह्म समिद्धवत्याहुतीनामित्याह  
ब्रह्मणा वै देवाः सुवर्गं लोकमायन् यद्ब्रह्मण्वत्योपदधाति ब्रह्मणैव  
तद्यजमानः सुवर्गं लोकमेति प्रजापतिर्वा एष यदग्निस्तस्य प्रजाः  
पशवश्छन्दांसि रूपं सर्वान् वर्णानिष्टकानां कुर्याद्रूपेणैव प्रजां  
पशूञ्छन्दांस्यव रुन्धेऽथो प्रजाभ्य एवैनं पशुभ्यश्छन्दाभ्योऽवरुद्ध

चिनुते॥ (३५)

यान्यग्रय इत्याहेष्टकानां षोडश च॥३॥ [८]

मयि गृह्णाम्यग्रे अग्निं रायस्पोषाय सुप्रजास्त्वाय सुवीर्याय।  
मयि प्रजां मयि वर्चो दधाम्यरिष्टाः स्याम तनुवा सुवीराः।  
यो नो अग्निः पितरो हृथ्स्वन्तरमर्त्यो मर्त्या आविवेश।  
तमात्मन्परि गृह्णीमहे वयं मा सो अस्मा अवहाय परां  
गात्। यदध्वर्युरात्मन्नग्निमगृहीत्वाग्निं चिनुयाद्योऽस्य स्वो-  
ऽग्निस्तमपि (३६)

यजमानाय चिनुयादग्निं खलु वै पशवोऽनूपं तिष्ठन्ते-  
ऽपक्रामुंका अस्मात्पशवः स्युर्मयि गृह्णाम्यग्रे अग्निमित्याहात्मन्नेव  
स्वमग्निं दाधार नास्मात्पशवोऽपं क्रामन्ति ब्रह्मवादिनो वदन्ति  
यन्मृच्चापश्चाग्नेरनाद्यमथ कस्मान्मृदा चाद्विश्वग्निश्चीयत इति  
यदद्विः संयौति (३७)

आपो वै सर्वा देवता देवताभिरेवैनं स संजति यन्मृदा  
चिनोतीयं वा अग्निर्वैश्वानरोऽग्निनैव तदग्निं चिनोति ब्रह्मवादिनो  
वदन्ति यन्मृदा चाद्विश्वग्निश्चीयतेऽथ कस्मादग्निरुच्यत इति  
यच्छन्दाभिश्चिनोत्यग्रयो वै छन्दांसि तस्मादग्निरुच्यतेऽथो इयं  
वा अग्निर्वैश्वानरो यत् (३८)

मृदा चिनोति तस्मादग्निरुच्यते हिरण्येष्टका उपं दधाति

ज्योतिर्वै हिरण्यं ज्योतिरेवास्मिन्दधात्यथो तेजो वै हिरण्यं  
 तेजं एवाऽऽत्मन्धत्ते यो वा अग्निः सर्वतोमुखं चिनुते सर्वासु  
 प्रजास्वन्नमत्ति सर्वा दिशोऽभि जयति गायत्रीं पुरस्तादुप दधाति  
 त्रिष्टुभं दक्षिणतो जगतीं पश्चादनुष्टुभमुत्तरतः पङ्क्तिं मध्यं एष वा  
 अग्निः सर्वतोमुखस्तं य एवं विद्वाश्चिनुते सर्वासु प्रजास्वन्नमत्ति  
 सर्वा दिशोऽभि जयत्यथो दिश्येव दिशं प्र वयति तस्माद्विशि  
 दिक्प्रोता॥ (३९)

अपिं सं योतिं वैश्वानरो यदेष वै पञ्चविंशतिश्च॥४॥ [९]

प्रजापतिरग्निमसृजत सोऽस्मात्सृष्टः प्राङ्वाद्रवत्तस्मा अश्वं  
 प्रत्यास्यत्स दक्षिणावर्तत तस्मै वृष्णिं प्रत्यास्यत्स प्रत्यङ्गावर्तत  
 तस्मा ऋषभं प्रत्यास्यत्स उदङ्गावर्तत तस्मै बस्तं प्रत्यास्यत्स  
 ऊर्ध्वोऽद्रवत्तस्मै पुरुषं प्रत्यास्यत् यत्पशुशीर्षाण्युपदधाति सर्वत  
 एवैनम् (४०)

अवरुध्यं चिनुत एता वै प्राणभृतश्चक्षुष्मतीरिष्टका  
 यत्पशुशीर्षाणि यत्पशुशीर्षाण्युपदधाति ताभिरेव यजमानो-  
 ऽमुष्मिल्लोके प्राणित्यथो ताभिरेवास्मा इमे लोकाः प्र भान्ति  
 मृदाभिलिप्योप दधाति मेध्यत्वाय पशुर्वा एष यदग्निरन्नं पशवं एष  
 खलु वा अग्निर्यत्पशुशीर्षाणि यं कामयेत कनीयोऽस्यान्नम् (४१)

स्यादिति सन्तरां तस्य पशुशीर्षाण्युप दध्यात्कनीय

ए॒वास्यान्न॑म्भवति॒ यं का॒मये॑त स॒माव॑दस्यान्नः॑ स्या॒दिति॑  
म॒ध्यत॑स्तस्योप॑ द॒ध्यात्स॑माव॑दे॒वास्यान्न॑म्भवति॒ यं का॒मये॑त  
भूयो॑ऽस्यान्नः॑ स्या॒दित्यन्ते॑षु तस्य॑ व्यु॒दूह्योप॑ द॒ध्यादन्त॑त ए॒वास्मा॑  
अन्न॑मव॑ रुन्धे भूयो॑ऽस्यान्न॑म्भवति॥ (४२)

ए॒न॒म॒स्यान्न॑म्भूयो॑स्यान्न॑म्भवति॥ ३॥ ————— [१०]

स्ते॒गान्द॑ष्ट्राभ्यां म॒ण्डूका॑ञ्ज॒म्यैभि॑राद॒कां खा॑देनोर्जः  
स॒सू॒देनार॑ण्यं जा॒म्बीले॑न मृद॑म्ब॒स्वैभिः॑ शर्करा॑भिरव॒का॒मव॑काभिः  
शर्करा॑मु॒त्सादे॑न जि॒ह्वा॒मव॑क्र॒न्देन॑ ता॒लुः सर॑स्वतीं जिह्वा॒ग्रेण॑॥ (४३)

स्ते॒गान्द्वावि॑शतिः॥ १॥ ————— [११]

वाज॑ः ह॒नूभ्या॑म॒प आ॒स्ये॑ना॒दित्या॑ञ्ज्ज॒श्रुभि॑रु॒पया॑म॒मध॑रेणोष्ठेन॑  
सदु॑त्तरे॒णान्त॑रेणानू॒काशं॑ प्र॒का॒शेन॑ बा॒ह्यः स्त॑नयितुं नि॒र्बा॒धेन॑  
सूर्या॑ग्नी चक्षु॑भ्यां वि॒द्युतौ॑ क॒नान॑काभ्याम॒शनिं॑ म॒स्तिष्के॑ण॒ बलं॑  
म॒ज्जभिः॑॥ (४४)

वाजं॑ पञ्चवि॑शतिः॥ १॥ ————— [१२]

कूर्मा॑ञ्छ॒फैर॑च्छ॒लाभिः॑ क॒पिञ्ज॑ला॒न्त्साम॑ कु॒ष्ठिका॑भिर्ज॒वं  
जङ्घा॑भिरग॒दं जानु॑भ्यां वी॒र्यं॑ कु॒हाभ्यां॑ भ॒यं प्र॑चा॒लाभ्यां॑  
गुहो॑प॒पक्षा॑भ्याम॒श्विना॑व॒सोभ्या॑म॒दिति॑ शी॒र्ष्णा नि॑र॒ऋतिं॑  
निर्जा॑ल्मकेन शी॒र्ष्णा॑॥ (४५)

कूर्मान्नयौविंशतिः ॥ १ ॥ \_\_\_\_\_ [१३]

योक्त्रं गृध्राभिर्युगमानं तेन चित्तं मन्याभिः सङ्क्रोशान्प्राणैः  
प्रकाशेन त्वचं पराकाशेनान्तरां मृशकान्केशैरिन्द्रं स्वपंसा वह्नेन  
बृहस्पतिं शकुनिसादेन रथमुष्णिहाभिः ॥ (४६)

योक्त्रमेकंविंशतिः ॥ १ ॥ \_\_\_\_\_ [१४]

मित्रावरुणौ श्रोणीभ्यामिन्द्राग्नी शिखण्डाभ्यामिन्द्राबृहस्पती  
ऊरुभ्यामिन्द्राविष्णू अष्टीवद्धा सवितारं पुच्छेन गन्धर्वाज्छेपेनाप्सस  
मुष्काभ्यां पवमानं पायुनां पवित्रं पोत्राभ्यामाक्रमणं स्थूराभ्यां  
प्रतिक्रमणं कुष्ठाभ्याम् ॥ (४७)

\_\_\_\_\_ [१५]

इन्द्रस्य क्रोडोऽदित्यै पाजस्यन्दिशां जत्रवो जीमूतान्हृदयोपशाम्भ  
पुरितता नभ उदर्येणेन्द्राणीं प्लोहा वल्मीकान्क्लोम्रा गिरीन्प्लाशिभिः  
समुद्रमुदरेण वैश्वानरं भस्मना ॥ (४८)

मित्रावरुणाविन्द्रस्य द्वाविंशतिर्द्वाविंशतिः ॥ १ ॥ \_\_\_\_\_ [१६]

पूष्णो वनिष्ठुरन्धाहेः स्थूरगुदा सर्पान्गुदाभिर्ऋतूनृष्टीभिर्दिवं  
पृष्ठेन वसूनां प्रथमा कीकसा रुद्राणां द्वितीयादित्यानां  
तृतीयाङ्गिरसां चतुर्थी साध्यानां पञ्चमी विश्वेषां देवानां  
षष्ठी ॥ (४९)

पृष्णश्चतुर्विंशतिः॥१॥ [१७]

ओजो॑ ग्री॒वाभि॑र्नि॒र्ऋति॑म॒स्थभि॑रिन्द्र॒ः स्वप॑सा॒ वह॑ेन रु॒द्रस्य॑  
विच॒लः स्क॒न्धोऽहो॑रा॒त्रयो॑र्द्वि॒तीयो॑ऽर्धमा॒सानां॑ तृ॒तीयो॑ मा॒सां च॑तुर्थ  
ऋ॒तूनां प॑ञ्च॒मः संव॑त्सरस्य॑ ष॒ष्ठः॥ (५०)

ओजो॑ वि॒ंशतिः॥१॥ [१८]

आ॒न॒न्दं न॒न्दथु॑ना॒ कामं॑ प्र॒त्यासा॒भ्यां भ॒यं शि॑ती॒मभ्या॑  
प्र॒शिषं॑ प्र॒शासा॒भ्यां सूर्या॑चन्द्र॒मसौ॑ वृ॒क्याभ्या॑ः श्याम॑श॒बलौ॑  
म॒त॑स्त्रा॒भ्याव्यु॑ष्टि॒रूपेण॑ नि॒मृक्ति॑म॒रूपेण॑॥ (५१)

आ॒न॒न्दं षोड॑श॥१॥ [१९]

अ॒ह॒र्मा॑से॒न रा॒त्रिं पी॑वसा॒पो यू॒षेण॑ घृ॒तं र॑से॒न श्यां॑ वस॒या  
दू॒षीका॑भि॒र्ह्रादु॑नि॒मश्रु॑भिः पृ॒ष्वा॒न्दि॒व॒रूपेण॑ नक्ष॑त्राणि॒ प्रति॑रूपेण  
पृ॒थि॒वीं च॑र्म॒णा छ॒वीं छ॒व्योपा॑कृ॒ताय॑ स्वाहा॒ल॒ब्धाय॑ स्वाहा॒ हु॒ताय॑  
स्वाहा॑॥ (५२)

अ॒ह॒र॒ष्टा॒विंशतिः॥१॥ [२०]

अ॒ग्नेः प॑क्ष॒तिः सर॑स्वत्यै॒ निप॑क्ष॒तिः सोम॑स्य तृ॒तीया॒पां  
च॑तुर्थ्यो॒षधी॑नां पञ्च॒मी संव॑त्सरस्य॑ ष॒ष्ठी म॒रुता॑ सप्त॒मी  
बृ॒ह॒स्प॒ते॒र॒ष्ट॒मी मि॒त्रस्य॑ नव॒मी वरु॑णस्य दश॒मीन्द्र॑स्यैकाद॒शी  
वि॒श्वे॑षां दे॒वानां॑ द्वा॒दशी॑ द्यावा॑पृथि॒व्योः पार्श्वं॑ य॒मस्य॑ पाटूरः॥ (५३)

अग्नेरेकात्रिंशत्॥१॥ \_\_\_\_\_[२१]

वायोः पक्षतिः सरस्वतो निपक्षतिश्चन्द्रमसस्तृतीया नक्षत्राणां  
चतुर्थी सवितुः पञ्चमी रुद्रस्य षष्ठी सर्पाणां सप्तम्यर्यम्णोऽष्टमी  
त्वष्टर्नवमी धातुर्दशमीन्द्राण्या एकादश्यदित्यै द्वादशी द्यावापृथिव्योः  
पार्श्वं यम्यै पाटूरः॥ (५४)

वायोरष्टाविंशतिः॥१॥ \_\_\_\_\_[२२]

पन्थामनूवृग्भ्यां सन्ततिः स्रावन्याभ्यां शुक्रान्पित्तेन  
हरिमाणं यक्रा हलीक्ष्णान्पापवातेन कूश्माञ्छकंभिः शवर्तानूवध्येन  
शुनो विशसनेन सर्पल्लौहितगन्धेन वयांसि पक्वगन्धेन  
पिपीलिकाः प्रशादेन॥ (५)

पन्थान्द्वाविंशतिः॥१॥ \_\_\_\_\_[२३]

क्रमैरत्यक्रमीद्वाजी विश्वैर्देवैर्यज्ञियैः संविदानः। स नो नय  
सुकृतस्य लोकं तस्य ते वयं स्वधया मदेम॥ (५६)

क्रमैरष्टादश॥१॥ \_\_\_\_\_[२४]

द्यौस्ते पृष्ठं पृथिवी सधस्थमात्माऽन्तरिक्षं समुद्रो  
योनिः सूर्यस्ते चक्षुर्वतः प्राणश्चन्द्रमाः श्रोत्रं मासांश्चार्धमासाश्च  
पर्वाण्यृतवोङ्गानि संवत्सरो महिमा॥ (५७)

द्यौः पञ्चविंशतिः॥१॥ \_\_\_\_\_[२५]



अग्निः पशुरासीत्तेनायजन्तु स एतं लोकमजयद्यस्मिन्त्राग्निः स  
 तै लोकस्तं जैष्यस्यथाव जिघ्र वायुः पशुरासीत्तेनायजन्तु स एतं  
 लोकमजयद्यस्मिन्वायुः स तै लोकस्तस्मात्त्वान्तरैष्यामि  
 यदि नावजिघ्रस्यादित्यः पशुरासीत्तेनायजन्तु स एतं  
 लोकमजयद्यस्मिन्नादित्यः स तै लोकस्तं जैष्यसि यद्यवजिघ्रसि॥ (५)

यस्मिन्त्रद्यौ च॥१॥ [२६]

प्राचीनव२शं यावन्त ऋक्सामे वाग्वे देवेभ्यो देवा वै देवयजनङ्कुद्रश्च तद्धिरण्य२ षट्पदानि ब्रह्मवादिनो

विचित्यो यत्कलयां ते वारुणो वै क्रीतः सोम एकादश॥११॥

प्राचीनव२शं स्वाहेत्याहु यैऽन्तः शरा ह्येष सं तपसा च यत्कर्णगृहीतेति लोमतो वारुणः षट्त्संसतिः॥७६॥

प्राचीनव२शं परिचरति॥

हरिः ॐ॥

॥कृष्ण-यजुर्वेदीय-तैत्तिरीय-संहितायां पञ्चमकाण्डे सप्तमः प्रश्नः  
 समाप्तः॥५-७॥

॥कृष्ण-यजुर्वेदीय-तैत्तिरीय-संहितायां पञ्चमकाण्डः समाप्तः॥५॥



 generated on February 27, 2026

Downloaded from  <http://stotrasamhita.github.io> |  Sto-  
 traSamhita | Credits